


BAKYUVU MPE BAMVUTU NA ZULU YA HEBREUX KITINI YA III

 . . . na kuvwanda dyaka awa na nkokila yayi na tabernacle, samu na kuvwanda na kubundana ya mbote yayi mpe kusambila na kizunga ya Ndinga ya Nzambi yina me pesama na beto ya mpamba. Mpe beto kele . . . ke zola kuvwanda bantu yina ke kota na lusakumunu yayi.

⁵⁵⁴ Mpe mu ke na kivuvu ti Nzambi ke sakumuna beto na nkokila yayi mutindu Yandi me sala na suka yayi, na nsangu ya suka yayi. Mpe mu vwandaka zonga kaka na mfinangani ya munu, Mama Wood, ntama mingi ve, mpe beto vwandaka zonzila yawu, mpe Tata Wood mpe bayankaka. Mpe mu ke kwikila ti ya vwandaka dilongi ya kulutula mbote ya Mpangi Neville na kati ya banyonso ya mbote yina yandi me longaka, yina vwandaka mosi yina vwandaka ya mbote mingi samu na munu kulutula nyonso yina yandi me longaka ntete. Kieleka mu me zola mpe me sepela dilongi yango ya mbote. Mpe yawu me pesa munu ngolo, mpe yawu me zenga munu. Na yawu mu—mu ke zolaka kundima kieleka, beno zaba. Na yawu, na yina me tala bitini ya kikesa, beno zaba, samu na kuvwanda na kikesa, mpe mutindu na . . . David vwandaka kuna, mpe mutindu ti yandi . . . Na yina na kati ya kumekama ya nene yango, na kisika ya kutuba “Mbote, mu ke sala yayi, Mfumu, Nge sadisa kaka munu,” yandi kuingilaka, yandi kwendaka mpe yufulaka Mfumu yinki ya kusala. Yandi me nata éphod, beno zaba, mpe me tuba, “Ntangu yayi ti beto telama mpe beto yufula Nzambi, ‘Yinki beto fwana sala na kati ya mpasi yayi?’” Oh, ya vwandaka kieleka bumvwama. Yina zolaka vwanda ba-vitamine mingi kulutula ba-pharmacie nyonso yina zolaka vwanda na yinsi. Yinga, tata, kieleka yina ke sala beno mbote.

⁵⁵⁵ Ntangu yayi, na nkokila yayi, beto—beto zola ve kuvwanda ntangu mingi tii kati-kati ya mpimpa, kana beto lenda, na zulu ya bakyuvu yayi. Na yawu beto ke—beto ke kota kaka na yawu, na nswalu. Ya kele kumanisa ya bakyuvu yayi, mpe ntangu nyonso yina mu ke banda samu mu manisa yawu . . . Ntangu yayi, Mpangi-kento Hattie, mu zolaka kutuba yawu ve, nge zaba yawu. Mu—mu vwandaka tuba kaka yawu, beno me mona; mpe, mbote mingi. Kasi mu kele na bayankaka awa ya kati mingi kieleka yina me katuka na mulongi, mpe ya kele kieleka mpasi na kupesa mvutu. Beno zaba, milongi yango, bawu ke kwenda sosa yawu na Biblia mpe ke meka na kuzwa mvutu ya bawu mosi ntete bawu ke kwiza kuyufula nge, beno me mona. Mpe na yina . . . mpe yayi ba ke na kubakaka yawu na bande, ya ke

kwenda na Géorgie na nkundi ya munu ya mulongi yandi yina kele awa na bakyuvu nana ya mbote na kati ya Biblia yina kele kieleka, kieleka mpasi.

⁵⁵⁶ Mpe ntangu yayi, sabala ke na kukwiza yayi, beno zimbana ve mpe beno sambila samu na beto.

⁵⁵⁷ Mpe kento ya munu kele mingi mbote; yandi me telama ntangu yayi, mpe yandi me sadisa na kulamba, bubu yayi. Bankundi ya beto ya luzolo ya Canada, Mpangi-bakala, Mpangikento Sothmann, bawu kele awa samu na kutala beto, mpe kieleka beto me sepela kutala ya bawu. Mpe kento ya munu, na kuzabaka ti bawu vwandaka kwiza, mbote, yandi zolaka telama samu ti yandi kuzwa mwa kufunguka mpe kubundana ya bantu ya Muklisto yayi ya luzolo. Beto kele na kyese na kuzwa Mpangi Freddie na beto na nkokila yayi, mpe kento me vwanda na . . . Kento vwandaka awa na suka yayi, kasi mu banza ti yandi me bikana na . . . ve, ya kele kieleka, yandi kele na Meda, na mutindu ya kuvwanda na yandi na yina beto me kwiza awa; samu ti mu zaba ti nkokila yayi ke baka mwa ntangu mingi, ya kele kominyo mpe kusukula makulu. Na yawu beto kele na nsayi na kuzwa bawu mpe bantu yina me kwiza tala beto.

⁵⁵⁸ Ntangu yayi, ntete beto banda na kumeka na kupesa bamvutu ya bakyuvu . . . Mpe beno bambuka kaka moyo ti mu—mu lenda vwanda na foti, beno me mona, mu—mu ke tuba ve ti mu kele na kieleka na zulu ya nyonso yina mu ke salaka. Mu—mu ke mekaka na kuvwanda na kieleka, kasi ya lenda vwanda ti mu kele—mu kele na foti. Mpe—mpe kana mu kele na foti, na yina beno lemvo kila kaka munu; mpe mu ke sambila Nzambi na kuvwanda, mpe, samu ti mu zola kuvwanda na foti. Mu ke mekaka kaka ve na kupesa mvutu ya yawu sa- . . . to mutindu ti mu ke kaka . . . samu na kubakaka lweka mosi, mu ke pesaka mvutu ya yawu na mutindu ya mbote ya luzabu ya munu, beno me mona. Mpe kana fwana mu soba mabanza ya munu na kyuvu ya Biblia, mu banza ti ya kele kaka kima ya kusala. Beto fwana soba, ntangu nyonso, ntangu Ndinga ya Nzambi ke zonza; samu ti ya kele Ndinga ya Nzambi.

⁵⁵⁹ Mpe ntangu yayi, mu banza ti beto ke sambila dyaka samu na bambevo na nkokila yayi, mutindu ntangu nyonso. Mpe bantangu yankaka beno ke kukiyufulaka; beno ke baka mutindu nkonga ya fyoti mutindu yayi, fyoti dyaka, oh, tabernacle ya fyoti awa, mpe bantangu yankaka beno ke mona ve bandandu ya mbote yina beno ke zola kumona. Kasi dyambu kele, yina beno ke salaka, beno ke na kutalaka kaka na nkama zole ya bantu. Mpe mosi ya balukutakanu ya nene, ya lenda vwanda ti beno ke tala bisika nyonso na tatu to kumi ya mafunda, beno me mona, mpe—mpe dyaka na mingi. Na yawu ya kele mutindu yina, beno ke monaka lutangu ya nene. Kasi na nkokila yayi, mu vwanda pesa kaka mvutu . . . Samu ti alo-alo ya beto ke dilaka kaka konso minuti ya fyoti na kilumbu mpe fyoti na mpimpa.

560 Yayi keke Mama Reiser ya kuvwanda awa, yandi yina mu ke na kutalaka? Biblia ya nge, mpangi ya kento, Mpangi-kento Wood keke na yawu na manima kuna. Mu vwandaka me nata yawu na suka yayi samu na nge, mpe mu—mu vwandaka me lenda ve na kupesa yawu nge. Mpe mu—mu vwandaka me mona nge ve na suka yayi, mpe Mama Wood keke na yawu.

561 Na yawu na kupesaka mvutu na alo-alo mpe mu me bakula bima ya nene yina kusalamaka. Mama mosi kubokilaka munu, yandi tubaka, “Mpangi Branham, mu vwandaka na lukutakanu *yayi-yayi* mpe mu vwandaka na dyambu *yayi-yayi* ya mpasi bilumbu *mingi*. Mpe, nge zaba, nge zonzaka kaka kuna, mpe kaka...” Yandi tubaka, “Na kutala mu kubwaka ngambu ntangu Yandi basisaka luzingu ya munu ya ntama.” Mpe yandi tubaka, “Kubanda kuna mu ke talaka dyaka ve mpasi yango.”

562 Mpe mama mosi me kwiza mpe me tuba...mu banza ti yandi keke awa na nkokila yayi, to yandi zolaka nata ditoma katuka Bedford, mu banza, to kisika mosi na zulu kuna. Mwana ya bawu ya bakala vwandaka awa, mu banza, yina vwandaka na mpasi ya ntima, na mutindu ya yimbi mingi. Mpe yandi vwandaka ya kuvwanda awa na lukutakanu, mpe—mpe Mfumumu me sala mpe me simba...me tuba na mwana yango ya bakala na yina me tadila mpasi ya yandi, mpe yandi vwandaka lenda ve na kutelemisa diboko ya yandi, mpe kukangama ya ntima, mpe diboko ya yandi nyonso kukangamaka, mpe ntima ya yandi mutindu yayi. Mpe na mbala mosi yandi me kwenda na ditoma mpe me kwenda na yinzoo, ata mbala mosi dyaka ve ti yandi vwandaka ya kukwamisa na yawu. Mama yango ya Bedford me kuma awa? Nge keke awa, mama? Yandi yina, na manima. Yinga, yandi vwandaka me bokila kaka munu, ntama mingi ve.

563 Na yina ya keke na mama yina vwandaka me bokila munu katuka kuna na Evansville. Mpe yandi zolaka kuma awa ve samu ti yandi keke ntama mingi, yandi vwandaka zaba ve ti beto vwandaka na lukutakanu ya kubeluka na nkokila yayi. Mpe yandi tubaka, “Mpangi Branham, mu vwandaka ya kuvwanda na lukutakanu na Evansville,” mpe yandi tubaka, “nge me baluka na kutala nkonga mpe me tuba...me tuba na munu nani mu vwandaka, mpe yinki mu salaka, mpe mpasi yina mu vwandaka tala, mpe nyonso mutindu yina.” Mpe yandi me tuba, “Mu vwandaka na mpasi yango ya asthme, mpe ba zolaka kupelisa Asthmador mpe nyonso na kati ya kivinga katuka ntangu mu vandaka mwana ya kento ya fyoti.” Yandi me tuba, “Ya me vwanda bamvula zole, mpe munu ata mbala dyaka mosi ve.” Beno me mona?

564 Mpe kaka samu na bayina keke awa na nkokila yayi, bayina vwandaka ve awa na suka yayi samu na kusepela kimbangi; Mu vwandaka na magasin ya bantalu ya fyoti, samu na kusumba popi, mazono. Ntangu yayi, ya vwandaka ve samu na munu mosi, beno me mona. Ya vwandaka samu na mwa mwana ya munu

ya kento, Rebecca, kuna. Mpe—mpe Sarah vwandaka kwenda na kima mosi, yankaka, bubu yayi. Ndambu ya bampangi ya yandi ya lukolo vwandaka sala mwa mutindu mosi ya kuvukana ya fyoti, ya mukembo ya mbutukulu to kima mosi, mpe yandi bakilaka yandi mwa makabu mosi; mpe mu vwandaka sumba mwa popi mosi ya bébé, ya yinda *mutindu* yayi. Mpe ya vwandaka na mama mosi yina belamaka kuna, tubaka, “Nge ke bambuka moyo na munu?”

565 Mpe mu tubaka, “Mu banza ve ti mu zaba.”

566 Mpe ya salamaka ti, ya vwandaka muntu ya dikanda ya Mpangi Neville awa, yina pene . . . ntangu mu vwandaka na nzila ya munu na Suède, bawu . . . Yandi kwizaka awa, yandi vwandaka na mwa mwana ya bakala na fauteuil roulant, kaka mutindu Edith ya fyoti kuna, mpe mwa mwana yango vwandaka na cancer, kuvimba na butomfo ya mayela. Mpe yintu ya yandi ya fyoti vwanda kubwa, mpe mwana ya bakala . . . mpe badokotolo kupesaka kaka yandi basabala tatu na kuzinga. Bawu kubasisaka yawu mpe talaka yawu, mpe monaka ti ya vwandaka . . . yina ya vwandaka, mpe pesaka yandi kaka basabala tatu na kuzinga. Mpe bawu zolaka nata yandi na fauteuil roulant bisika nyonso, mpe na manima kutula yandi na kipoyi ntangu yandi vwandaka kwenda na kivinga mpe na kusala yandi bakizama, mpe na manima kuvutula yandi na yisi. Mu kwendaka mpe mu sambilaka samu na mwa mwana yango, mpe mu lombaka na Mfumu na kubelusa yandi. Mpe kilumbu yina kaka landaka, ntangu bawu nataka yandi kuna, yandi tubaka, “Mu zola ve fauteuil roulant yina.”

567 Yandi me kota na ditoma mpe yandi me kwenda kuna, mpe dokotolo me zibula kipoyi, yandi me tuba, “Mu zola ve kipoyi yina.”

568 Yandi me kwenda na kukimaka mpe me vwanda, dokotolo me fyongonina yandi, yandi me tuba, “Mbote,” yandi me tuba, “na kisika ya basabala tatu, mu ke pesa nge nkama mpe nana ya bamvula nge ke zinga.”

569 Mpe, mazono, mama kukutanaka na munu. Mpe yandi lenda vwanda awa, landila nyonso yina mu zaba, na nkokila yayi. Mpe mwa mwana yango ya bakala vwandaka bula football, ntwenya ya bakala ntangu yayi. Ya mayela, cancer na butomfo, mpe ya kwenda kaka na kulakisa . . .

570 Oh, mafunda ya mambu, beno me mona. Nzambi lenda kondwa ve. Yandi—Yandi lenda kaka ve kukondwa.

571 Mpangi Jean, disu ya nge kele mbote mingi, mpangi ya bakala? Yandi kuzwaka dikubu, mpe yandi vwandaka koma nsonso mpe yawu kuzwaka yandi na disu. Mpe beto nyonso vwandaka sambila samu na Mpangi Jean O’Bannon, mpangi ya beto ya bakala na Louisville yina kuzwaka dikubu na nsonso yina kuzwaka yandi na disu.

572 Ntangu yayi, bakyuvu yayi kele kati ya ntima ya muntu mosi; ti bawu me tanga na nzila ya Masonuku mpe me tala bima yayi, mpe bawu ve . . . ya lendaka vwandaka ti me sepelisa bawu ve, na yawu bawu me pesa yawu awa samu na beto na kumeka na kupesa mvutu. Mpe beno me mona na wapi mutindu ya mpasi ya ke tula beto; samu ti, yina beno ke tuba, bawu ke kangama na yawu. Na yawu beno fwana kukwikila ti beno kele na kieleka, mpe mu kele . . . kieleka ya kukwikila mutindu beno lenda vwanda. Na yawu kuna, kima ya kusala samu na kukwikila ti beto kele na kieleka, ti beto lomba kaka Mpeve-Santu ntangu yayi na kutendula yayi samu na beto, na yina beto ke kulumusa yintu ya beto.

573 Ntangu yayi, Tata ya Mazulu, oh, wapi bweso ya kele na kutuba “Tata” na Kiyidiki ya nene ya mazulu mpe ntoto. Mpe beto ke lomba kaka ti Nge ke baka bakyuvu yayi Nge Mosi ntangu yayi. Yawu me pesama awa na kieleka na mudindu. Nzambi, ti ya katuka na bantima ya beto, na kieleka ya mudindu, samu na kupesa yawu mvutu na mutindu ya mbote yina beto zaba; pesa yawu.

574 Mpe ti bakyadi ya Nge kuvwanda na zulu ya mosi na mosi. Mpe ti kima kutubama awa na nkokila yayi yina ke sadisa kaka muntu mosi yina kele awa. Mpe na yina beto ke kwenda, na manima ya kusambila bambevo mpe kubaka kominyo mpe nyonso yankaka, ti beto tuba mutindu bayina katukaka na Emmaüs, “Bantima ya beto vwandaka pela ve na kati ya beto na yina Yandi vwandaka zonzila beto nzila nyonso?” Samu ti beto me lomba yawu na Nkumbu ya Yesu. Amen.

575 Ntangu yayi, mutindu mu ke tubaka bambala mingi, ti bayayi—bayayi awa kele—kele mbote ya dibanza ya munu na yawu, mpe na manima bantangu yankaka ya ke vumbulaka kuswana. Kyuvu ya ntete awa, mu me mona ya kele kima yina mu tubaka na ntwala, ti ba me pesa dyaka yawu. Mu zola ve . . . mu zola kutanga yawu ntangu yayi, kana beno zola.

65. Ntangu Adam mpe Eve kuzwaka bana ya bawu na Eden, ya vwandaka na bantu yankaka na zulu ya ntoto na ntangu yango? Na Genèse kapu ya 5 mpe na nzila ya 16, Caïn kuzingaka na ntoto ya Nod mpe zabaka kento ya yandi.

576 Ntangu yayi, yina kele kyuvu ya mbote mingi. Ntangu yayi, Biblia ke tuba na beto . . . Mpe bambala mingi bayayi . . . bantangu yankaka beto kukondwa kutala . . . Mu vwandaka tula na kitini ya fyoti ya mukanda, mpe kutuba, “Beno yufula. Mvutu na konso kyuvu ya Biblia.”

577 Mpe muntu mosi kutubaka, “Mbote, nani vwandaka kento ya Caïn?”

578 Oh, mu vwanda sakana na yawu fyoti to kima mosi mutindu, mu tubaka, “Oh, ya vwandaka mwana ya kento ya mama ya yandi ya mbanda,” to kima mutindu yina, beno zaba, to—to

“Yandi vwandaka Mama Caïn.” Kasi yina ke pesa ve mvutu na kyuvu. Ya kele. . .

⁵⁷⁹ Kuna Caïn vwandaka na kento, samu ti Biblia ke tuba ti yandi kuzwaka. Mpe kana Caïn vwandaka na kento, yandi zolaka kuzwa yandi kisika mosi. Mpe yayi ke vwanda kaka na nzila na yawu awa:

Ya vwandaka na bantu yankaka na zulu ya ntoto ntangu Adam mpe Eve kuzwaka bana ya bawu na disamba ya Eden?

⁵⁸⁰ Ntangu yayi, kana beno tala, na kati ya Biblia ya kele kieleka mpasi na kusonika na yina me tala mbutukulu ya kento. Ya kele mwana ya bakala ti ba vwanda sonikaka na Biblia, kento ve. Ya kele mpasi ba tula mbutukulu ya mwana ya kento, na Biblia. To, ya kele kukondwa ntembe, mu zaba ve ya kele ve na kubambuka mosi yina ke na kwiza na munu ntangu yayi, na dibanza, kisika ba sonikaka mbutukulu ya bébé mosi; ba ke tuba, “Bawu kubutaka bana ya babakala mpe bana ya bakento.”

⁵⁸¹ Ntangu yayi, Biblia ke pesa kaka kusonika ya bana tatu yina kubutamaka na Adam mpe Eve, mpe ya vwandaka Caïn, Abel, mpe Seth. Ntangu yayi, kana bawu nyonso tatu yango vwandaka babakala, kana ya vwandaka ve na bakento yina butamaka, mpe na yina ntangu kento kaka (Eve) kufwaka, bantu zolaka suka kaka na kuzinga kuna, samu ti ya zolaka vwanda dyaka ve na nzila samu na bawu na—na kuzwa mosi. . . bantu na kufuluka, samu ti ya zolaka vwanda dyaka ve na bakento yina zolaka vwanda. Eve zolaka vwanda kaka yandi mosi. Kasi, beno me mona, bawu ke sonikaka ve bambutukulu ya ba-bébé ya bakento, na Biblia, na yawu kuna bawu zolaka kuzwa bana ya bakento mutindu mosi na bana ya babakala.

⁵⁸² Ntangu yayi, musoniki ya ntama, mosi ya misoniki ya ntama yina beto me kuzwa, Josèphe, ke tuba ti bawu kuzwaka makumi sambwadi ya bana, mpe Adam mpe Eve; mosi ya misoniki ya ntama, “bana makumi sambwadi, mpe bawu vwandaka bana ya babakala mpe bana ya bakento.”

⁵⁸³ Ntangu yayi, kana. . . Mpe kuna kana Caïn kukwendaka na ntoto ya Nod. . . Ntangu yayi, kana beno tala, musoniki kuvwandaka na kusonika ya mbote, ya mbote awa. Beno me tala mutindu yandi me tanga yawu?

Na Eden, ntangu bawu kuzwaka bana ya bawu na Eden. . . Ntangu yayi, ve na disamba ya Eden, musoniki kuzabaka yawu. Ata muntu yina me sonika noti awa, yandi me tuba: Ntangu Adam mpe Eve kuzwaka bana ya bawu na Eden. . .

⁵⁸⁴ Ve na disamba ya Eden, samu ti ba basisaka bawu na disamba ya Eden. Kasi bawu vwandaka dyaka na Eden, mpe disamba ya Eden kuvwandaka na esete ya Eden. Kasi Eden kuvwandaka mutindu kizunga to—to yina. . . to yinsi, mpe na yina Nod kuvwandaka yinsi yankaka to kizunga pene-pene na yawu.

585 Ntangu yayi, muntu yina kaka ti Caïn zolaka kuzwa, to kukwela, zolaka vwanda mpangi ya yandi mosi ya kento. Yandi zolaka kaka. Samu ti ya vwandaka kaka na bakala mosi mpe kento mosi na bayina bawu zolaka katuka, beno me mona, mpe yandi zolaka kwela mpangi ya yandi mosi ya kento. Ntangu yayi, yina vwandaka ya kulunga na bilumbu yango.

586 Mpe Isaac kukwelaka mpangi ya yandi mosi ya ntete ya menga, Rébecca, ya kukubika na Nzambi. Sarah vwandaka mpangi ya kento ya Abraham, mpangi ya yandi ya menga ya kento; na nzila ya mama ya yandi ve, na nzila ya tata ya yandi. Beno me mona, mpangi ya kento ya menga ti—ti Abraham kukwelaka; ya mama yankaka, kasi ya tata mosi.

587 Na yawu, beno me mona, kukwela muntu ya dikanda na ntangu yina, ntete ti ngolo ya menga ya bantu kulemba, ya vwandaka ya kulunga mpe mbote mingi. Ntangu yayi ya kele ve. Kana beno kukwela mpangi ya beno ya kento bubu yayi, mpe kuzwa bana, kukondwa ntembe bawu ke vwanda . . . mbote, bawu ke vwanda kaka na kifu mpe nyonso. Mpe beto fwana ata mbala mosi ve kukwela tii na yisi na mpangi ya ntete mpe ya zole, beno me mona, samu ti ngolo ya menga ke kuma yisi mpe ke tambula malembe.

588 Kasi kima mosi kaka kuna yina Caïn zolaka sala, zolaka vwanda, kukwela mpangi ya yandi mosi ya kento. Mpe ya kele kisika bana vwandaka ti . . . Yandi kuzwaka kento ya yandi, me kwenda na ntoto ya Nod mpe zabaka yandi, mpe kuna me kwiza bana. Beno me mona, . . .

589 Mpe kana beno tala, na nzila ya Caïn kubasikaka bantu ya mayela. Na nzila ya Seth kubasikaka misambidi, mu zola kutuba, vinu ya ludedomo. Kaka kuna, bawu zole yango, kubutaka nzila ya kieleka na yina beto ke na kuzingaka bubu yayi.

590 Kana beno tala bubu yayi ntangu yayi (kaka na kusukisa kyuvu yayi): dikanda yango ya Caïn ke zinga dyaka, mpe dikanda yango ya Seth ke zinga dyaka. Bawu nyonso zole kwizaka na yisi kaka mutindu mosi. Bana ya Caïn kele awa na Jeffersonville na nkokila yayi, mpe bana ya Seth kele awa na Jeffersonville na nkokila yayi. Na yina ngolo ya menga ke na kulemba mpe ke na kubasika, kasi dikanda yango ke na kulandila dyaka.

591 Ntangu yayi, beno tala mbote. Bana ya Caïn vwandaka ntangu nyonso . . . mpe ntete kifuluka ya maza kubebisa, ba vwandaka bantu ya mayela: bantu ya science, milongisi; mpe kaka misambidi, kasi vwandaka nkonga ya kufundisa. Beno me mona? Ntangu yayi beno tala mbote, bawu vwandaka kaka mutindu tata ya bawu Caïn. Caïn, yandi vwandaka musambidi. Yandi kutungaka autel ya kitoko, mpe salaka dibuundu ya kitoko, mpe mekaka na kusala yawu kotalana kitoko mingi kuluta kosalu ya fyoti yina vwandaka na Seth kuna. Beno

zaba yawu? Yandi kieleka . . . Yandi bongisaka autel na bafololo, mpe tulaka yawu kitoko, mpe salaka yawu kitoko mingi; mpe salaka dibuundu ya nene, ya yinda, ya kuvimba, samu ti yandi vwandaka banza ti yandi zolaka kuzwa bweso na Nzambi na kusalaka mutindu yina.

⁵⁹² Mpe Abel kukwendaka mpe kuzwaka dimeme ya fyoti, mpe me banda na kubenda yawu na autel, mpe me tula yawu na ditadi mpe me kufwa yawu.

⁵⁹³ Mpe ntangu yayi, kana Nzambi na kuvwandaka ya kudedama, kana ti nyonso yina Yandi ke lomba vwandaka kusambila, Caïn kusambilaka Nzambi kaka na kieleka mutindu mingi Abel kusalaka. Bawu nyonso zole vwandaka kieleka. Bawu nyonso zole vwandaka meka na kutala lemvo ya Nzambi. Ata mosi ya bawu vwandaka ya kukwikama ve. Bawu nyonso zole, kieleka, vwandaka mikwikidi na Yehowa. Ntangu yayi, kuna, ya ke pesa beto kima mosi ya kubanzila.

⁵⁹⁴ Bantu yankaka, awa na nkokila yayi mu me monaka ve; mu me monaka ntete beno ve. Kasi beno fwana bakula yayi, mpe beno bumba yayi na yintu ya beno. Beno me mona? Ata wapi mutindu musambidi beno kele, ya kele ve na kima mosi ya kusala na yawu. Beno lenda zinga na dibuundu, beno lenda vwanda ya kieleka mingi, kasi beno kele ya kuzimbana! Beno me mona?

⁵⁹⁵ Mpe beno ke tuba, “Mbote,” beno ke tuba, “ba-pasteur ya beto kele na mayela mingi, bawu ke luta na baseminere samu na kuzwa ndongosolo ya mbote. Bawu kele ba-théologien, bawu zaba théologie nyonso—nyonso mpe nyonso yankaka. Mpe bawu kele na mayela, ya kulongoka, ya kieleka . . . basolami ya mbote yina beto zaba.” Mpe dyaka bawu lenda vwanda ya kuzimbana! Beno me mona?

⁵⁹⁶ Ntangu yayi Caïn, na nzila ya yandi: bawu vwandaka, mosi na mosi, misambidi ya kieleka; bantu ya kuzabana ya kieleka; mpe bawu vwandaka bantu ya science, mpe badokotolo, mpe mitungi, mpe bantu ya bisalu, mpe bantu ya mayela. Kasi ba losaka dikanda yango nyonso, kubanda na Caïn nzila nyonso tii na yisi.

⁵⁹⁷ Mpe na lweka ya Abel: bawu vwandaka ve mitungi to dyaka milongisi to bantu ya mayela; ya lendaka vwanda ti, bawu vwandaka, bantu ya kulemvuka, misansi ya mameme ya mpamba, mpe bantu ya bilanga, bayina vwandaka tambula kaka na Mpeve.

⁵⁹⁸ Ntangu yayi, Biblia ke tuba, “Ya kele na ata kitumbu na bawu yina kele na Klisto Yesu, bayina ke tambulaka ve landila nsuni kasi landila Mpeve.” Muntu ya kimpeve kele na moyo ya kimpeve yina lenda kufwa ata mbala mosi ve. Mpe muntu ya nsuni kele na atimosifere ya nsambulu na ziunga ya yandi (mpe zola kusambila mpe nyonso yankaka yina) kasi kele ya nsuni; ve

muntu ya kukondwa lukwikilu, kasi mukwikidi ya nsuni; mpe ya vwandaka ya mutindu yina ba losaka.

599 Ntangu yayi, kubanda kuna, Caïn kwendaka mpe kwelaka kento ya yandi na ntoto ya Nod. Ntangu yayi, ya ke tuba ve nani Seth kukwelaka, to nani bayankaka kukwelaka. Mpe kima mosi ya kieleka ya kitoko na yawu keke kuza ti—ti, na yina me tala makwela ya Caïn, beto keke na mvutu samu na yawu. Samu ti yandi zolaka kwela mpangi ya yandi ya kento, to yandi. . . to ya zolaka vwanda. . .

600 Ya vwandaka dyaka ve na bakento na zulu ya ntoto, kasi zolaka basika kaka na Eve. Yandi vwandaka mama ya bantu nyonso ya moyo. Ya keke, bantu nyonso yina vwandaka zinga, yandi vwandaka mama ya bawu. Ya keke samu na yina ti yandi vwandaka. . . Mpova *Eve* zola kutuba “mama ya bantu ya moyo.” Na yawu yandi kwizaka mpe butaka mwana yayi. Mpe Caïn kukwelaka mpangi ya yandi mosi ya kento, mu ke lenda ve kumona mutindu yankaka na yawu. Na yawu ya vwandaka na bantu vwanda zingaka na kilumbu yango, kieleka. Beno me mona? Mbote, mpe. . .

Ntangu Adam mpe Eve kuzwaka bana ya bawu na Eden. . .
 Ntangu yayi beno tala mbote, kyuvu keke yawu: **Ntangu bawu kuzwaka bana ya bawu na Eden, ya vwandaka na bantu yankaka na zulu ya ntoto na ntangu yango? Ve! Na yina na Genèse 5:16, beno me mona, Caïn kuzingaka na ntoto ya Nod mpe zabaka kento ya yandi.** Kieleka. Beno me mona?

601 Yina keke Genèse 1, kisika Yandi vangaka muntu na kizizi ya Yandi mosi, yina vwandaka na théophanie. Mpe na Genèse 2, Yandi me sala na fundu-fundu ya ntoto, yina vwandaka muntu yina beto me kuzwa ntangu yayi. Mpe na manima, na kapu ya 3 vwandaka kubwa, mpe ba basisaka yandi na disamba ya Eden; mpe kuna bana me butama na bana. Mpe Caïn kubakaka kento ya yandi mpe zinga na yandi na ntoto ya Nod, na ngaanda, samu ti Nzambi kukabulaka yandi na kubundana na mpangi ya yandi ya bakala (samu na lufwa ya—ya Abel). Mpe ya keke yandi ti yandi bakaka, mpangi ya yandi mosi ya kento, mpe kwelaka yandi; ya keke kaka mutindu yina mu lenda, munu mosi, mu lenda kumona mutindu ti—ti yandi kukwelanaka.

602 Ntangu yayi, ba tubaka. . . Mpe mu banza ti bankundi ya munu ya ndombe bayina keke na kati awa ke lemvokila kutala yayi, kieleka samu ti ya keke ya kulunga. Mbala ya munu ya ntete ya kukutana na muntu na luzingu ya munu, na manima ya kundima ya munu. . . Mu vwandaka. . . mu kutanaka na Mpangi George DeArk mpe bayankaka kuna. Mpe mu vwandaka tambula, mpe Mfumu me twadisa munu na kisika mosi ya fyoti. Mpe bawu vwandaka solola na kisika muntu ya ndombe kukatukaka. Mpe bawu vwandaka meka na kutuba ti muntu ya ndombe. . . Ti Caïn kukwelanaka na kibulu mutindu

dikaku, mpe na nzila ya yawu kuna kwizaka bantu ya ndombe. Ntangu yayi, ya kele luvunu! Kieleka, ya kele luvunu! Mpe beno telama ata mbala mosi ve samu na yawu. Samu ti ya vwandaka ve na bantu ya dombe to mindele, to bantu ya mutindu yankaka, ya kele kaka bantu mosi tii na kufuluka ya maza. Na yina na manima ya kufuluka ya maza mpe yinzo ya yinda ya Babel, ntangu bawu kubandaka na kumwangana, ya kele kuna bawu kubakaka bantinta ya bawu mpe nyonso yina. Bawu nyonso basikaka na yinti mosi. Ya kele kaka kieleka. Adam mpe Eve kuvwandaka tata mpe mama, ya ntoto, ya konso kivangu ya moyo ya bantu yina vwandaka na zulu ya ntoto. Ya kele kieleka. Muntu dombe, mundele, mpembe, ya mbwaki, ya mwamba, ntinta nyonso beno lenda vwanda, yina kele ya kieleka landila kisika yina beno ke zinga, mpe mutindu ti—ti. . . kaka mutindu. . .

603 Mu banza ti mu lendaka basisa yayi na yina mu kele na zulu ya yawu. Bantu awa ntangu yayi na nkabwani na bandombe yayi mpe misiku mpe nyonso bawu ke na kulutisaka, mu banza ti ya kele buzoba. Kieleka mu banza. Beno kuwa, beno bika kaka bantu yango swi, bawu zaba yinki bawu zola. Nzambi kusalaka muntu muntu ya ndombe, mpe yandi kele na nsayi samu na yawu. Kieleka! Kana Nzambi kusalaka munu muntu ya ndombe, mu ke vwanda na nsayi samu na yawu; kana Yandi kusalaka munu muntu ya mbwaki, mu ke vwanda na nsayi; kana Yandi salaka munu mundele, mu kele na nsayi; kana Yandi salaka munu muntu ya mwamba, mu ke vwanda na nsayi. Nzambi kusalaka beto na bantinta ya beto, mpe Yandi salaka beto mutindu Yandi zolaka beto kuvwanda, mpe beto nyonso kele bana ya Yandi. Kieleka! Mpe bawu zolaka sala mambu ve mpe kulandila mutindu yina. Ya kele yimbi na kusala yawu. Ba zolaka sala yawu ve. Nzambi kusalaka beto. . . mutindu beto zola yawu.

604 Mpe muntu ya ndombe, yandi ke na nsatu ve ya kubasika kuna mpe kusukisa nsungi ya yandi—ya yandi to ntinta ya yandi, mpe kuvukisa yawu na mundele mpe nyonso ya mutindu yina. Mu ke semba yandi ve. Ve. Muntu ya ndombe kele na bima yina mundele kele na yawu ve. Kieleka! Ya kele kaka kieleka. Mpe ata mbala mosi ve ti Nzambi kukubikaka bawu na kuvwanda mutindu yina.

605 Mbote, beno tala. Muntu ya ndombe kele. . . yandi kele—yandi kele. . . yandi ke—yandi ke na nkadulu mosi na yandi yina mundele kele na yawu ve. Yandi kele na kukondwa kunyonga mosi, ya “sala kivuvu na Nzambi, mpe bika kaka yankaka ya yawu kukwenda”; kana ti yandi kuzwa yawu to kana ti yandi kuzwa ve, yandi kele na nsayi na mutindu nyonso. Mu ke zola kuzwa muvimba ya yawu, na nkokila yayi, kieleka mu zola. Mbote, yandi kele na yawu, mpe ya kele ya yandi; bawu ke zola ve

kuvukisa yawu na bantu yankaka mpe kusukisa yawu, na kisika. Ya kele kaka kieleka.

606 Mu banza ti mama yina kuna na Shreveport kusalaka mosi ya mulabu ya mbote—ya mbote yina mu me kuwaka ntete na luzingu ya munu. Yandi salaka mulabu, mpe bawu tulaka yawu na mukanda. Yandi belamaka, yandi tubaka, “Mutindu bima yayi ke na kusalamaka awa, na nkabwani na bantu-ndombe yayi, mu zola ve bana ya munu kukwenda kukota na lukolo yango ya bana ya mindele.” Yandi tubaka, “Bawu ke kuzwa ve dibanza yina bawu ke kuzwa kana bawu vwandaka na mulongisi ya muntu-ndombe.” Kento yina kele kento ya mayela mingi. Yandi zabaka yina yandi vwandaka zonzila, bawu ke kuzwa ndongosolo ya mbote mingi. Ya kele kaka kieleka. Na yawu mu banza ti bantu ke salaka yimbi na kusalaka yawu.

607 Mpe kuna bawu ke tuba, “Caïn mpe Abel. . .” mpe nyonso mutindu yina. Ve, tata! Muntu-ndombe kele na kima ve ya kusala na yawu. Ya kele mpeve na kati ya kuna yina kele na kima ya kusala na yawu. Ya kele kaka kieleka.

608 Na yawu Caïn kuzabaka kento ya yandi, mpe ya vwandaka mpangi ya yandi ya kento. Mpe bawu. . .yandi nataka yandi na ntoto ya Nod, mpe kuna me basika makanda ya nene ya ntoto: bantu ya nsambulu mpe misambidi.

609 Mpe beno banza kaka bubu yayi, nkundi, beno telama kaka mpe beno banza kaka mwa ntangu fyoti. Ti ya kele na makumi ya mafunda na bambala makumi ya mafunda mpe mafunda ya mafunda, ya bantu kieleka yina ke kwendaka na dibuundu, kaka ya kukwikama mpe ya kukipesa na dibuundu yango mutindu bawu lendaka kuvwanda, yina kele kaka ntama ya kuzimbana mutindu Caïn kwvandaka. Beno me mona? Ya kele Nzambi Yandi yina ke ponaka! Ya kele Nzambi Yandi yina ke solaka! Beno me mona? Nzambi Yandi yina ke talaka kyadi! Ntoto lenda tuba ve dyambu na kiyidiki banzungu, ya kele kiyidiki banzungu yina kele mfumu ya ntoto. Ya kele kieleka.

610 Ntangu yayi beno tala mosi ya mbote, kyuvu yina ke landa awa:

Na Zole ya Pierre 2:4—2:4. . .

611 Muntu yina ke na Biblia, zola kubaka masonuku yayi kaka na nswalu na yina mu ke na kutanga yawu, kana beno zola. Mpe mutindu ya kusadisa munu awa, na yina beto ke baka kyuvu yayi.

612 Ntangu yayi, samu na Caïn yayi mpe—mpe nyonso yankaka yina, kana ya ke sepedisa beno ve ntangu yayi, beno zabisa kaka beto yawu. Beto ke vwanda na kyese. . .

613 Ntangu yayi ya Zole ya Pierre 2:4. Mbote mingi, tata, beto bawu yayi:

66. Ya Zole ya Pierre 2:4, “Samu ti kana Nzambi kele . . . Samu ti kana Nzambi kubikaka ve na kupesa kitumbu na bawanzio yina kusumukaka, kasi losaka bawu na yisi na difelo,” na yina samu na yinki Klisto kulongaka na bampeve na boloko, na ya Ntete ya Pierre 3:19?

614 Ntangu yayi, beto kele na Pierre 2:4, ntete. Mbote mingi:

Samu ti kana Nzambi kubikaka ve na kupesa kitumbu na bawanzio yina kusumukaka, kasi losaka bawu na yisi—na yisi na difelo, mpe—mpe yekulaka bawu na basieni ya mpimpa, ya kubumba samu na lusambusu;

615 Mbote, ntangu yayi beto tala na ya Ntete ya Pierre (yina kele ya Zole ya Pierre), ya Ntete ya Pierre 3:19, beno kuwa yayi. Beto bawu yayi, kaka awa. Bakyuvu yayi me kwiza kaka, ya kele samu na yina mu sonikaka yawu ve.

. . . yina mpe . . . kwendaka mpe longaka na bampeve na boloko;

616 Oh, yinga, beto bawu yayi. Beto banda fyoti na ntuala ya yawu, na nzila ya 18:

Samu ti Klisto mpe . . . mbala mosi kutalaka mpasi samu na masumu, ya bantu ya mbote samu na bantu ya mbote ve, ti yandi zolaka nata beto na Nzambi, ba kufwaka yandi na nsuni, kasi vumbukaka na nzila ya Mpeve:

Na yina mpe yandi kwendaka mpe longaka na bampeve na boloko;

Bayina na ntangu ya ntama kutumamaka ve, . . .

617 Nkundi ya munu ya luzolo, kana nge tanga nzila yina ke landa, mpe kuna Yawu ke tendula yawu. Beno me mona?

Bayina na bantangu ya ntama kutumamaka ve, na yina mbala mosi mvibudulu ya Nzambi kuingilaka na bilumbu ya Noé, na yina ba vwandaka tunga nzaza, kisika ndambu, ya kele, myoyo nana kuvulukaka na maza. (Beno me mona?)

618 Ntangu yayi, kana beno ke tala awa, mu banza ti mulongi yayi kele na mosi yankaka na . . . kima mosi na nzila kaka mutindu mosi, beto ke pesa mvutu na yawu na mwa mantwala.

619 Pierre ya Ntete kapu 4 . . . to 2:4, kana beno tala, “samu ti kana Nzambi kubikaka ve na kupesa kitumbu na bawanzio,” wapi mutindu *wanzio* yango kele ya kusonika? Na “w” ya fyoti. Beno me mona? Ntangu yayi, na lweka awa, “bampeve yina vwandaka na boloko bayina balulaka ntima ve na mvibudulu na bilumbu ya Noé,” bawanzio mosi. Ya vwandaka bantu: minati nsangu, milongi; “kubikaka ve na kupesa kitumbu na bawanzio.” Beno zaba ti . . . mpova *wanzio* kukatukaka na mpova “munati nsangu”? Bantu yikwa zaba ti *wanzio* kele “munati

nsangu”? Kieleka, wanzio kele munati nsangu, “mpe Yandi kubikaka ve na kupesa kitumbu na bawanzio.” Beno me mona?

620 Mpe awa na Hébreux, beno ke bambuka moyo beto talaka yawu basabala fyoti me luta, “bawanzio”?

621 Mpe kuna na Hé-...na Apocalypse, “Na wanzio ya dibuundu ya Sardes ba me sonika mambu yayi. Na wanzio ya dibuundu ya Éphèse ba me sonika mambu yayi. Na wanzio ya dibuundu...” Beno ke bambuka na yawu? Mpe beto talaka mpova *wanzio*, mpe na buku ya bampova, mpe beto talaka ti ya vwandaka zola kutuba “munati nsangu.” Ya lendaka vwanda “munati nsangu na zulu ya ntoto, munati nsangu ya kimpeve,” mpova *wanzio*.

622 Na yawu na kitezo yayi, kana beto ke baka lexique mpe kutala yawu, beno ke tala ti ya ke banda na “minati nsangu, na minati nsangu ya ntete.” Beno me mona, “Kana... Kana Yandi kubikaka ve... Kana Nzambi kubikaka ve na kupesa kitumbu na bawanzio yina kusumukaka,” (Beno me mona?) “mpe bamoyo ya kimpeve,” (Beno me mona?) “na manima ya kulingila...”

Ntangu yayi beno tala mbote, yandi tubaka:

...kana...kubikaka ve na kupesa kitumbu na bawanzio yina kusumukaka, kasi losaka bawu na yisi na difelo, mpe yekulaka bawu na basieni ya mpimpa, ya kukubama samu na lusambusu;

623 Na yina beno tala dyaka Pierre ya Ntete awa, 3:19, beno tala mbote mutindu yayi ke tangama ntangu yayi:

Samu na yina mpe yandi kwendaka mpe longaka na bampeve na boloko;

Bayina na ntangu ya ntama kutumamaka ve, ntangu mbala mosi mvibudulu ya Nzambi kulingilaka na bilumbu ya Noé,... (beno me mona, ya vwandaka minati nsangu ya kilumbu yango, minati nsangu)... na yina ba vwandaka tunga nzaza, kisika ndambu... ya kele, myoyo nana kuvulukaka na maza.

624 Ntangu yayi kana beno ke tala ntangu myoyo yango kuvwandaka na Mazulu. Ntangu yayi, na Apocalypse 11...to na kapu ya 7, mu banza...to ve, ve, ya kele na kapu ya 12. Yandi ke pesa kizizi ya kento ya kutelama; ngonda na yintu ya yandi mpe mwini...to, mwini na yintu ya yandi mpe ngonda na yisi ya makulu ya yandi. Mpe dalago ya mbwaki kutelamaka samu na kufwa Mwana ntangu kaka Yandi ke butama, mpe yandi kubakaka mukila ya yandi mpe kubendaka mosi na tatu ya bambwetete ya Mazulu mpe losaka bawu na ntoto. Beno ke tala yawu? Ntangu yayi, ya ke zola kutuba ve ti Satana ke na mukila ya yinda yina yandi kubulaka bantu, kasi “mukila yina yandi ke *tuba*,” mpe bendaka mosi ya kitini ya tatu ya bambwetete yango. Bambwetete yango vwandaka nkuna ya Abraham.

625 Abraham kutubaka, “Oh . . .”

626 Nzambi kutubaka na Abraham, “Tala na mazulu, mpe tanga bambwetete kana nge lenda.”

627 Yandi tubaka, “Mu lenda sala yawu ve.”

628 Yandi tubaka, “To dyaka nge ke lenda ve kutanga lutangu ya nkuna ya nge,” bambwetete.

629 Nani kele Mbwetete yina ke Lezimaka mpe ya Suka? Yesu ya Nazareth, yina ke lezimaka mingi kulutila yina me zingaka na nsuni ya kimuntu. Yandi kele Mbwetete yina ke Lezimaka mpe ya Suka. Mpe Yandi kele Nkuna ya Abraham, na kukwizaka na nzila ya Isaac. Mpe beto, na kuvwandaka ya kufwa na Klisto, beto ke kuma Nkuna ya Abraham mpe bibyadi landila nsilulu.

630 Na yawu bambwetete ya mazulu ke monikisa bampeve ya bantu awa. Mpe ntangu dalago ya mbwaki (Rome, na yisi ya kukwamisa ya yandi) kusimbaka zole na tatu ya . . . to mosi na tatu ya bambwetete, mpe losaka bawu na yisi, yina vwandaka na kukoma na kulunsi ya Mfumu ya beto Yesu ntangu bawu kulosaka Yandi mpe Yandi vwandaka . . . mpe kulosaka Yandi mpe kuzwaka ve kima ya kusala na Yandi; ya vwandaka kitini ya tatu ya bambwetete ya bawanzio, myoyo ya bawanzio.

631 Beno me mona, na nzutu ya beno, na kati ya beno . . . (beto kele na kyuvu yankaka na zulu ya yawu, na mbala mosi, samu na kupesa yawu mvutu ya mbote). Na yawu ntangu . . . Na kati ya beno kele mpeve, muntu yankaka. Ngaanda ya beno kele muntu mosi, kati ya beno kele muntu yankaka. Na yawu kati ya beno kele kimpeve, ngaanda ya beno kele nzutu. Beno me mona? Mpe moyo yayi, kana beno kele ya kutwadisa na Mpeve, na nzila ya Nzambi, beno ke kuma munati nsangu ya Nzambi, to wanzio. *Munati nsangu* ya Nzambi, *wanzio* ya Nzambi, ya kele kaka mpova mosi; ba lenda kabula yawu ve: munati nsangu ya Nzambi, to, wanzio ya Nzambi.

632 Mpe wapi yina kele na lutumu ya nene? Wanzio ya Mazulu to wanzio na chaire? Nani kele na yawu? Wanzio na chaire! Paul ke tuba, “Kana Wanzio ya Mazulu kukwiza mpe kulonga nsangu mosi yankaka na beno na yayi yina mu me longaka yimeni, ti yandi vwanda ya kusinga.” Na yawu wanzio ya kupakulama na Mpeve-Santu mpe na Ndinga ke telama pene-pene na Nzambi. Ya kele kieleka. Na Mazulu, lutumu ya yandi . . .

633 “Mangolo nyonso na Mazulu mpe na ntoto me pesama na diboko ya Yandi. Beno kwenda, mpe Mu ke kwenda na beno. Nyonso yina beno ke kangisa na ntoto, Mu ke kangisa na Mazulu. Nyonso yina beno ke zibula na ntoto, Mu ke zibula na Mazulu.”

634 Oh, kana Dibuundu ya nene ya santu kubakula kaka ngolo ya yawu na kusala bima yayi. Kasi ya kele na ntembe mingi mpe boma mpe kutekita, na kukiyufulaka kana ya ke, “Ya ke salama?” Ntangu nyonso yina ya ke vwanda, Dibuundu ata

mbala mosi ve lenda telama. Mpe ntangu konso kuzonza ya boma me zimbana mpe Mpeve-Santu me baka ntwadusulu nyonso ya Dibuundu, ti boma nyonso me kwenda, mpe Dibuundu yango kele na ngolo. Beno me mona? Samu na yinki, bawu kele na nyonso yina kele ya Mazulu na manima ya bawu. Bawu kele bamvwala ya Kiti ya kintinu. Kieleka! Mvwala ya Klisto kele na lutumu, mpe nyonso yina kele ya Klisto kele ya mvwala yango. Mpe Yandi tubaka, “Beno kwenda na yinza nyonso, beno kele bambangi ya Munu na manima Mpeve-Santu me kwiza na zulu ya beno.” Mpe yinki kele mbangi? Ya kele mvwala; yandi ke kwiza mpe ke pesa kimbangi ya kima mosi. Mangolo nyonso ya Mazulu kele kaka na maboko ya beno! Oh, samu na yinki beto ke sala ve? Mpe dibuundu kele kisita, mpe beto ke na kulala. Ya kele samu ti beto ke bakula ve bima yayi.

⁶³⁵ Ntangu yayi, myoyo yina vwandaka na boloko (bayina balulaka ntima ve), vwandaka ve myoyo ya Bawanzio yina ba—yina ba kulumusaka na nzutu ya Bawanzio, kasi ya vwandaka bampeve ya myoyo ya bawanzio yango yina kubwaka ntete mbandukulu ya yinza, ntama kuna ntangu mvita kusalamaka na Mazulu. Mpe Satana mpe—mpe dalago kunwanaka, mpe na yina . . . to Michel mpe—mpe dalago kunwanaka (mpe Lucifer). Mpe ba losaka Lucifer na bana ya yandi nyonso (bawanzio nyonso yina yandi kuvunaka), mpe bawanzio yango kukwizaka na ntoto mpe kuzwaka lenda ya kukuma bantu. Mpe ntangu bawu kusalaka yawu, ya kele ntangu “bana ya Nzambi kumonaka bana ya bakento ya bantu kitoko, mpe bakaka na kati ya bawu bakento.”

⁶³⁶ Bawu kele bana ya Nzambi. Muntu nyonso yina me butama na ntoto yayi kele mwana ya Nzambi. Ata ti yandi kele musumuki to yina yandi kele, yandi kele mwana ya Nzambi. Ya kuvangaka na kizizi ya Nzambi samu na mikembo ya Nzambi, yandi kuvangamaka mutindu yina. Kasi Nzambi na mbandukulu kuzabaka nani ke yamba Yandi mpe nani ke yamba Yandi ve. Na yawu Yandi zolaka sola, to, kusola ve, kasi na luzabu Yandi zolaka tuba nani zolaka vwanda ya kuzwa mpulusu mpe nani zolaka vwanda ve kuzwa mpulusu, samu ti Yandi kuzabaka wapi muntu yina ke baka wapi mpeve.

⁶³⁷ Mpe bampeve yango yina ke katukaka na Kiti ya kintinu ya Nzambi, mpe yina ke telamaka na ntuala ya Kiti ya kintinu ya Nzambi, mpe yina zingaka . . . mpe byazi mpe byazi mpe byazi ya bamvula ya ntangu ntete yinza kubanda, na Mvwandulu ya Nzambi, beno banza ti bawu zaba ve kima mosi na yina me tala kusambila? Mpe bawu me kulumuka mpe me kota kaka na bantu, mpe bawu ke sambila Nzambi! Kieleka, bawu ke sambila Nzambi; mpe bawu kele na luzabu ya Nzambi, mpe bawu kele na mayela, mpe na balenda, mpe ya kulongoka, ntangu nyonso. Kasi Nzambi kulosaka bawu kubanda mbandukulu!

638 Na yawu kuna, nkundi, kuvwanda mambele ya dibuundu, to—to luzabu ya théologie mosi to kima mosi, ya ke na kima mosi ve ya kusala na Yawu. Ya fwana vwanda Menga ya Yesu Klisto mpe mbutukulu ya malu-malu yina ke vukisa beno na Yandi mutindu muntu mosi. Beno bawu yayi.

639 Nzambi, na mbandukulu ntangu Yandi kuzabaka ti... Bakala mpe kento vwandaka ya kusala mosi, zole ve, ba salaka bawu mosi. Bawu vwandaka ya kukabuka, mosi ya kutula na nsuni mpe mosi na théophanie. Yandi zabaka yawu. Na yawu samu na kumonisa yawu na beno: ntangu Nzambi salaka kento, Yandi bakaka ata mbala mosi ve fundu-fundu mosi mpe me sala kento mutindu Yandi salaka bakala; Yandi bakaka lumpanzi ya lweka ya Adam, mpe kento kumaka kivangu na nzila ya bakala (samu ti kento kele kitini ya bakala). Beno ke bakula Yawu ntangu yayi? Beno me mona? Beno bawu yayi.

640 Beno tala bawanzio. Mpe Nzambi mpe mpeve yina kele ya kuvukana na Nzambi kele Mpeve mosi. Ya kele kieleka. Ntangu yayi, Mpeve ya Nzambi yina ke zingaka na kati ya Dibundu, ya kele Mpeve yina me katuka na Mazulu, yina Nzambi zabaka ntete mbandukulu ya yinza, yina mangaka luvunu ya dyabulu. Mpe Mpeve yango zolaka baka nzutu ya nsuni samu na kuvwanda. . . samu na kubaka bakumekama ya Yandi. Yandi zolaka kwiza na nsuni mutindu bayankaka yayi kusalaka, mpe bawu nyonso kunataka kizitu mosi. Mpe Nzambi, na mbandukulu, zabaka bampeve yina ke zola, mpe yina ke zola ve. Beno bawu yayi. Dyabulu yango kele mayela mingi ti yandi ke vuna kaka musolami ya kieleka, kana ya lendaka salama.

641 Na yawu bampeve yayi, bawanzio yayi yina longaka, vwandaka na boloko; *bawanzio*, kana beno lenda tala yawu awa, ya kele “m” ya fyoti yina zola kutuba “muntu”; bawanzio, minati nsangu awa na zulu ya ntoto. Bawu sumukaka, mpe mutindu kaka ti bawu zolaka sumuka zolaka vwanda kukondwa lukwikilu! Mpe mutindu. . . Bawu vwandaka na bansambulu ya bawu mosi, mpe bawu kwikilaka ve na nsangu ya Noé. Bawu kwikilaka ve na nsangu ya Enoch. Mpe bawu mangaka Nsangu ya bawu, “mpe ba fundisaka bawu,” Biblia ke tuba ti bawu vwandaka.

642 Enoch kupesaka profesi na bawu, na kutubaka, “Mfumu ke na kwiza na kumi ya mafunda ya basantu ya Yandi.”

643 Mpe bawu pesaka profesi. Mpe Noé tungaka nzaza, mpe bawu tubaka, “Yandi kele exalté! Yandi kele fanatiki! Ya kele ve na kima mosi mutindu mvula ke kwiza.” Mpe nkama na makumi zole ya bamvula kulutaka, mpe yandi vwandaka na nsambulu yina vwandaka na mpulusu na kati ya yawu, ya vwandaka na mutindu mosi ya kukimina yina ba salaka, kasi bawu vwandaka sepela na mutindu ya bawu.

644 Ya kele mutindu ya kele bubu yayi, ti bantu ke sepela na mutindu ya bawu. Kasi ya kele na mutindu mosi ya kutina, mpe mutindu yango ya kele na nzila ya Yesu Klisto. Amen. Beno bawu yayi: dikanda mosi, bampeve mosi.

645 Mpe bawu vwandaka kieleka misambidi, kieleka misambidi, kasi bawu kondwaka ngwisani ya ndefi.

646 Mutindu mosi ya kele bubu yayi. Bantu ke kwenda na dibuundu, mpe ke kuma ya mabuundu ya nene, mpe ke meka na kuvwanda muntu ya kuzabana mingi na mbanza. Kana bawu zola kukuma ya dibuundu, bawu ke sola ya kulutula nene na mbanza, ya mbote mpe yina ba ke banzila mbote na mbanza. Wapi mutindu ntama bawu ke kondwa mbokolo! Wapi mutindu ntama bawu ke kondwa Yawu!

647 Mutindu kaka beno ke zaba Yesu Klisto ya kele na nzila ya luzayikisu ya kimpeve, na nzila ya théologie ve mpe bambala yikwa beno ke tangaka Biblia. Ata ti beno kele Muklisto ya Science, Méthodiste, Témoins ya Jéhovah, to nyonso yina beno kele; ata nyonso beno kele, beno ke zaba Yawu ata mbala mosi na Ndinga, ya kele Mpeve ya Nzambi yina ke monikisaka Yandi na beno. Ya kele luzayikisu ya kimpeve!

648 Ntangu Adam, na disamba ya Eden, mpe Eve, ntangu ba losaka bana yango, beno tala Caïn kukwiza na théologie ya mbote. Yandi tubaka, “Nzambi zolaka zaba ti beto ke na kusalaka yayi ke katuka na ntima ya munu nyonso—nyonso. Mu ke tunga autel ya kitoko, mu ke tula na zulu ya yawu bafololo, mu ke tula na zulu ya yawu bambuma, mu ke sala yawu kitoko mingi. Kieleka mu lenda sepelisa Nzambi na yayi mpe kubika Yandi kuzaba ti mu kele ya kieleka na ntima ya munu.” Yandi vwandaka ya kulunga ntangu nyonso Ndinga vwandaka kwenda; Nzambi vwandaka zola kusambila, yandi kwendaka na kusambila. Yandi salaka kisika mosi ya kitoko samu na kusambila, ya nene, cathédrale ya mbote (mutindu bawu ke bokilaka yawu bubu yayi). Mpe yandi salaka yawu mbote, yandi tungaka yawu mbote mpe tulaka autel na kati ya yawu; yandi vwandaka ve muntu ya kukwikama ve.

649 Kasi Abel, na zulu ya Ndinga ya Nzambi . . . Ya vwandaka ve na Biblia ya kusonama na ntangu yina, kasi Nzambi *monikisaka* na yandi ti ya vwandaka ve samu na mbuma ti beto basikaka na disamba ya Eden, ti ya vwandaka ve ba-pomme Adam mpe Eve kudyaka, ya vwandaka kieleka mambu ya kuvukisa banzutu ti kabulaka bawu mpe kabisaka bawu. Mpe na kuzabaka ti bawu kukumaka bantu ke kufwa, mpe na nzila ya menga ya Adam, mpe na nzila ya menga ya nyoka ti yayi kubandaka, Abel, na nzila ya luzayikisu ya Kinzambi, kwendaka mpe kuzwaka mwana-dimeme mpe pesaka yawu munkayulu. Mpe Nzambi tubaka, “Ya kele Yawu!” Kieleka.

650 Ntangu bawu kulumukaka na Mongo ya Nsobolo, Yesu tubaka, “Yinki bantu ke tuba Munu Mwana ya muntu kele?”

651 “Bayankaka ke tuba Nge kele ‘Moïse,’ mpe bayankaka ke tuba Nge kele ‘Élie,’ mpe bayankaka ke tuba Nge kele ‘Jérémie,’ mpe bayankaka ke tuba Nge kele ‘Profete yango.’”

652 Yandi tubaka, “Kasi Nani beno ke tuba Mu kele?”

653 Pierre tubaka, “Nge kele Klisto, Mwana ya Nzambi ya Moyo.”

654 Yandi tubaka, “Kyese na nge, Simon mwana ya Jonas, samu ti nsuni mpe menga ve me monikisa yayi na nge.” (Beno tala mbote!) “Ya kele ve mingi ya kulutula na nzila ya mukanda, ya kele ve mingi ya kulutula na nzila ya lukolo; nge longokaka yawu ve na seminere, to dyaka ti muntu kutubaka na beno. Nsuni mpe menga ve me monikisa yayi na nge, kasi Tata ya Munu yina kele na Mazulu me monikisa yawu na nge. Mpe na zulu ya ditadi yayi Mu ke tunga Dibuundu ya Munu, mpe bankotolo ya difelo ke telemina Yawu ve.” Beno bawu yayi. Beno tala Dibuundu ya Nzambi ya moyo. Yawu yina. Na zulu ya dibuundu yango. . . Na zulu ya *luzayikisu* yango, Dibuundu yayi kele ya kutunga. Ya kele luzayikisu ya Kinzambi ti Nzambi me monikisa, ti Yesu Klisto kele Mwana ya Nzambi, mpe beno me ndima Yandi mutindu Mvulusi ya beno mosi, beno me luta lufwa na Luzingu.

655 Mpe Mpeve-Santu ke kota na kisalu mpe ke sala na bamambeke ya Nzutu yayi. Beno tala Dibuundu! Ata kana ya kele ya mawa, mpe na kati ya kisalu, mpe beno ke telama na yisi ya yinti ya pin kisika mosi, to kisika nyonso ya kele, kana ya kele na yinzo ya muntu na lukutakanu ya muntu, ata kisika ya ke vwanda. Kitoko mpe bima ke sepelisa Nzambi ve. Ya kele na kieleka ya ntima na luzayikisu ti Yesu Klisto ba me monisa Yandi mutindu Mwana ya Nzambi, Mvulusi ya beto mosi. Amen!

656 Oh, beto. . . beno ke kuzwa bayayi ve, na kukwendaka na nzila mutindu yina, ee?

657 Beno tala bayina ti. . . kuna kisika ti Yandi kwendaka; bawanzio: minati nsangu, milongi yango, bantu ya mayela yango, minati nsangu yango bayina kwikilaka ve na ntangu Noé kwendaka na kulonga bawu mpe tubaka na bawu, “Mbote, beno kota na nzaza yayi.”

658 Bawu tubaka, “Beno kuwa exalté yayi. Beno kuwa fanatikiki yango. Oh, ya kele na mvula ve. Nani me kuwaka ntete na kima ya mutindu? Oh, oh, beto kele na mabuundu ve? Beto kele misambidi ve?” Oh, bawu vwandaka misambidi!

659 Yesu tubaka ya ke vwanda nsungi yina lutaka kaka kuna, ke vwanda nsungi yango yina ke vutukila dyaka kaka ntete Nkwizulu ya Yandi, “Mutindu ya vwandaka na bilumbu ya Noé, mutindu mosi ya ke vwanda na nkwizulu ya Mwana ya

muntu. Samu ti bawu vwanda kudya, vwanda kunwa, vwanda kwela, vwanda pesa na makwela.” Bawu vwandaka na Reno, na Nevada kuna, kisika mosi. Bawu vwandaka na mitindu nyonso ya buzoba yina kele na bawu bubu yayi; kuvukana, mpe bansaka, mpe kuseka, biseki mpe nyonso yankaka; ke lakisa mutindu ya kinzambi, kasi ke manga Kieleka ya kulunga: ngwisani, Nsangu ya lemvo. Nzambi na kusalaka mutindu ya Yandi, mpe na kupesaka bantu ngwisani ya Yandi—ya Yandi, mutindu bawu zolaka kutina; Yawu vwandaka na mpulusu na kati ya yawu, mpulusu vwandaka kisika ya kukima.

⁶⁶⁰ “Na yinki beto kele na nsatu ya mpulusu?” Bubu yayi bantu ke tuba, “Beto ke na kuzingaka ve na yisi ya mutindu ya demokalsi ya mbote ya luyalu? Yinki beto ke na yawu nsatu?”

⁶⁶¹ Mu ke kipe ve mutindu ya lutangu ya demokalsi ya luyalu beto ke zinga, beto kele na nsatu ya Menga ya Yesu Klisto. Kieleka! Beto ke na nsatu ya Klisto. Mu ke sepela na mutindu ya demokalsi ya luyalu; yina ke na kima mosi ve, ya kusala na mpulusu ya moyo. Kieleka! Baluyalu yango ke luta, mpe konso yinsi ke luta. Mpe mu telamaka na lweka . . . kisika ba-pharaon kutelamaka, mpe beno fwana timuna bametele sambanu na yisi ya ntoto samu na kutala bakiti ya bawu ya kintinu kisika bawu vwandaka vwanda. Ba-pharaon nyonso mpe bimumu nyonso ya yandi ya ntoto yayi, mpe nyonso ya yawu ya bima ya kubenda ke kubwa mpe ke luta, kasi Yehowa ke yala kukondwa nsuka, samu ti Yandi kele Nzambi yina ke kufwa ve. Na mutindu ya ngolo beto ke telama na zulu ya Ditadi Klisto Yesu, samu ti bantoto nyonso yankaka kele bazelo ke dyamisa.

⁶⁶² Ata kana ya kele . . . bimumu ke telama mpe ke kubwa, kasi oh, ya kele na kima mosi ve . . . mu ke kipe ve kana ya kele . . . kima nyonso; ya kele ve na kima ntangu yayi, kima ve na bilumbu ya ntuala, kima ve (bansatu to yina ke kufwaka to kima ve) lenda kabula beto na luzolo yango ya Nzambi yina kele na kati ya Klisto. Ntangu muntu ke butama na Mpeve ya Nzambi, yandi kele dyaka ve kivangu ya ntangu, kasi yandi kele kivangu ya Seko. Amen. Yandi me luta lufwa na Luzingu. Yandi me luta na . . . Yandi me luta ntangu ya kima mosi, na kati ya Seko. Yandi lenda ata mbala mosi ve kufwa! Mpe Nzambi dyaka ndefi ti Yandi ke vumbula yandi na bilumbu ya nsuka.

⁶⁶³ Na yawu bawu lenda kuzwa mabuundu nyonso ya beno ya nene, mpe bantangu nyonso ya beno ya nene, mpe nyonso beno zola, mpe kutuba bansaka nyonso ya beno mpe kuvwanda na bansaka ya beno ya Loto, mpe bakukabula ya basupu na nkokila mpe nyonso yankaka yina beno zola; mpe kuzwa mulongi mosi ya kulongoka ya kutelama kuna. Ya lenda vwanda ti yandi lenda sala kisalu mbote mingi kuluta bantwenya yayi ya babakala yina zaba na mpasi ABC ya bawu. Kasi mu ke tuba na beno kieleka, mu ke zola mingi kuzwa mwana ya bakala yina zaba ve ABC ya yandi kulonga munu (yina zabaka Klisto) kulutila ba-théologien

nyonso ya nene yina kele na bandongosolo nyonso ya beno yina lenda vwanda ya kubanza. Kieleka!

⁶⁶⁴ Awa na Kentucky, bilumbu fyoti me luta, ntwenya mosi ya bakala yina vwandaka tanga na mpasi nkumbu ya yandi mosi, tubaka Mfumu bokilaka yandi na kulonga mpe yandi vwandaka sosa lukolo. Kasi, luyalu vwandaka zola ve kubika yandi kuzwa yawu. Mulongi mosi ya nene lutaka kuna na nkumbu ya yinda mutindu *yina*, mulongisi mosi ya nene ya théologie, mbote, bawu bikaka yandi kuzwa lukolo. Kieleka. Yandi salaka ndandani ya balukutakanu ya réveil basabala zole, ata moyo mosi. Mpe tata ya yandi vutukaka kuna, yandi tubaka, “Ntangu yayi beno bika yandi kuzwa yawu, mu kele muntu ke futaka mpaku, mu kele na muswa ti mwana ya munu kuzwa yawu. Mpe mwana ya munu zolaka kuzwa yawu mpe.”

⁶⁶⁵ Na yawu yandi vutukaka na kuzaba, mpe yufulaka bawu, bawu tubaka, “Mbote, beto ke bika yandi kuzwa yawu na nkufi bankokila zole.” Mpe bawu salaka mpe bikaka yandi kuzwa yawu bankokila zole.

⁶⁶⁶ Mpe nkokila yango mwana yango ya ntwenya kutelamaka kuna mpe vwanda lenda ve kutanga Biblia, yandi bakaka muntu na kutanga masonama ya yandi. Kasi ntangu yandi belamaka na estrade, yandi vwandaka ya kupakulama na Mpeve-Santu. Mpe na yina yandi longaka, pene ya bantu makumi zole kukwizaka na autel; mpe mulongi ya kento ya nkumbu yina na kudila me sala nzila tii na Calvaire, na autel.

⁶⁶⁷ Kieleka, mpangi, ya kele ve—ve yina beno zaba, ya kele Nani beno zaba. Beno tala dibanza, ya kele yina ya ke lomba, ya ke lomba kuzaba Klisto. Kuzaba Yandi, kele Luzingu; kumanga Yandi, kele lufwa.

⁶⁶⁸ Na nswalu na bakyuvu ya beto yankaka, bakyuvu ntangu yayi yina ke kwenda na Georgie:

67. Yinki matadi na . . . ke monikisa na Apocalypse 21:19 mpe na 20?

⁶⁶⁹ Kana beno zola kubaka ntangu samu na kuzibula Babiblia ya beno, yina beto kele ve na ntangu mingi ntangu yayi, kasi mu ke meka na kupesa yawu mvutu na nswalu. Apocalypse makumi zo- . . . Mu banza ya kele 21:19 mpe 20. Yinga.

⁶⁷⁰ Mbote mingi, na kati kuna beno ke tala ti yandi vwandaka zonzila na matadi yina vwandaka na yinzo ya nene. Mpe matadi vwandaka balufulu. Kana beno ke tala . . . mu banza ti beno kele na yawu kuna, Mpangi Neville. Mpe konso ditadi vwandaka lufulu. Ditadi mosi ve lufulu, mpe bayankaka . . . Kasi konso ditadi vwandaka lufulu. Konso ditadi vwandaka lufulu ya ntangu nyonso. Mpe ya vwandaka na matadi kumi na zole. Mpe kana beno tala matadi yango kumi na zole, beno pesa mosi na mosi. . . Ya vwandaka banda ntete na jaspe, mpe sardoine, mpe nyonso ya mutindu yina, na kumonikisaka konso ditadi.

671 Na Biblia kuna beno ke tala ti ba vwandaka bokila yawu matadi mosi. Bayankaka ya yawu fyoti mutindu yankaka, beno me kuwaka ntete yawu ve. Kana beno vutuka na kutala na buku ya bampova beno ke tala ti ya kele ditadi kaka mosi, kaka nkumbu ya mutindu yankaka; ya me soba.

672 Kasi ya ke bandaka na—na jaspe. Jaspe vwandaka ditadi ya—ya Benjamin, to, ditadi ya . . . oh, ya mwana ya bakala ya ntete, Ruben. Ditadi ya ntete vwandaka Ruben, yina vwandaka jaspe. Ditadi ya nsuka vwandaka Benjamin, ditadi ya nsuka na zulu.

673 Ntangu yayi, matadi kumi na zole yayi yina bifulu vwandaka ya kuvwanda na zulu, matadi yango—yango kumi na zole vwandaka ya kulelika na zulu ya ntulu ya Aaron. Mpe yawu—yawu vwandaka monikisa, yandi vwandaka nganga-Nzambi ya ntete ya makanda yayi—yayi. Mosi na mosi ya matadi ya bawu ya mbutukulu na kati awa, vwandaka na kinkuti yayi—yayi. Mpe ntangu bantu vwandaka mona kinkuti yayi, bawu vwandaka bakula ti Aaron vwandaka nganga-Nzambi ya ntete ya dikanda yango nyonso, ntangu bawu vwandaka mona ditadi ya mbutukulu na kinkuti yayi.

674 Ntangu yayi, mutindu beto me kuwa na suka yayi na nsangu ya Mpangi Neville. Mpe mutindu bambala mingi bawu vwandaka nata Urim Thummim. Beno me mona ya kele ya kutanga na Biblia mutindu nzila bawu vwandaka zaba kana nsangu ya bawu vwandaka Kieleka to ve. Matadi yango, ntangu bawu ke kwenda na kutuba yina muntu me tuba, yina profete me pesa profesi, mpe matadi yango nyonso kintwadi vwandaka pesa nsemo. Yawu vwandaka sala kimvuka ya bansemo yina vwandaka nata saphir, mpe jaspe, mpe escarboucle, mpe matadi yango nyonso yankaka vwandaka pesa nsemo ya bawu, ya vwandaka sala ntinta ya kitoko ya nene ya mukyama yina vwandaka vukisa kima ya movimba kintwadi.

675 Ntangu yayi, ntangu yayi, bubu yayi, na yina ba me katula Urim Thummim yango na kinganga-Nzambi yina, ntangu yayi Biblia yayi kele Urim Thummim ya Nzambi bubu yayi. Mpe ntangu mulongi ke longaka, ya fwana vwanda ve kaka mwa kisika mosi awa, mpe ti na nyonso yina yandi ke tula kivuvu ya yandi; ya fwana vwanda Biblia ya movimba yina ke lakisa nsangu yina muntu yango ke na kulongaka. Yawu yina dyambu. Kaka kisika mosi ve, mpe kutuba, “Mbote, Biblia ke tuba yayi.” Oh, kieleka, ya ke tuba bima mingi. Kasi beno fwana sala yawu nyonso kuvwanda kintwadi. Mpe ntangu Mpeve ya Nzambi ke kwiza mpe ke kota na Ndinga, Yawu ke tula yawu nyonso kintwadi mpe ke pesa Nsemo mosi ya nene, mpe Nsemo yango kele Yesu Klisto. Amen.

676 Ntangu yayi, matadi kumi na zole yayi vwandaka balufulu kumi zole yina vwandaka banda na Ruben, mpe Gad, mpe nzila nyonso tii na Benjamin; makanda kumi na zole, matadi kumi na

zole. Mpe matadi yango na Tempelo, na Jérusalem ya malu-malu ya Mazulu, konso lufulu ke vwanda na zulu ya mosi ya batata.

⁶⁷⁷ Ntangu yayi beno tala mbote, beno me tala matadi, ntangu yayi beno ke tala mbote batata yango kotalana mbala mosi na kima yankaka, kaka na kyuvu yankaka.

68. Tendula—tendula ya yiya . . . bibulu yiya ya Apocalypse 5.

⁶⁷⁸ Mpangi Neville, kana nge kele na yawu kaka kuna, to mosi ya beno, Apocalypse 5, beto ke tanga yayi kaka minuti mosi. Ya kele—ya kele kizizi ya kitoko awa ya . . . Beno tala, munu mpe kele na yawu, Apocalypse kapu ya 5:

Mpe mu monaka na diboko ya ya yandi ya kibakala yina vwanda na zulu—na zulu ya kiti ya kintinu buku ya kusonama na kati mpe kukondwa mpe—mpe—mpe na manima, ya kukanga na bidimbu sambwadi.

Mpe mu . . .

⁶⁷⁹ Ntangu yayi, yina kele ve kisika yango. Mu ke zola kaka kukuma fyoti na ntwala, bibulu yiya. Beto mona, nzila ya 14. Mbote mingi, tata. Ntangu yayi beto ke kwenda, ya kele kieleka. Ntangu yayi beto banda na zulu awa na—na nzila ya 12, ve, mu banza . . . “Mpe bibulu yiya tubaka, ‘Amen.’” Ve, ya kele kisika fyoti na manima ya yawu, Mpangi Neville. “Tala, mu kuwaka ndinga . . .”

⁶⁸⁰ Beto mona, kaka minuti, mu vwandaka tanga yawu ntama mingi ve me luta. Oh, beto bawu yayi, beto banda na nzila ya 6. Na nzila ya 5:

Mpe mosi ya bakuluntu kutubaka na munu, Kudila ve: tala, Nkosi ya dikanda ya Juda, Dikanda ya David, me nunga samu na kuzibula buku, mpe samu na kuzibula bidimbu . . . na yawu.

Mpe mu talaka, mpe, . . . na kati-kati ya kiti ya kintinu mpe . . . bibulu yiya, mpe na kati-kati ya bakuluntu, vwandaka ya kutelama Dimeme mutindu yina ba me kufwa, yina vwandaka na bayintu sambwadi mpe meso sambwadi, yina kele Bampeve sambwadi . . . ba fidisaka katuka . . . na ntoto.

⁶⁸¹ Mu zola beno kubumba kyuvu yango, mpe kana mu baka yawu ve awa na minuti mosi, Mu zola beno kuvutula dyaka yawu, mu zola kuzonzila na yawu, “Bampeve sambwadi ya meso sambwadi yina vwandaka na Dimeme.” Oh, ya kele kieleka kima ya kitoko. (Mbote, beto zola kubaka kyuvu ya mpangi ya bakala yayi ntangu yayi.) Mbote mingi, beno zimbana yawu ve ntangu yayi.

Mpe yandi kwizaka mpe bakaka buku na diboko ya yandi ya kibakala yina vwandaka na zulu ya kiti ya kintinu.

Mpe na yina yandi bakaka yawu, bibulu yiya mpe makumi zole na yiya ya bakuluntu fukamaka na ntwala ya Dimeme, . . . mosi na mosi ya bawu vwandaka na ba-harpe, . . .

682 Ntangu yayi, yina kele bibulu yiya—yiya awa, kana beno ke tala. Ntangu yayi beto kwenda na ntwala mpe beto tanga kaka mwa ntama mingi:

. . . ba-harpe ya wolo, . . . ya kufuluka na bambungu mpe na mananasi, . . . mpe bisambu ya basantu.

Mpe bawu yimbaka nkunga ya malu-malu, . . . Nge kele ya kulunga. . . (mpe me kwenda na ntwala mpe me sala ya bawu. . . kusambila ya bawu nyonso na Mfumu)

683 Ntangu yayi, bibulu yiya yayi ya Apocalypse, kana beno tala yawu, kisika nyonso . . . (Beno mitangi ya Biblia, mpe muntu yina ke kuwa bande yayi). Bibulu yiya yango, bawu vwandaka na bizizi yiya: mosi vwandaka na kizizi mutindu muntu, yankaka yina vwandaka na kizizi mutindu ngombe, mpe yankaka kizizi vwandaka mutindu ngononi, mpe yankaka kizizi vwandaka mutindu nkosi. Mpe bawu ata mbala mosi ve vwandaka kwenda na kuvutukaka manima, bawu zolaka kwenda ve na kuvutukaka manima.

684 Bantu yikwa ke bambuka moyo na buku ya ntama ya Apocalypse ntangu beto longokaka yawu bamvula me luta, ntangu mu bakaka pene ya bamvula zole awa na zulu ya Buku ya Apocalypse? Mingi ya biboba ke bambuka moyo.

685 Beno tala, bawu zolaka kwenda ve na kuvutukaka manima, samu ti nzila nyonso bawu vwandaka kwenda bawu vwandaka kwenda na ntwala. Kana bawu kwendaka nzila *yayi*, bawu vwandaka kwenda mutindu muntu; kana bawu kwendaka nzila *yayi*, bawu vwandaka kwenda mutindu nkosi; kwendaka nzila *yayi*, bawu vwandaka kwenda mutindu ngononi; kana bawu kwendaka nzila *yayi*, bawu vwandaka kwenda mutindu ngombe. Beno me mona, bawu zolaka kwenda ve na kuvutukaka manima, bawu vwandaka kwenda na ntwala ntangu nyonso.

686 Ntangu yayi bibulu yango yiya. Ntangu yayi samu na kutala yayi na nswalu, samu ti mu zola ve kuvwanda ntangu mingi na zulu yayi. Kasi bibulu yiya. . . *Kibulu*, na Biblia, ke monikisa “ngolo.” Mpe beno tala bibulu yayi vwandaka ve kuna na dyanga to na mubu kisika mosi vwandaka mata, kasi bawu vwandaka na Kiti ya kintinu ya Nzambi, mpe bawu vwandaka sambila Nzambi. Bibulu yiya yango zola kutuba bangolo yiya yina ke mata na ntoto, mpe bangolo yango yiya vwandaka Bansangu ya mbote yiya: Matthieu, Marc, Luc, mpe Jean; mosi na mosi vwandaka swaswana ve na mosi yankaka.

687 Mpe mosi ya bawu, . . . Na yina Nsangu ya mbote ke kwenda na ntwala mutindu nkosi, ya kele ngolo, ya ke pesa ngolo; Nsangu ya mbote kele na kikesa mutindu nkosi, mpe ya kele ntinu

mutindu nkosi. Kana ya kwenda na ntwala na kizizi ya muntu, ya kele na mayela mpe balenda mutindu muntu. Kana ya kwenda mutindu ngononi, ya kele mapapu ke kwenda na mbangu mpe bantela ya zulu. Ya . . . Beno ke mona yina mu zola kutuba? Kana ya kwenda mutindu ngombe, ya kele mpunda ya kisalu yina lenda benda, ngombe ya kisalu yina ke benda kizitu ya Nsangu ya mbote. Bibulu yiya vwandaka bangolo yiya, yina vwandaka: Matthieu, Marc, Luc, mpe Jean; Bansangu yiya ya mbote yina ke wakana na Ntwala ya Nzambi. Ya vwandaka . . .

⁶⁸⁸ Kana beno talaka, bawu vwandaka na meso na ntwala mpe na manima. Bawu—bawu . . . Kisika nyonso ya vwandaka kwenda, ya vwandaka lakisa. Bawu vwandaka mona kisika nyonso bawu vwandaka kwenda. Mpe yina kele ngolo ya Bansangu ya mbote na yina yawu ke basika, ya lenda . . . Ya kele na balenda ya muntu; ya kele na mbangu ya ngononi; ya kele na ngolo, ngolo ya kubenda, munati-kizitu mutindu ngombe; ya kele ngolo mpe ke pesa ngolo ya nkosi. Beno me mona, ya kele Bansangu ya mbote yiya, yina kele bangolo ya Apocalypse, ya kapu 4.

Mbote mingi, ntangu yayi yina ke landa:

69. Banani kele bakuluntu makumi zole na yiya? Mbote mingi, mu banza ti ya ke vwanda na . . . **Banani kele bakuluntu makumi zole na yiya?**

⁶⁸⁹ Ntangu yayi ya kele kaka pete-pete, beto lenda baka yawu. Bakuluntu makumi zole na yiya vwandaka ya kuvwanda na ntwala ya Kiti ya kintinu. Ya kele na . . . mu banza ya kele na nzila ya 4, ya kele kisika ya kele. “Mpe kuna basikaka yankaka . . .” Mu fwana . . . Beto mona, mu ke . . . 4:10.

⁶⁹⁰ Mbote mingi, Apocalypse, kapu ya 4, mpe nzila ya 10. Ya kele kieleka. Beto ke baka yawu.

Mpe makumi zole na yiya ya bakuluntu fukamaka na ntwala ya yandi yina vwandaka na kiti ya kintinu, mpe sambilaka yandi yina ke zinga mvula na mvula mpe mvula na mvula, mpe losaka bayimpu ya bawu na ntwala ya kiti ya kintinu, na kutubaka,

Nge kele ya kulunga, O Mfumu, samu na kuzwa nkembo mpe buzitu mpe ngolo: samu ti nge vangaka bima nyonso, mpe samu na kilengi ya nge ya kele mpe kele ya kuvanga.

⁶⁹¹ Ntangu yayi makumi zole na yiya ya bakuluntu. Kuluntu kele mukengi. Ntangu yayi beno tala, bawu vwandaka batata kumi na zole mpe bantumwa kumi na zole. Mpe bawu vwandaka ya kuvwanda, kumi na zole na lweka mosi mpe kumi na zole na lweka yankaka. Ya vwandaka makumi zole mpe yiya ya bakuluntu, ya vwandaka batata kumi na zole na lweka mosi, Ngwisani ya Ntama; bantumwa kumi na zole na lweka yankaka, ya Ngwisani ya Malu-malu. Yesu tubaka ve, “Beno ke vwanda

na bakiti kumi na zole ya kintinu, na kufundisa makanda kumi na zole ya Israël”?

⁶⁹² Ntangu yayi, balufulu. Beno tala, ya kele mpe na yinti na kati kuna. Mpe yinti na balweka nyonso zole ke butaka bambala kumi na zole mbuma. Mpe bawu ke pesaka mbuma ya bawu mbala mosi na ngonda, yina kele bangonda kumi na zole na mvula. Bawu ke pesaka bambala kumi na zole mbuma konso mvula ke luta. *Kumi na zole*, lutangu ya “kusambila”, beno me mona. Mpe ya kele makumi zole mpe yiya, ya kele makumi zole na yiya, bantumwa kumi na zole mpe batata kumi na zole. Bawu kele ya kuvwanda na Kiti ya Kintinu.

⁶⁹³ Mbote mingi, ntangu yayi nzila ya 4, to kyuvu ya yiya:

70. Yinki vwandaka zola kutuba nsinga ya mbwaki ya Genèse 38?

⁶⁹⁴ Nsinga ya mbwaki, kana beno ke tala, ya vwandaka Juda. Mpe yandi vwandaka na bana ya babakala, mpe mosi ya bana ya yandi ya babakala kukwelaka kento ya Cananéenne. Mpe kento ya Cananéenne yayi kuzwaka ata mwana ve, mpe mwana ya yandi ya bakala kufwaka. Na yina, musiku na kilumbu yina vwandaka kubaka. . .mwana ya bakala yina vwandaka landa zolaka baka kento ya mpangi ya bakala, mpe kupesa nkuna na yina kufwaka. Mpe muntu yankaka yina ndimaka ve mpe kusala mutindu yandi zolaka sala, mpe Mfumu kufwaka yandi. Na yina yandi vwandaka na ntwenya mosi ya bakala; na yawu Juda tubaka, “Vingila tii mwana ya bakala yayi ke kuma. . .ke kula tii kisika nge lenda kwela yandi.”

⁶⁹⁵ Mpe ntangu yandi kulaka na kisika ti yandi zolaka kwela kento ya ntama ya bampangi ya yandi ya babakala zole, mbote, yandi zolaka baka yandi kuna, samu na kupesa nkuna na bampangi ya yandi ya babakala yina vwandaka. . .yina kufwaka ntete yandi. Juda pesaka ve na kento yango (kento ya Cananéenne) mwana ya bakala, ntwenya ya bakala, mpe bikaka mwana ya bakala kukwenda na ntwala. Na yawu kento na kumonaka ti yandi kento vwandaka sala yimbi, na yawu yandi basikaka mpe fuka vwale na zulu ya kizizi ya yandi, mpe vwandaka na kisika ya bantu nyonso mutindu ndumba zolaka vwanda.

⁶⁹⁶ Juda me lutila kuna mpe bakaka kento yango mutindu kento ya yandi, mpe kento vwandaka ndumba, mpe yandi zingaka na kento yango. Mpe yandi tubaka, kento tubaka, “Mbote, wapi dyambu nge ke kanga na munu?” Mpe bakala. . .kento tubaka. . .

⁶⁹⁷ Yandi tubaka, “Mu ke pesa mwana ya kombo.” Yandi tubaka, “Mbote, pesa munu kidimbu ti nge ke sala yawu.” Na yawu kento bakaka yinti ya yandi mpe lupete ya yandi mpe nyonso yankaka, mpe bumbaka yawu.

698 Mpe ntangu bawu nataka mwana ya kombo, bawu tala ve ndumba, samu ti yandi vwandaka ve ndumba.

699 Na manima ya mwa ntangu fyoti, yandi lakisaka ti yandi zolaka vwanda mama. Mpe na yina yandi lakisaka ti yandi zolaka vwanda mama, ba kwizaka tuba na Juda, “Bokilo ya nge ya kento me sala kindumba.” Ba tubaka, “Samu ti yandi—yandi ke vwanda mama, mpe bana ya nge nyonso zole ya babakala me kufwa.”

700 Yandi tubaka, “Mbote, ba ke basisa yandi, mpe ba ke kuyoka yandi na tiya.”

701 Mpe na yawu kento fidisaka dyambu na Juda, mpe kento tubaka, “Muntu yina salaka yayi, kele mfumu ya yinti yayi mpe ya lupete yayi.” Mbote mingi, yina vwandaka bokilo ya yandi ya bakala.

702 Mpe yandi tubaka, “Yandi kele mingi ya kulunga kulutila na munu.”

703 Ntangu yayi, ntangu yandi zabaka ti yandi zolaka buta bana ya yandi, bawu vwandaka mapasa. Mpe ntangu dipasa . . . Bébé ya ntete yina vwandaka butuka, landila binkulu ya ntama ya ba-Juif, mwana ya ntete vwandaka na bukuluntu, mwana ya ntete yina vwandaka basika. Mpe yina, beno bambuka moyo, vwandaka mwana ya yandi ya ntete. Ata mosi ya bayankaka ya bana ya babakala kuzwaka mwana mosi na yandi. Yandi kuzwaka ata mbala mosi ve mwana tii ntangu yayi.

704 Mpe ntangu mwana ya yandi ya ntete basikaka, ya vwandaka kaka diboko. Mpe kibutisi tulaka yandi nsinga ya mbwaki, samu ti singa ya mbwaki ke zonzila mpulusu yina mwana ya ntete ya mwense Marie zolaka vwanda . . . ke vwanda na nsinga ya mbwaki ya mpulusu.

705 Mpe ntangu yandi vutulaka diboko ya yandi, yankaka yina me basika ntete. Mpe na yina yandi salaka yawu, yandi tubaka, “Samu na yinki nge me sala yayi? Yankaka yina me kuzwa bukuluntu.”

706 Na yawu beno tala yina zola kutuba Genèse 38, beno me mona. Ti mwana ya ntete zingaka dyaka tii nkwezulu ya Mfumu Yesu Klisto. Ti ya ntete vwandaka na yisi ya musiku ya mpulusu.

707 Beno zaba mu tubaka . . . mwana ya mulet, beno zaba, mu tubilaka yawu, ti meso ya yandi vwandaka . . . nyonso mutindu, makutu ya yandi pasukaka, kasi, kana yandi vwandaka ya kubutama na bukuluntu, dimeme ya kulunga, yina zaba dyambu ve kufwaka na kisika ya yandi. Yawu yayi.

708 Na yawu yina vwandaka samu na bukuluntu. Bébé ya ntete yina basikaka na mama, mpe bawu monaka diboko yango (mpe zabaka ti ya lendaka vutuka dyaka). Mpe ntangu yandi basisaka na ntwala diboko ya yandi samu na kulakisa ti yandi vwandaka na yawu, yandi vwandaka mwana ya ntete, kibutisi tulaka yandi

singa ya mbwaki mpe yandi bendaka diboko ya yandi. Beno me mona? Kasi, kieleka, yandi vwandaka ya ntete. Ya vwandaka singa ya mbwaki, singa ya mbwaki ke . . . nzila nyonso na Biblia, ya ke zola kutuba mpulusu; ya vwandaka lakisa na ntuala nkwezulu ya mwana ya ntete.

709 Mpunda ya ntete yina vwandaka butuka, ngombe ya kento yina vwandaka butuka, nyonso yina ya vwandaka, nyonso yina vwandaka butuka ntete (yina vwandaka basika) vwandaka na yisi ya mpulusu, zolaka vwandaka ya kuvulusa; nyonso zolaka vwanda ya kuvulusa! Alleluia! Oh, yina ke pesa kaka munu kyese. Beno ke bakula yawu? Ya *ntete* zolaka vwanda ya kukatula na kimpika. Ya vwandaka musiku. Lusakumunu kuvwanda na Nkumbu ya Mfumu!

710 Mpe ntangu Yesu Klisto kubutukaka, Yandi vulusaka yinza ya muvimba. Kieleka, Yandi salaka. Yandi vwandaka Mukudi ya kivangu nyonso yina vangamaka ntete na zulu ya ntoto. Yandi vwandaka Mukudi. Mpe na . . . mpulusu nyonso keke na Yandi, mpe na ata mutindu yankaka ve beno lenda kwiza ata na bisalu ya mbote, na kukumaka ya dibuundu, to nyonso yina ya keke; beno fwana kwiza na nzila ya singa ya mbwaki, Mukudi yango, mpangi Mukudi yango.

Mbote mingi, ntangu yayi yina ke landa keke:

71. Wapi kisika ke vwanda makabu . . . Wapi kisika ba ke fidisa makabu na yina me tala lufwa ya bambangi zole, na Apocalypse 11?

Oh, Mpangi Palmer, kana nge lenda yufula ve bakyuvu yankaka!

711 Ntangu yayi, mpulusu, basinga yayi awa, singa ya mbwaki yayi, beto me mona ti ya zola kutuba mpulusu.

712 Ntangu yayi kyuvu yina ke landa keke:

Yinki keke makabu na Apocalypse 11?

713 Ya ke na ntangu yina ke na kwiza . . . Ntangu yayi yayi ke pesa mvutu na kyuvu yina pesamaka mvutu nkokila yankaka yina, yina mulongi nkundi ya munu sonikaka na yina me tala ba-Juif, mutindu ya ke vwanda.

714 Ntangu yayi ba-Juif yayi me kuzwa bamvula tatu mpe ndambu yina ba silaka bawu. Bantu yikwa zaba yawu? Makumi sambwadi ya basabala silamaka. Ya ke tuba, “Mesiya ke kwiza mpe ke zenga na kati-kati.” Klisto longaka bamvula tatu mpe ndambu, ba kufwaka Yandi na bamvula tatu mpe ndambu kaka, bamvula tatu mpe bangonda sambwadi Yandi longaka.

715 Mpe na yina yimbi yina ke salaka mpasi, mosquée ya Omar kutulamaka na Ntoto ya Santu; mutindu Nzambi tubaka, nkama makumi zole na tanu ya bamvula ntete ya salama, ya ke vwanda ya kutelama kuna. Profete kumonaka yawu, mpe monaka yawu,

mpe tubaka, “Bawu ke. . .Bantu ya makanda ke vwanda na kuyala kuna tii kilumbu ya Bantu ya makanda ke manisa.”

⁷¹⁶ Ntangu yayi ya kele dyaka na bamvula tatu mpe ndambu yina ba silaka. Kana beno ke tala, bambangi yayi ya Apocalypse 11 ke pesa profesi funda mosi, bankama zole mpe makumi sambanu ya bilumbu; bamvula tatu mpe ndambu kaka. Ntangu yayi. . .mpe bawu vwandaka ya kulwata basaki. Ntangu yayi, beno tala mbote kisalu ya bawu, yina bawu kele. Ntangu yayi, ba me kufwa bambangi zole yayi.

⁷¹⁷ Ntangu yayi, . . .Bawu vutukaka na ba-Juif na manima ya Enlevement ya Dibuundu ya Bantu ya makanda. Dibuundu ya Bantu ya makanda me kwenda na Yinzo samu na Kudya ya Makwela, mpe mutindu ba kotisaka Rébecca na yinzo ya Abraham na Isaac mpe kuna kwelanaka. Mpe Rébecca mpe Isaac kubasikaka ya muvimba ya kuyala na nyonso yina vwandaka ya Abraham, yawu nyonso kwendaka na Isaac. Kieleka! Mpe ya zolaka kwiza ve na Isaac tii ntete Isaac kukwelaka. Oh Alleluia! Beno bawu yayi.

⁷¹⁸ Mpe Klisto kumaka. . . Nzambi zingaka na nzutu yango ya kulunga, yina ba bebisaka ya muvimba kukondwa nsuka mpe tii Seko. Ntangu Dimeme mpe Kento ya makwela ke kwelana na Mazulu, kento ke belama ya muvimba ya kuyala. Kieleka! Isaac mpe Rébecca me belama ya muvimba ya kuyala.

⁷¹⁹ Mpe na yina nkinzi yayi ke na kulandila na Mazulu, ya Kento ya makwela, Kento ya makwela ya Bantu ya makanda na kuvwandaka ya kukwela na Mwana ya ntinu ya bakala (Mwana ya Nzambi), na Nkembo; na yina bawu ke na kukwelanaka, ya kele na bamvula tatu mpe ndambu yina ke salama na yina. . . Moïse mpe Élie. . .

⁷²⁰ Na yina, Moïse ata mbala mosi ve vwandaka ve. . .ve, ba bakaka nzutu ya yandi. Bawanzio bakaka yandi, yandi bolaka ve, yandi polaka ve. Yandi vwandaka kifwanusu ya kulunga ya Klisto. Yandi kufwaka mpe Bawanzio nataka yandi, mpe dyabulu mpe zaba ve kisika ba zikaka yandi, mpe yandi mekaka na kuswana na Michel mfumu ya Bawanzio na yina me tala luzikulu ya yandi. Ya kele yina Biblia me tuba. Nzambi bakaka yandi na Enlevement.

⁷²¹ Mpe Élie, na yina yandi vwandaka tambula kuna, profete ya Nzambi, yandi kulumukaka na Jourdain, katulaka kazaka ya yandi mpe bulaka bamaza, mpe yawu kabukaka na lweka ya bakala mpe ya kento. Yandi mataka mongo. Élisée tubaka. . . Yandi tubaka, “Samu na yinki nge ke na kulandaka munu?”

⁷²² Yandi tubaka, “Mu zola bambala zole dikabu ya Mpeve ya nge.”

⁷²³ Yandi tubaka, “Nge me lomba kima ya mpasi, kasi kana nge mona munu ntangu mu ke kwenda.” Yandi kangaka meso ya yandi na zulu ya yandi.

724 Mpe na manima ya mwa ntangu fyoti, kuna me katuka na Mazulu kipusu ya tiya mpe Bawanzio ya tiya, bampunda ya tiya, mpe Élie mataka na yawu mpe kwendaka na Nkembo. Yandi ata mbala mosi ve kumekaka lufwa, ba bakaka yandi, yandi fwana kufwa!

725 Mpe kana beno ke tala mbote baprofete zole yayi ya Apocalypse 11, bawu ke sala kima mutindu kaka mosi na yina Moise mpe Élie salaka. Beno ke tuba, “Mpangi Branham, nge zola kutuba na munu ti Élie mpe Moise kele dyaka moyo?” Kieleka!

726 Mbote, ntete Mongo ya Nsobolo. . . Na Mongo ya Nsobolo, ntete Yesu kwenda na Calvaire, kuna telamaka bawu nyonso zole Moise mpe Élie vwandaka ya kutelama kuna vwandaka zonza na Yandi. Kieleka, bawu vwandaka, bawu kele ve ya kufwa. Mpe bawu kufwaka ata mbala mosi ve; bawu kele bantu ke kufwa, bawu fwana kufwa. Na yawu bawu kele kaka na kitezo ya nkembo ke na kuvungilaka ntangu yango.

727 Mpe kuna na yina bawu ke vutuka mpe ke longi kaka bamvula tatu mpe ndambu na yisi ya kupakulama ya Mbotika ya Mpeve-Santu, na yina balusakumunu ke katukila Bantu ya makanda (mpe ba me baka Dibuundu); mpe dibuundu ya madidi, ya misiku ba ke na kulanda bawu mutindu bayimbwa, na ba-partis communiste mpe ya Rome, mpe ntangu ba ke na kulanda bawu mpe kufwa bawu. Kuna ba ke kufwa bawu—bawu; baprofete yayi ke longi bamvula tatu mpe ndambu, mpe Biblia ke tuba ti ba kufwaka bawu na ya nene. . . na bala-bala, yina ba ke bokila na kimpeve, Sodome mpe Égypte, kisika ba komaka Mfumu ya beto. Ya kele kuna na Jérusalem; beno me mona, kuna na Jérusalem, na mutindu ya kubokila na kimpeve.

728 Mpe bawu ke lala na bala-bala bilumbu mpe bankokila tatu. Mpe na manima na nsuka ya bilumbu tatu mpe ndambu, mpeve ya luzingu ke kota na kati ya bawu mpe bawu ke vumbuka. Bawu zola kufwa mutindu bantu yankaka yina ke kufwa, bawu zolaka sala yawu. Mpe na yina bawu kufwaka milongi zole yayi. . .

729 Bawu longaka na kuteleinaka yimbi, mpe bawu kulumusaka tiya na mazulu. Nani salaka yawu? Beno me mona? Bawu kulumusaka bampasi na mazulu, mpe bulaka ntoto na nswalu nyonso mutindu. . . mpe na ntangu nyonso bawu zolaka. Mpe bawu kulumusaka tiya na mazulu. Mpe bawu kangaka mazulu na kunoka, ntangu nyonso yina bawu vwandaka zola. Nani ya vwandaka? Kieleka Moise mpe Élie. Mpe beno tala bambangi yango zole.

730 Mpe na yina bawu kwamisaka dibuundu, to yinza, na kulonga ya bawu; mpe bawu yambaka dyaka ba-Juif, mpe vutulaka bawu na kubalula ntima, na kuvutulaka bawu na kukwikila. . . Ntangu bawu ke mona Yesu kukwiza samu na Kento ya makwela, bawu ke tuba, “Beno tala, yayi kele Nzambi

ya beto Yina beto vwandaka vingila. Ya kele Yandi!” Kasi Yandi ke kwiza ve samu na bawu; Yandi ke kwiza samu na Kento ya Yandi ya makwela. Mpe Kento ya Yandi ya makwela . . .

⁷³¹ Ntangu Joseph kotaka na Égypte, yandi bakaka ve bampangi ya yandi na yandi, kasi yandi kuzwaka kento ya yandi ya makwela kuna. Kieleka! Kasi ntangu yandi zabanaka yandi mosi na bampangi ya yandi, ya vwandaka ve na muntu kuna. Ya kele kaka kieleka. Mpe ntangu Yandi ke zabana na ba-Juif yayi, bawu ke vwanda na muntu ve kuna kasi ba-Juif. Ya kele bawu yina kufwaka Joseph, bawu ya kutelama kuna; mpe yandi tubaka, “Mbote, mu kele Joseph, mpangi ya beno ya bakala.” Mpe yandi dilaka.

⁷³² Mpe bawu tubaka, “Ntangu yayi beto ke zaba yawu, samu ti beto kufwaka yandi.”

⁷³³ Kima mosi, ba-Juif yango ke kuzwa ntangu yango ya nene ya mpasi kaka ntete nkwezulu ntangu yayi, ya kutalisa mpasi yina ke vutula bawu na ntoto ya bawu. Ya ke basisa bawu mutindu nkonga ya mameme yina ba ke vutula na Mongo ya Carmel kuna.

⁷³⁴ Ntangu Mfumu Yesu ke kwiza samu na Kento ya Yandi ya makwela, mpe bawu ke mona Yandi, bawu ke tuba, “Beno tala Yandi yina beto vwandaka vingila, Yandi yayi!” Yandi ke vumbuka na kubeluka na mapapu ya Yandi. Ya kel kieleka.

⁷³⁵ Mpe dibuundu, bayina ke bikana ya ba-Juif, ntangu bawu na nsuka ke kufwa bapofete zole yayi, mpe bawu ke lala na bala-bala mutindu ba ke bokila na kimpeve Sodome mpe Égypte, kisika ba komaka Mfumu ya beto, bawu ke fidisa makabu mosi na yankaka (yinja ke sala).

⁷³⁶ Ntangu yayi, Mpangi Palmer, nge yandi yayi. Tala na manima na disolo ya Rome mpe nge ke tala ti ya kele kaka na yinsi mosi na yinja nyonso yina fidisaka makabu na manima ya mvita, ya kele kimfumu ya Rome.

⁷³⁷ Ya kele samu na yina mu ke tubaka ti mbeni ya Klisto ke basikila na Rome. Kibulu ke basikila na Rome, ya lenda basikila ve na Moscou. Ya ke katuka na Rome, dalago ya mbwaki yina telamaka na ntuala ya kento samu na kufwa Mwana ya yandi ntangu Yandi zolaka butuka. Dyabulu yango, wapi kisika dyabulu yango vwandaka? Ya vwandaka nani? César Auguste yina fidisaka mpe ba kufwa bana ya bamvula zole tii na yisi. Dalago ya mbwaki, dalago, *kibulu* zola kutuba “ngolo.” Ngolo ya Rome talisaka mpasi mpe mekaka na kuzwa Mwana yango Klisto.

⁷³⁸ Mpe kima yango mosi! Ntangu nyonso yina bantu ya Rome, bantu ya ntama ya mimpani ya Rome vwanda kuzwa kununga ya nene, bawu vwanda fidisa matadi ya mpembe mpe nyonso na mosi na yankaka, mutindu makabu mutindu yina, mutindu balubambuku. Na yawu matadi yango yina vwandaka . . . Yina ya vwandaka, vwandaka makabu ya fyoti yina ba vwanda fidisa

na kati-kati ya dibuundu ya Rome. Kieleka! Kieleka. Ya fwana vwanda.

739 Mu telamaka kaka kuna na Mbanza ya Vatican mpe talaka yawu mbote na Biblia. Pape ya kulwata yimpu na bitezo tatu, *Vicarivs Filii Dei*, bima nyonso yango yina mu kuwaka mpe nyonso yankaka yina, ya kele kaka kieleka; nkonga ya misambidi yina ke twadisa konso yinsi na yisi ya Mazulu, mpe ya ke sala yawu. Kuna ya kele, ya kele mutindu yina.

740 Mu kele na dyambu ve na bantu ya Katolika (ve, tata), bawu kele kaka mbote mutindu muntu nyonso yankaka, kasi nsambulu ya bawu kele yimbi landila Biblia yayi. Kana Biblia yayi kele kieleka, bawu kele na foti. Bawu ke tuba bawu ve. . . “Ya ke sala kima ve yina Biblia ke tuba, ya kele yina dibuundu ke tuba.” Beto ke kwikila ti Bibila ke zonga na lutumu ya nene! Kieleka, ya kele Ndinga ya Nzambi.

741 Na yawu beno ke momna kuna, matadi yayi yina ba fidisaka kuna, na Apocalypse awa, ya kele matadi yina vwandaka makabu yina ba fidisaka na mosi na yankaka. Yina ke kwenda kaka na kulakisa. . . Biblia ke tuba, Apocalypse awa, ke tuba, “Ti yandi yina kele na ndwenga tanga balutangu ya kibulu. Ti yandi yina kele na ndwenga kusala *yayi-mpe-yayi*. Ti yandi yina kele na mpeve ya mwa makabu kusala *yayi-mpe-yayi*.” Beno me mona mutindu dibuundu kele ntama?

742 Ntwenya ya bakala me yufula munu na suka yayi na yina me tala makabu ya kimpeve, na yina me tala kuzonza na bandinga. Ntwenya ya bakala, kieleka ya kusungama, mu banza yandi ke vwanda mulongi mosi ya bilumbu yayi. Mpe na yina me tala dibuundu, mu tubaka, “Ya kele na mingi ya yawu yina kele nsuni. Beto zola yawu ve, kasi beto zola kima mosi ya kieleka. Beto ke zola kuzwa yawu.”

743 Beno lenda kwenda ve na kulonga yawu na dibuundu; kima ya ntete beno zaba, beno ke kuzwa, mosi kele na ndinga, mosi kele na nkunga, na manima beno fwana nwana na kubasisa kima mosi. Kasi ntangu Nzambi me pesa dikabu ya kimpwanza, ya ke talana yawu mosi. Ya kele kieleka. Beno me mona, ya kele makabu ya Nzambi, ya kele yina Yandi ke fidisaka na Dibundu samu na kununga.

744 Ntangu yayi, mbeni ya Klisto kele na kima mutindu yayi mpe yayi ve, ya kele na mutindu ya kubeba na kusala yawu. Mpe ya kele kimfumu ya Rome yina ke fidisa makabu na mosi na yankaka, makabu ya bima. Nzambi ke fidisaka makabu na minungi; Rome ke fidisa makabu ya bima na mosi na yankaka.

745 Beto ke kwikila Mpeve-Santu kele Mpeve, beto ke yamba Yawu na nzila ya mbotika yina ke katuka na Zulu.

746 Dibundu ya Katolika ke longa, “Kominyo ya santu yina kele nzutu ya Klisto; ti ntangu beno ke kuzwa dimpa yayi mpe ya

kasher, ya *kele* Mpeve-Santu, Mpeve-Santu, kominyo ya santu.”
Beno me mona?

⁷⁴⁷ Beto ke kwikila ti ya kele kitini ya dimpa, beto ke kwikila ve ti ya kele nzutu ya Klisto, (beto ke na kubongisaka samu na kubaka yawu na baminuti fyoti). Beto ke kwikila ti ya ke monikisa nzutu ya Klisto. Kasi ya kele ve . . .

⁷⁴⁸ Ya kele luswaswanu yina kele na kati-kati ya malongi ya Katolika mpe ya Misyoni. Beno me mona? Dibuundu ya Katolika ke tuba, “Nzutu kele . . . Dimpa *kele* nzutu ya nsuni. Dibuundu kele na ngolo ya kubalula yayi.” Beno me monaka ntete muntu ya Katolika kuluta na ntuala ya dibuundu, kukulumusa yintu ya yandi, kusala kidimbu ya kulunsi? Mpe samu ti nsembo yango ya fyoti ke na kupela na dibuundu kuna na yisi ya mwa tabernacle yina. Ya kele na nsembo ya fyoti na kati kuna, mpe dimpa yango ya kasher kele na kati kuna. “Mpe yina kele nzutu ya Klisto. Mpe na yina beno ke baka yawu, kieleka beno ke na kubakaka nzutu ya nsuni ya Klisto na kominyo ya beno ya ntete mpe na bakundima ya beno mpe nyonso yankaka yina. Beno ke na kubaka, na nsuni, nzutu ya Klisto.”

⁷⁴⁹ Beto ke tuba ti ya ke *monikisa* nzutu ya Klisto, beno me mona, yina ya kele kima ve na yinza kasi kitini ya dimpa. Mpe ata kana ya vwandaka mpe ve dimpa, kana ya vwandaka kima yankaka, ya zolaka monikisa kaka mutindu mosi. Kaka—kaka kieleka. Ata bawu . . .

⁷⁵⁰ Mutindu bantu yayi yina ke tubaka, “Mu zola ve kuvwanda ya kubotika na kiziba ya maza, mu zola kuvwanda ya kubotika na nzadi.”

⁷⁵¹ Wapi luswaswanu ya ke sala, kana beno ke botama? Kana ya kele na kiziba ya maza, mpe . . . Mbote, ba botikaka Philippe na kiziba ya maza . . . ntangu kalaka ya nene kuzwaka mbotika. Ntangu Philippe botikaka kalaka ya nene na kizinga ya maza, Mpeve-Santu zangulaka yandi mingi ti Yandi nataka Philippe ntama, ba monaka yandi ve bankama tatu ya bakilometele. Yandi nataka yandi na Mpeve, me fidisa yandi kipusu katuka Mazulu samu na kunata yandi bankama tatu ya bakilometele. Amen. Mbote mingi!

Ntangu yayi:

Wapi kisika ke vwanda basantu na manima ya funda ya bamvula ya ntangu? Mpe wapi mutindu ya nzutu ke vwanda na bawu? Mu ke vutuka na yawu na mwa ntangu fyoti. [Mpangi Branham me pesa mvutu ya yayi kubanda na nzila ya 820, mutindu kyuvu 74—Mu.] Bawu ke vwanda na Yesu.

⁷⁵² Mbote mingi, kyuvu ya sambwadi:

72. Wapi mutindu beto ke fundisa bawanzio?

⁷⁵³ Ya kele na kati . . . Wapi mutindu beto ke fundisa bawanzio? Na kuvwandaka bana ya babakala mpe bana ya bakento ya

Nzambi. Bawanzio keke bisadi; beto keke bana ya babakala mpe bana ya bakento ya Nzambi. Mpe Biblia ke tuba ti beto ke fundisa bawanzio. Ya keke kieleka. Ntangu yayi, ntangu yayi kana beno . . .

Kyuvu ya 8:

73. Samu na yinki nsuki samu na bawanzio na Ntete ya Corinthiens?

⁷⁵⁴ Ntangu yayi ti muntu mosi kubaka samu na munu Corintheins ya Ntete, kapu ya 11, mpe beto ke mona kuna, ti beno ke mona ti . . . Na Corinthiens ya Ntete, na kapu 11, beto ke tala ti Paul ke na kuzonzaka. Beno bika mu kuma na yawu kaka minuti, mpe na manima beto ke tanga kaka yawu na nswalu mpe kuna beto ke—beto ke kuzwa yawu.

⁷⁵⁵ Mu keke na kima ya kutuba na zulu ya nzila yankaka yayi awa, samu ti mu banza Mfumu ke pesa beto yawu mutindu beto fwana kuzwa yawu. Kana muntu kuzwa yawu . . . mu banza ya keke kapu ya 11, inga, mbote mingi. Ntangu yayi beno kuwa mbote, kieleka mbote ntangu yayi, samu ti beno ke bakula. Ntangu yayi beno baka konsiansi ya beno nyonso mpe beno tula yawu na posi ya kazaka ya beno tii na manima mu me tanga yayi, beno me mona, tii mu ke pesa mulabu na zulu ya Yawu. Beno kuwa kieleka mbote, yayi keke MUTINDU ME TUBA MFUMU:

Beno vwanda bilandi ya munu, mutindu mosi . . . mu keke ya Klisto. (Paul ke tuba, “Beno landa munu, kaka mutindu mu ke landa Klisto.”)

Ntangu yayi mu ke pesa beno lukumu, bampangi, samu ti beno ke na kubambuka moyo na munu na bima nyonso, mpe ke na kuzitisaka ya balutumumu, mutindu mu pesaka . . . na beno.

Kasi mu ke zola beno kuzaba, ti yintu ya bakala nyonso keke Klisto; mpe yintu ya kento keke bakala; mpe yintu ya Klisto keke Nzambi.

⁷⁵⁶ Beno me mona mutindu ya keke? Nzambi, Klisto, bakala, kento. Ntangu yayi:

Bakala nyonso yina ke sambila to ke pesa profesu, na yintu ya kufuka, ke vvenzaka Klisto.

Kasi kento nyonso yina ke sambilaka to ke pesaka profesu na yintu ya kufuka ve ke vvenzaka yintu ya yandi: . . .

⁷⁵⁷ Ntangu yayi beto ke baka kaka minuti, mpe ke lakisa beno ti nsuki samu na kento keke vwale ya yandi:

. . . samu ti nyonso yina . . . mutindu kana yandi wandaka na bansuki ya kuzenga. (Ya ke zola kutuba ti kana—kana yandi ke zola kuzenga nsuki ya yandi, kuna yandi katula yawu.)

Samu ti kana kento vwanda ve ya kufuka, ti yandi vwanda mpe ya kukatula bansuki: (kukatula zola kutuba kuzenga, beno me mona). . . kasi kana ya kele nsoni samu na kento na kuvwanda na bansuki ya kukatula to bansuki ya kuzenga, ti yandi vwanda ya kufuka.

758 Ntangu yayi beto ke na kukumaka kaka na yisi na kyuvu awa yina beno yufulaka. Beno me mona? Mbote mingi, ntangu yayi ya kele yimbi samu na mama na kuzenga nsuki ya yandi, landila na Biblia. Ntangu yayi beno kuwa kaka awa mpe beno mona kana Biblia ke pesa ve muswa na bakala na kukatula na makwela kento ya yandi kana yandi zenga nsuki ya yandi, beno mona kana yayi kele kieleka to ve.

Kana bakala . . . Samu ti kieleka bakala fwana fuka ve yintu ya yandi (ya kele, kuvwanda na nsuki ya yinda), kieleka yandi kele na kizizi mpe nkembo ya Nzambi: kasi kento kele na nkembo ya bakala. (Benno me banzaka ntete na yawu?)

759 Ntangu yayi mu zola kutelama awa, samu ti mu zola yayi kukota kieleka mbote, beno me mona. Mpe ntangu yayi beno bambuka moyo, mu me monaka makumi ya mafunda ya bakento ya luzolo (bayina mu zaba ntangu yayi kaka, mpe mingi ya bawu kele ya kuvwanda na kati ya dibuundu yayi) bayina kele na nsuki ya nkufi, ba kele Miklisto. Mpe yina mu ke tula kizitu kele beno ve, ya kele mutindu ba longaka beno. Beno me mona? Ya kele yawu. Mulongi ya beno kutubaka yayi na beno ve. Kasi kana mosi ya bakento awa na tabernacle vwanda mutindu yina, na yina bawu zaba dyambu. Beno me mona, samu ti kieleka beto ke tubilaka bawu yawu.

760 Ntangu yayi, ntangu yayi beno tala yayi mbote:

. . . bakala . . . Samu ti . . . (nzila ya 7) . . . Samu ti bakala . . .

761 Ntangu yayi, nani ke na kuzonzaka awa? Ntangu yayi, ya ke sala ti mama mosi kutuba, “Oh, Paul vwandaka kiboba yina vwandaka yinaka bakento.”

762 Mbote, ntangu yayi na yina beto kele na yawu, beto luta kaka awa na Galates 1:8, mpe kumona yina Paul tubaka na yina me tala yayi, beno me mona, na Galates 1:8. Beno ke tala ti Paul tubaka awa na Galates 1:8:

. . . kana beto, to wanzio yina me katuka na mazulu, kulonga nsangu mosi ya mbote yankaka na yayi yina beno kuwaka, ti yandi vwanda ya kusingama.

763 Ntangu yayi beno fundisa munu ve, beno fundisa Yandi, beno me mona.

Samu ti kieleka bakala fwana fuka ve yintu ya yandi, kieleka yandi kele na nkembo mpe kizizi ya Nzambi: kasi kento kele na nkembo mpe kizizi ya bakala.

764 Ntangu yayi beno tala mbote nzila yina ke landa:

Samu ti bakala kele ve ya kento; kasi kento kele ya bakala.

To dyaka bakala vangamaka samu na kento; kasi kento vangamaka samu na bakala.

765 Ntangu yayi, mu ke zola kutuba yayi ntangu yayi na luzolo mpe lembami nyonso, mpe mu ke banza ti beno ke bakula yawu mutindu mosi mu ke tuba yayi. Kasi Amerika . . . Munu na kuvwandaka yina ke zyetaka na bayinsi, Amerika kele na mosi ya misiku ya mawa, yina ke katula buzitu na bakento ya bawu na kati ya bayinsi nyonso na yinza. Paris, na France lendaka vwanda gratte-ciel na lweka na mutindu Amerika ke bikaka bakento ya bawu kusala. Ya kele nsoni!

766 Beno zaba ti nzambi ya Amerika kele kento? Mu lenda monisa yawu na beno na nzila ya Biblia yayi. Ya kele kieleka. Beno zaba ti ya zolaka salama mutindu yina samu dibuundu ya Katolika kuzwa lenda ya kukotisa malongi ya bawu ya Mwense Marie?

767 Ntangu yayi, kana ba salaka ve kento samu na bakala, ve . . . Kana ba salaka ve bakala samu na kento, kasi ba salaka kento samu na bakala, na yina wapi mutindu beno ke kwenda sambila kento? Beno me mona? Ntangu yayi, yinki salaka yawu, ya bandaka na Paris mpe sukaka na Hollywood. Ntangu yayi Paris fwana kwiza na Hollywood na kuzwa ba-modèle ya bawu mpe kuzwa mode ya bawu mpe nyonso, ya kele kukatula buzitu na bakento ya beto ya Amérique.

768 Yinki ya kele? Yinsi ya beto me kuma yisi mingi tii bawu me katula bisalu na babakala, mpe me tula bakento awa na bisika yayi, tii pene, ya makumi yivwa na zulu ya nkama ya bawu, kele bandumba. Mpe samu na kuzonzila samu na babakala na yina yimeni, kieleka, ya kele samu ti ba me tula bakento kuna na bisalu ya bawu. Mpe bawu me kuma yisi mingi tii bawu me tula bakento mutindu bapulusu ya ngemba na bala-bala. Ya kele nsoni samu na yinsi nyonso! Yinga, tata. Yinki beno ke sala samu na yawu?

769 “Yinki nge ke sala samu na yawu, Mpangi Branham?” Mu fwana zitisa yawu, mu kele muntu ya Amerika, mu ke sala yina mfumu ya nene ke tuba na kusala. Kana mu . . . Kana—kana dibuta kuzimbisa buzitu ya yawu samu na dibuta (bana kuzimbisa buzitu na bibuti), dibuta yina ke kabuka na bitini-bitini. Kana—kana dibuundu kuzimbisa buzitu na pasteur ya yandi, na yina dibuundu yango me kufwa. Mpe kana yinsi kuzimbisa buzitu ya bawu na yinzo ya lusambusu ya nene mpe na lukanu ya yawu, yinsi yango ke kufwa na bitini-bitini. Ya kele

kaka kieleka. Beto fwana zitisa bima yango samu ti bawu kele bamfumu ya nene, beno me mona. Kasi ya kele ve ya kulunga na mbandukulu. Kieleka!

⁷⁷⁰ Beno zaba ti muntu na Biblia . . . na Genèse, kapu ya 1te, ntangu Nzambi vangaka kento mpe—mpe bakala, mpe salaka bakala mpe kento, mpe Nzambi tubaka na Ève ti “bakala ya nge ke yala na zulu ya nge, ke vwanda mfumu ya nge”? Beno zonza yawu na Amerika mpe beno mona kisika ya ke nata beno! Bakala, ya kele yawu ve, kento ke yalaka na zulu ya bakala; bawu fwana sala yawu, ba ke yidika bisika ya luyalu . . .

⁷⁷¹ Kana mu lendaka, mu zolaka nata bakento, bayina kwizaka na bilo ya munu kuna, bambala kumi na zole, bakento ya mbote . . . Mu ke tuba ve ti bantangu yankaka bakento nyonso zolaka sala ve; ya lendaka vwanda ti bawu kele na bakala to dyambu, mpe bawu fwana sala. Kasi kana bawu kele ya kukwika ve, bawu zolaka sala yawu ve. Kisika ya bawu kele na yinzo, na château ya bawu ya fyoti, ya kele kieleka kisika bawu fwana vwanda.

⁷⁷² Mpe bakento ya beto ya Amerika me kuzwa bweso ya kimpwanza to kufwa. Mpe na bibulu nyonso mpe nyonso yankaka, ntangu kima yango ke yalaka, ya ke baka kisika mpe ya ke katula buzitu ya bantu nyonso ya yawu.

⁷⁷³ Ya kele na ndeke mosi ya fyoti na Afrika, mpe yandi kele mwa ndeke ke yuluka.

⁷⁷⁴ Ntangu yayi, na nene, kento ntangu nyonso ke vwandaka ya kulutila yimbi na bawu nyonso zole. Bakala ntangu nyonso kele ya kulutila kitoko, mbambi ya bakala, wapiti ya bakala, faisana ya bakala, nsusu ya bakala, mpe ntangu nyonso ya kele yina ke lutilaka . . . Samu ti, ya kento kele ndeke ya yinzo. Yandi ke vwandaka na dizamba, yandi ke sansaka bana ya yandi. Yandi kele ya kubumbama na faucon, na nyoka, na coyote, na nyonso yankaka, beno me mona, samu na kusansa bana ya yandi.

⁷⁷⁵ Kasi na kati ya nkonga kisika yina . . . to na kinkonga yina—yina—yina kento, to bakento, ke lutilaka kitoko, ya kele ntangu nyonso kubwa. Na Afrika, beno baka ndeke . . . Ya kele na ndeke mosi ya fyoti kuna, mpe mosi yina kaka na bantoto yina mu zaba, yina kento kele mingi kitoko kulutila bakala. Mpe na ntangu ya ke vwanda . . . Ndeke yango—yango kele ndumba ya ntangu nyonso. Yandi ke kwenda bisika nyonso mpe samu na kuzwa bakala, mpe ke basika mpe ke buta meki mingi na manima ya kubasika na mosi, mpe ke bika bakala kuvwanda na zulu ya meki na yina yandi ke kwenda mpe ke sosa bakala ya yankaka. Ya kele kaka kieleka. Beno me mona? Beno me mona yina mu zola kutuba?

⁷⁷⁶ Mpe, ntangu yayi beno tala, na Amerika bubu yayi, bakento ya beto. Ntwenya mosi ya bakala ya Kentucky tubaka na munu, bilumbu fyoti me luta, ti ya vwandaka na bankama nana ya

bakento yina vwandaka sala na kompani mosi awa na Kentucky. Mpe yandi tubaka, “Mu lenda zenga ndefi kukondwa boma ti bankama yiya ya bawu kele kieleka bandumba na bala-bala, mpe bakento ya kukwela na bana.” Bakala mosi basisaka kento ya yandi kuna mpe bulaka yandi na dibaya, mpe kuna yandi zola kufwa yandi. Mpe mosi yankaka kwenda kubula bakala mosi. Mpe mosi yankaka nwanaka mpe kotisaka bambele. Ya zolaka vwanda ve. Ya kele mbote ve.

777 Beno vutula kento na kikuku na kisika ya yandi, kuna nyonso ke vwanda mbote mingi. Kasi kana beno tula yandi na ngaanda kuna na kisalulu ya luyalu, yandi ke kufwa. Kiele- . . . Mu ke zonza yawu ve . . .

778 Bakento ya Amerika ke seka na kutelemisaka mbombo ya bawu mpe ke tuba, “Ya kele ve na kima mosi na Yawu.” Mpe, “Lakisa munu.” Kieleka, beno fwana sala yawu, samu ti Biblia tubaka na ntuala ti beno zolaka sala yawu. Beno fwana sala yawu.

779 Mpe awa ntangu . . . Ya vwanda vwanda, ntama mingi me luta, na dibuundu ya ba-Méthodiste, kana kento zenga nsuki ya yandi, ba vwanda tula yandi na ngaanda ya dibuundu. Kieleka, bawu vwandaka sala yawu. Kieleka, yinga. Ba-Nazaréen, ba-Pèlerin ya sainteté, bantu ya Pantekote, bawu nyonso vwanda salaka yawu. Yinki me salama?

780 Beno zaba samu na yinki? Beno kele na babakala mutindu bakento na manima ya chaire. Ya kele kieleka mbote. Muntu ke na boma ya dimpa ya bawu . . . ke na boma ti ba ke tula bawu na ngaanda, ke basisa bawu na dibuundu. Bawu kuzwaka ve kikesa ya kieleka samu na kutelama, na kutelama na Ndinga ya Nzambi ata kana Yawu ke sala mpasi to kana Yawu ke sala ve. Ya kele kaka kieleka.

781 Beno kuwa awa, bakala kele mfumu. Beno banza ve ti beno ke twadisa yinzo. Beno kele ve mfumu ya yinzo. Beno kele kieleka . . . Beno kele ve mpika awa, kasi beno kele kisadisi. Mpe Adam . . . Bakala ke yala na zulu ya kento ya yandi, mpe yandi mosi kele na kizitu na kento ya yandi. Nzambi ke salaka bakala kupesa mvutu samu na kento ya yandi. Ntangu yayi, beto tanga mpe beto mona kana Nzambi ke tubaka yawu awa.

Samu ti kieleka bakala fwana fuka ve yintu ya yandi, kieleka yandi kele na kizizi mpe nkembo ya Nzambi: . . .

782 Nzambi kele ve kento, Nzambi kele Bakala. Beno zaba ntangu bawu ke salaka mwense Marie mpe nyonso yina, mpe kusa- . . . to balombilu mpe nyonso mutindu yina, mpe kusambila mwense Marie, beno zaba na yinki ya ke bambusa munu moyo? Na nzambi ya kento ya nene Diane, yina Paul sembaka mpe basisaka. Ya kele kieleka. Yandi tubaka, “Oh, Nzambi kele ve kento!”

783 Ditadi mosi kubwaka na bilanga, mpe bawu tubaka ti nzambi yango ya kento me losa kizizi ya yandi, ya kele samu na yina bakento na Corinthe, mpe na zulu na kati kuna, . . . bayina vwanda sambilaka Diane, bawu vwanda zola kukuma milongi.

784 Bawu tubaka, “Kasi, mpeve tubaka ti beto lenda longa.”

785 Yandi tubaka, “Yinki? Ndinga ya Nzambi basikaka na beno, mpe ya kwizaka kaka na beno? Kana muntu ke banza ti yandi kele ya kimpeve to profete, ti yandi zaba ti yina mu me tuba kele misiku ya Mfumu: ti kento vwanda swi mpe yandi vwanda na yisi ya balutumu na dibuundu, ve samu na kulonga to samu na kuzwa lutumu mosi.” Ya kele kieleka! Ya kele yina Masonuku ke tuba. Beno me mona? Mpe Nzambi ke sala nkonga ya milongi kupesa mvutu samu na yawu na Kilumbu ya Lusambusu.

786 Mbote, beno kuwa! Beno ke tuba, “Mbote, mu ke tuba na beno, ba tubilaka munu yawu.” Beno zaba mbote ntangu yayi! Ya kele kieleka. Kana beno to muntu kubanda na kubaka nkisi, mpe muntu tuba na beno ya kele arsenic, mpe beno—mpe beno kulandila mpe kubaka yawu na mutindu nyonso, ya kele foti ya beno mosi na manima ya yawu. Beno me mona?

787 Ntangu yayi beno kuwa yayi:

Samu ti bakala kele ve ya kento; kasi kento ya bakala.

Samu na dyambu yayi kento fwana kuzwa ngolo na zulu ya yintu ya yandi samu na bawanzio.

788 Mosi na mosi ya beno ke na kutangaka yawu? Corinthe, ya Ntete kapu 11, mpe nzila ya 10. Kana beno tala, “ngolo,” (Samu na yinki?) “samu na bawanzio,” Ntete ya Corinthe, samu ti bawanzio kele babakala, minati nsangu. Beno tala, ya kele “w” ya fyoti dyaka. Kisika ya ke tala Bawanzio, Bawanzio ya Mazulu, ya kele “B” ya nene, “B” ya nene. Kisika ya kele “w” ya fyoti, ya kele bantu bawanzio.

Na yina dyaka bakala kele kuna . . . to kento, . . . dyaka kento kele kukondwa bakala—bakala, na Mfumu.

Samu ti mutindu kento kele ya bakala, mutindu mosi bakala mpe kele na nzila ya kento; . . . bima nyonso kele ya Nzambi.

Beno tala . . . beno mosi: ya kele ya kulunga samu kento sambila Nzambi (na nsuki ya nkufi) kukondwa kufuka yintu? (beno banza na yawu ntangu yayi)

789 Ntangu yayi beno tala mbote:

Keti Yinza yawu mosi mpe ke longa beno ve, ti, kana bakala kele na nsuki ya yinda, . . .

790 Beno ke tuba, “Wapi dyambu vwandaka kuna?” Nsuki. Beno ke mona ve yina Paul ke na kuzonzilaka? Nsuki, nsuki ya yinda! Kana . . . Kento fwana vwanda na nsuki ya yinda. Nzila ya 14 ntangu yayi:

Yinza yawu mosi mpe ke longa beno ve, ti, kana bakala keke na nsuki ya yinda, ya keke nsoni na yandi?

791 Beno ke bakala yawu? Ya keke nsoni samu na bakala na kuvwanda na nsuki ya yinda, kasi ken-...ya keke kisika ya kento. Nzambi salaka bakala mutindu yankaka na kento, na kinkonga mpe na nzutu, mpe na nyonso yankaka. Yandi zolaka lwata ve kilele. . .Biblia ke tuba ti “Kana kento lwata pantalo to kilele nyonso ya bakala, ya keke kumona ya kulutila yimbi mpe ya mvindu mpe ya yimbi na ntwala ya Nzambi.” Mpe Nzambi ke sala yandi kufuta samu na yawu. Nani beno ke kuwa? Kasi yayi keke Biblia!

792 Mpe beno ke kwenda bisika nyonso mpe ke tuba, “Oh, mu banza ya keke mbote samu. . .kumona bakento kulwata bapantalo.” Kasi Nzambi salaka bawu mutindu yankaka, Yandi zola bawu kulwata mutindu yankaka.

793 Mpe Biblia ke tuba, “Kana kento ke lwata mpe kilele ya bakala, ya keke ya kulutila yimbi.” Beno zaba yinki *kulutila yimbi* keke? Ya keke “kima yina keke yimbi na meso ya Nzambi.” Mpe Jehovah ya nene Yina ke tala beno na yisi mutindu kima ya yimbi. . . Mpe Biblia ke tuba. . .

794 Mpe beno bayina ke tubaka. . . Bayankaka ya beno bamama ntangu yayi, samu na bana ya beno ya bakento ya bantwenya, ya bamvula kumi na nana, makumi zole, beno ke bika bawu kubasika awa ya kulwata mutindu yandi keke!

795 Mpe beno, mpe, mama! Beno me mona? Ntangu beno ke basika mpe ke lwata bapantalo yango mpe nyonso mpe kuzinga. . .mpe kukwenda na bala-bala, mpe—mpe ke kuzwa bilele yango ya mutindu yina ba ke na kusalaka na bilumbu yayi, mpe ke sala beno kotalana mutindu kima mosi yina beno keke ve. Beno me mona? Mpe beno ke basika na bala-bala kuna beno ke talana nge nyonso sexy, beno lenda vwanda kaka yina zaba dyambu ve mpe ya mpembe na ntwala ya bakala ya beno mpe nyonso, kasi kana beno basika na bala-bala mpe ti bakala tala beno samu ti beno me talana mutindu yina, beno keke ya kuzaba dyambu, mpe ke pesa mvutu na Kilumbu ya Lusambusu na kusalaka pité na konso bakala yina talaka beno mutindu yina. Ya keke yina Biblia ke tuba.

796 Biblia ke tuba, “Muntu nyonso yina ke tala kento samu na kulula yandi, me sala yimeni pité na yandi na ntima ya yandi,” mpe beno keke ya kuzaba dyambu mpe ke. . .

797 Beno ke kwiza na lusambusu mpe beno ke tuba, “Mfumu, Nge zaba ntima ya munu; ata mbala mosi ve mu me salaka pité, mu zingaka kieleka na bakala ya munu.”

798 Kasi awa ke vwanda na bakala mosi, awa ke vwanda na bakala mosi yankaka, awa mosi yankaka, yankaka, yankaka, kumi na tanu, makumi zole, makumi tatu, makumi yiya ya bawu

ke telama kuna ke tuba, “Nge zaba dyambu ya pité!” Samu na yinki? Bakala mosi talaka nge.

⁷⁹⁹ “Mbote, mu kuzwaka kima ve ya kusala na yawu.” Mbote, samu na yinki beno ke talana mutindu yina? Ntangu Nzambi tubaka na beno na kulwata yawu ve, ya vwandaka ya kulutula yimbi na kusala yawu, mpe beno kuwaka na *Nani Zola Suzie?* To yinki ya kele. . .

⁸⁰⁰ Beno zaba yina me salama na bakala ya *Nani Ke Zolaka Suzie?* Beno nyonso monaka yawu awa ntama mingi ve na mukanda. Ntangu beto vwandaka kuna na Casper, na Wyoming, ya basikaka. Mpe yinki kele nkumbu ya yandi? Bakala yina. . . na *Beto Zola Suzie*, to yinki na—yinki na yinza ya vwandaka? . . . Oh, yina ke salaka beno nyonso kuvwanda na yinzo Kilumbu ya tatu na nkokila mpe ke kondwa lukutakanu ya bisambu samu na kutala. Yinki ya kele ntangu yayi? *Beto Zola*. . . Yinki kele nkumbu ya yawu? [Mpangi-kento me tuba, “*Mu Zola Lucy*.”—Mu.] *Mu Zola Lucy*, bakala ya yandi zolaka. . . ke sala nyonso, ba simbaka yandi kuna na Reno, na Nevada, na mwana mosi ya kento ya ndombi, yandi vwandaka zinga na yandi bamvula mingi. Mpe ya kele na yina beno ke vwandaka na yinzo na kutala na kisika ya kukwenda, kuwa Nsangu ya mbote. Kento me funguna yawu. Oh, kyadi! Ya kele ve na kima ya kutsyema na ngaanda ya Yesu Klito!

⁸⁰¹ Ntima ya beno vwanda ya kusakumuna, mpangi ya bakala, mu—mu ke tuba na beno—na beno bakala, bayankaka ya. . . Beno ke tuba, “Oh, la la, beno tala kalasi.” Kieleka bayankaka ya bangoy-ngoy ya kulutula yimbi yina kele na beto, ba-charognard, ba kele bandeke ya kitoko. Beno lenda fundisa ve ndeke na mapapu ya yandi, beno me mona. Na yawu beno bambuka kaka moyo na yawu. Oh, la la!

⁸⁰² Ntangu yayi beno tala mbote:

Yinza yawu mosi mpe. . . (ya kele nzila ya 14 yango). . . ke longa beno ve, ti, ya kele nsoni na bakala na kuvwanda na nsuki ya yinda? (Ya kele samu na kento.)

Kasi kana kento kele na nsuki ya yinda, ya kele nkembo samu na yandi: . . .

⁸⁰³ Ntangu yayi yinki yandi ke na kuzonzila? Yimpu yina beno bantu ya Katolika ke lwataka na yinzo-Nzambi? Kieleka ve! Kifukulu ya fyoti na zulu ya yintu ya beno, na muswale? Yandi ke na kuzonzilaka na nsuki ya beno!

⁸⁰⁴ Ntangu yayi! Mpe kana kento zenga nsuki ya yandi, yandi me zenga nkembo ya yandi, mpe yandi kele na muswa ve na chaire na kusambila. Beno me mona, kaka yina ya me tuba awa, “Ya kele kima ya kulunga samu na kento na kwenda sambila na yintu ya kufuka ve?” Yandi ke tuba awa, ke tuba, “Mbote, yandi fwana zenga nsuki ya yandi.” Na yawu ti yandi katula nsuki ya vwandaka ya kulengula kuna. “Mpe kana yandi ke

katula nsuki na kulengula,” yandi tubaka, “ya kele kukondwa buzitu, ya kele nsoni samu na kento na kusala yawu.” Na manima tubaka, “Yandi fwana vwanda na kifukulu.” Ntangu yayi, mu kaka—mu kaka ke na kutangaka mukanda ya Paul. Beno nyonso, ya me tala beno, beno me mona.

Kasi kana kento kele na nsuki ya yinda, ya kele nkembo samu na yandi: samu ti nsuki ya yandi kele ya kupesama na yandi mutindu kifukulu.

⁸⁰⁵ Ya kele ya kutuba ti ba ke pesa yandi yimpu? Beno bantu ya Katolika to beno ba-Protestant, mosi to yankaka, beno bayina ke kwendaka na dibuundu mpe ke zolaka kulwata yimpu, beno ke tuba, “Mbote, mu ke na kwenda na dibuundu, mu fwana tula yimpu.” Ve, beno fwana bika nsuki ya beno kukula. Beno tala luswaswanu. Beno me mona?

. . . samu ti nsuki ya yandi kele ya kupesama na yandi mutindu kifukulu. (Mpe ya kele nsoni samu na yandi na kukota na dibuundu kukondwa kifukulu, na kukwenda na chaire na kusambila.)

Kasi kana muntu mosi kumona—kumona . . . (Mu banza ve ti mu lenda tanga mpova yango, d-y-am- . . .) . . . dyambu—dyambu (beno zaba yinki dyambu kele), beto kele na ata kifu ya mutindu, to dyaka Dibuundu ya Nzambi.

⁸⁰⁶ Ntangu yayi kana beno zola kuswana samu na yawu, beno swana na Yawu. Mbote mingi, kana beno zola kuvwanda na dyambu na yawu, “Oh, ya ke sala ata luswaswanu. Ti beto bika bawu kukwenda na ntwala. Mbote, mu banza ya kele kima mosi ve. Mu . . . Ya kele ve yina nsuki kele, na mutindu nyonso, ya kele yina ntima kele.” Ya kele kieleka; kana ntima kele mbote, nsuki ke vwanda mbote (Uh-huh).

⁸⁰⁷ Beno kwenda na ntwala, kana beno zola kuvwanda na dyambu, Paul ke tuba, “Beto kele na ata kifu ya mutindu, to dyaka Dibuundu ya Nzambi.” Yandi ke tuba, “Kana beno ke zola kuvwanda na lweka ya Cain, mbote, beno kwenda kaka na ntwala.” Kasi Yayi kele yina Paul vwandaka tuba.

⁸⁰⁸ Oh, mpe mu zola ve kuseka, samu ti ya kele ve dyambu ya kuseka. Kasi mu ke tuba na beno bankundi, ya kele nsoni na kumona mutindu ti ba me pesa muswa na bima yayi na kusalama. Mu . . .

⁸⁰⁹ Beno kuwa! Samu na beno, bampangi ya munu ya bakento ya luzolo, mu zola beno kotalana mbote mpe kuvwanda na mbote, ya kele yina beno fwana vwanda. Ya kele yina beno fwana vwanda. Mpe beno fwana vwanda kitoko mpe mutindu malumu mpe nyonso mutindu beno lenda ntangu bakala ya beno ke kwizaka, kaka mutindu ti yandi vwandaka cheri ya beno. Mpe beno fwana kutana yandi na kielo na kaka—na kaka na bezé ya kitoko samu na yandi mutindu ya vwandaka kilumbu beno

pesaka yandi bézé na chaire samu yandi vwanda bakala ya beno. Ya kele kieleka. Mu ke semba beno ve na kutalanaka mbote mpe na kuvwandaka mbote. Mpe mu zola beno kuvwanda mutindu yina, Nzambi zaba ti mu zola.

⁸¹⁰ Awa mwa bilumbu me luta, mu vwanda zonza na Jack Shuler. Nani me kuwaka na Jack Shuler? Mulongi ya kulutula ya kuzabana yina kele na ba-Méthodiste. Yandi tubaka, “Kento mosi kwizaka mpe tubaka. . . na bansuki nyonso mvindu, mpe vwanda tafuna chewing-gum, mpe vwandaka ndambu ya kulwata, yandi tubaka, ‘Nge zaba, bakala ya munu ke na kulendaka dyaka munu ve.’”

⁸¹¹ Yandi tubaka, “Mu ke semba yandi ve.”

⁸¹² Ya kele kieleka. Ntangu yayi, kasi yina beno fwana sala, beno fwana vwanda na nzila ya mbote. Beno sosa ve bumalu-malu mpe kitoko ya beno na Hollywood, beno sosa yawu na Biblia, na ntuala ya Nzambi. Beno vwanda mama, beno sala mutindu mama, beno lwata mutindu mama, beno vwanda ya kutsyema. Beno sala mutindu mama, beno lwata ve yango. . . .

⁸¹³ Bakala nyonso yina ke bika kento ya yandi kubasika mpe kulwata bima yango ya fyoti na ntuala ya babakala, mpe mutindu ya bima yango ya fyoti. . . kubasika na matiti mpe kuzenga matiti, mpe bima ya mutindu yina, tata, mu ke tuba na beno, mpangi ya bakala! Mu—mu ke zola ve kuvwanda yimbi, mu. . . Nzambi zaba ti ya kele ntima ya munu. Kasi mu fwana. . . Mu fwana soba mingi ntete mu bika ya munu kusala yawu. Mu ke vwanda mfumu na zulu ya mongo kuna ntangu nyonso yina mu lenda, beno me mona; mpe ntangu mu lenda ve, mu ke katuka kuna. Ya kele kieleka.

⁸¹⁴ Oh, mpangi ya bakala, ya kele nsoni mpe kukondwa buzitu samu na bakento na kusala mutindu yina. Mpe mu—mu zola ve kutuba, mpangi ya kento. . . Mu—mu ke na kukululaka beno ve, mu ke na kumekaka kaka na kutuba. . . Dibundu ya beto kele na bamambe ve, bantu ke kwizaka kaka awa. Kasi yayi kele yinzo ya Nzambi, mpe kieleka beto ke tubaka na bantu na kulwata ve bima yango. Ti ya kele. . . beno ke pesa mvutu samu na yawu na Kilumbu ya Lusambusu. Ntangu yayi beno tala mbote awa. Mpe beno bika nsuki ya beno kukula, beno me mona, mpe beno vwanda mama.

⁸¹⁵ Ntangu yayi:

Ntangu yayi na yayi ti kele. . . mu ke tuba na beno mu ke siika beno ve, samu ti beno ke vukanaka samu. . . ve samu na kukuma ya mbote, kasi samu na yimbi.

Samu ti na ntete ya nyonso, ntangu beno ke vukanaka na dibundu, mu kuwaka ti ya kele na bakukabuka na kati-kati ya beno; mpe nyonso yankaka yina, . . . (ya ke landila awa na mesa ya kominyo)

816 Ntangu yayi beno kuwa Yawu. Ya kele samu na yina ti bawanzio . . .

817 Ntangu yayi, Mpangi Palmer, mu ke na kutubaka ve na bande yayi ti nge longa kima mosi kuna yina mu ke na kusalaka awa. Kasi nge zaba mbote-mbote, mpe nge kele mulongi, nge zaba ti ya kele Kieleka, mpangi ya bakala. Mbote mingi.

818 Na yawu *bawanzio* awa kele “bantu.” Kana nge tala yawu, Mpangi Palmer, ya kele na kisono ya fyoti, “bawanzio.” Mpe Biblia ke landila . . . Yandi ke na kuzonzila na bakala mpe kento ya yandi, beno me mona, ya kele yina dyambu kele.

819 Ya kele mutindu yina bantu ke kotaka mingi na poto-poto na Biblia, bawu ke tuba, “Mbote, Nzambi ke tuba kima mosi *awa*, mpe mosi . . .” Ve, beno—beno ke basika na dyambu. Beno vwanda kaka na dyambu yango mosi, kaka yina. Yandi ke na kuzonzila na yina me tala bakala mpe kento.

820 Ntangu yayi kima mosi dyaka mu zola kubaka kaka ntete beto sukisa, ya ke baka munu pene ya baminuti zole:

74. Wapi kisika ke vwanda basantu na manima ya funda mosi ya bamvula ya ntangu? Mpe wapi mutindu ya nzutu ke vwanda na bawu?

821 Mu banza ti ya kele kyuvu ya kulutila mbote, mu zola kaka yawu. Ntangu yayi beto tala kaka na yawu mbala mosi.

822 Na mbandukulu, Nzambi . . . Beto ke vutuka na malongi ya beto ya Hébreux kaka samu na baminuti fyoti. Nzambi vwandaka yinto yayi ya nene, ya yinda ya bantinta sambwadi. Bantu yikwa zaba yawu? Beno me mona? Mpe bantu yikwa zaba ti Nzambi ke na Bampeve sambwadi? Kieleka, Bampeve sambwadi. Mpe mwana - dimeme vwandaka na meso sambwadi, mpe nyonso yankaka yina, nyonso yina ke na kuvukana ntangu yayi. Beno me mona? Ntangu yayi, ya vwandaka Nzambi.

823 Ntangu yayi ntangu Yandi (Logos) basikaka na Nzambi, yina vwandaka Nzambi yina basikaka na yinto mosi yayi ya nene na kati ya nzutu na mutindu ya—ya muntu; mpe ya salaka Logos, yina beto ke bokila théophanie.

824 Ntangu yayi, kana beno baka théophanie ntangu beno ke tala na yawu, ya kele muntu. Ntangu yayi yina beto . . . Ntangu yayi, ya kele kisika beto vwandaka na mbandukulu. Ntangu yayi, beno ke bakula yawu ve ntangu yayi, kasi na ntama beno vwandaka kuna na mbandukulu mutindu yina. Ntangu muntu salaka . . . Ntangu Nzambi salaka muntu na kizizi ya Yandi, Yandi salaka yandi théophanie. Mpe Yandi tulaka yandi kaka na nsuni . . . Ntangu Nzambi salaka muntu na kizizi ya Yandi, na mutindu ya Yandi, bawu vwandaka . . . Na Genèse 2, ya vwandaka . . . to na Genèse 1:28, mu banza ya kele, “Ya vwandaka ntete na ata muntu ve samu na kubundula ntoto,” mpe Nzambi salaka

bakala mpe kento. Ya kele kieleka, “Ata muntu ve samu na kubundula ntoto.”

⁸²⁵ Na yina Nzambi nataka muntu yisi mingi mpe tulaka yandi na luzingu ya kibulu, ya kele nzutu yayi, kaka mutindu baniama samu ti yandi saba ntoto, ti yandi simba. Théophanie yango ke simbaka ve, ya ke monaka ve, ke kuwaka na yinwa ve, ke kuwaka nsunga ve, ke kuwaka ve; ba-sense yayi yina kele na beto. Na yina Nzambi tulaka muntu na yisi kuna samu na—na kusimba mpe kutala.

⁸²⁶ Mpe—mpe na yina yandi vwandaka tambula na disamba ya Eden, ntete mutindu théophanie (mutindu Mpeve-Santu kele na kati awa ntangu yayi ke na kutambulaka na kati awa), ya twadisaka luzingu ya kibulu. Ya vwandaka yala na nyonso, kasi ya zolaka saba ve ntoto, beno me mona. Na yawu Nzambi tulaka yandi na nsuni samu ti yandi bundula ntoto. Me pesa yandi ba-sens tanu yayi, samu na kusaba ntoto mpe kubongisa bavinu mpe—mpe nyonso yankaka, mpe na manima muntu vwanda kukitala yandi mosi. Oh, yayi kele kizizi ya mbote.

⁸²⁷ Beno tala, samu ti ntangu ba salaka yandi ntete, ba salaka yandi bantu zole kintwadi. Ba salaka yandi nyonso zole bakala mpe kento, muntu vwandaka. Biblia ke tuba ti yandi vwandaka. Nzambi salaka muntu nyonso zole bakala mpe kento, “Yandi vangaka yandi.” Beno tala ntangu yayi, ntangu muntu vwandaka ya kukabuka na théophanie mpe ti ba me tula na nsuni, yandi vwandaka—yandi vwandaka kaka nyonso ve kuna; ndambu ya yandi vwandaka dyaka théophanie, na yawu ya talanaka mbote ve.

⁸²⁸ Kuna me luta ngombe ya bakala mpe ya kento, kuna me luta mpunda, mpe kuna me luta ngombe, mpe kuna me luta nyonso yankaka, na zole-zole. Kasi Adam, yandi. . . ya vwandaka. . . Beno me mona, ya vwandaka na kima vwandaka kondwa. Mpwila ya kieleka yina vwandaka lakisa ti ya vwandaka na mpangi yina vwandaka vingila yandi. Beno ke bakula yawu? Mpe mabanza ya kieleka yina beto ke kuzwa samu na kufwa awa, ti beto ke kukikwamisa mpe ke kuyenga-yenga na mabanza, mpe beto ke zola Luzingu yina kele na ata lufwa ve, ya ke lakisa ya ke na kuingila beto. Beno me mona?

⁸²⁹ Mpe Adam vwandaka yandi mosi. Mpe Nzambi, samu na kulakisa ti bawu zolaka vwanda ve ya kukabuka. . . Ntangu yayi mu ke vutuka na kima mosi yayi, kaka na sekonde mosi.

⁸³⁰ Beno tala, Yandi ata mbala mosi ve kwendaka mpe bakaka ntoto mpe salaka Eve, kasi Yandi salaka na kubaka ntoto ya ntete, Adam. Yandi bakaka lumpanzi ya lweka ya yandi mpe sadilaka yandi kisadisi, mpe ya vwandaka Eve. Ba salaka yandi samu na bakala, mpe ndambu ya bakala. Yandi vwandaka ndambu ya bakala na mbandukulu, na ngidikulu, na théophanie. Yandi vwandaka ndambu ya bakala na yisi awa na ngidikulu

yayi. Yandi zolaka vwanda ya kukabuka ve na ngidikulu yankaka, yandi zolaka vwanda ya kusala na ngidikulu mosi.

⁸³¹ Ya kele kaka samu na yina Klisto mpe Nzambi zolaka vwanda kieleka Muntu mosi, ya zolaka vwanda kima yankaka ve. Kana Yandi vwandaka muntu ya mbote to profete, Yandi zolaka vwanda ve Mukudi; Yandi zolaka vwanda Mvangi Yandi mosi. Kasi Yandi kele dyaka théophanie ntangu yayi, beno me mona, mpe mutindu Yandi vwandaka kuna.

⁸³² Ntangu yayi muntu kwizaka na yisi awa mpe yandi—yandi vwandaka mbote; mpe Nzambi zolaka yawu, Yandi tubaka, “Ya kele kitoko, ti bawu vwanda na zulu ya ntoto mpe bawu zinga kuna kukonda nsuka. Kaka yina; samu na—samu na Seko, kulandila mpe kulandila mpe kulandila. Ti ya kula kaka, mpe konso kimenina kubuta, mpe nyonso mutindu yina. Mpe ti muntu zinga, mpe bibulu zinga, mpe nyonso yankaka, kukonda nsuka mpe mvula na mvula. Ya kele nyonso ya kulunga.” Beno me mona?

⁸³³ Mpe na manima disumu kotaka. Mpe mu zola kusala kutuba yayi. Na . . . Na yawu bantu mingi ke salaka foti mosi ya boma na Masonuku mosi yayi, mpe ya kele na Psaumes 23. Bawu ke tanga Yawu mutindu yayi, “Kieleka, ata ti mu tambula na kiwanda ya *mpimpa* ya kinsinsya ya lufwa.” Ntangu yayi, ya kele ve na kima ya mutindu mosi. Biblia ke tuba ve, ti, “Kinsinsya ya *mpimpa* ya kiwanda . . . kiwanda ya *mpimpa* ya binsinsya ya lufwa.”

⁸³⁴ Ke tuba, “Ata ti mu tambula na kiwanda ya kinsinsya ya lufwa.” Ntangu yayi, ntete ya vwanda na kinsinsya, ya fwana vwanda na nsemo samu na kusala kinsinsya. Beno me mona, David na kuvwandaka profete mpe na yisi ya kupakulama, yandi salaka ve foti, yandi tubaka kaka Kieleka: “Kieleka, ata ti mu . . .” ve, tambula na kiwanda ya *mpimpa*, kasi, “na nzila ya kiwanda ya *bivudi* ya lufwa.”

⁸³⁵ Na yina beno fwana kuzwa lutangu mosi ya nsemo samu na kusala kinsinsya. Mpe ya kele mutindu ya kele awa. Beto kele nyonso zole muntu mpe kimpeve. Nzutu yayi kele kima ke kufwa, mpe butukaka na nzila ya kento; na nzila ya kima ve kasi na nzila . . . Na nzila ya Nzambi ve, beno kele kubutana ya Adam mpe Eve. Beno vwanda ndombi, mundele, to nyonso yina beno kele, beno kele kubutuka, nkuna ya Adam mpe Eve. Ya kele yina ke sala nzutu ya beno “kubutuka na disumu, kuvwanda ya kusala na disumu ya nko, kukwiza na yinza na kuzonzaka baluvunu.” Beno kele ya kuzimbana mpe ya kufundisa na mbandukulu ya luzingu ya beno, ata mpe, ya kukondwa siansi.

⁸³⁶ Ntangu yayi, samu ti mpeve yina kele na beno me kwiza na beno na nzila ya nkadulu, mpe na nzila ya nkadulu yina me kwiza na kuvukisaka banzutu, nsatu na nzila ya babakala mpe bakento me buta mwana ya ntoto. Mpe ti beno bika mwana yina yandi mosi, mpe beno longisa yandi kima ya mbote ve, yandi

ke kwenda yimbi. Beno longisa yandi ata mbote to yimbi ve, yandi ke baka yimbi. Samu ti ya kele nkadulu ya yandi na kusala mutindu.

⁸³⁷ Beno tala mbote mwana ya bébé, ya yinda kulutila mingi ve na *yina*, yina ke dasuka kaka; yandi ke kaka . . . yandi—yandi ke futika maboko ya yandi mpe ke balula kizizi ya yandi mbwaki, mpe ke kanga kupema ya yandi. Kieleka. Yinki ya kele? Ya kele nkadulu ya yandi. Yandi kuzwaka yawu na papa ya yandi to na mama ya yandi, na mosi; mama vwandaka na mutindu ya kudasuka ya nene samu na kunwana na dingwengwe, to tata ya yandi. Kana bawu ve, nkooko ya yandi ya bakala to nkooko ya kento vwandaka. Beno me mona, ya kele nkuna.

⁸³⁸ Na yawu yina ke sala . . . Beno kele ya kubutuka na yinza. Beno me kwiza na nzila ya nkadulu, mpe moyo ya beno nyonso kele ndombi mpe mvindu, mpe ya kuzimbana, mpe ya kusinga mpe ke kwenda na difelo. Ya kele kieleka!

⁸³⁹ Kasi ntangu beno ke butuka dyaka, kuna Nsemo ya Nzambi ke lezima na kati ya moyo yango (alleluia) na yina ya kele ve dyaka kiwanda ya mpimpa, kasi ya kele kiwanda na kinsinsya na kati ya yawu. Beno lenda vwanda ya kufuka awa na nsuni, mpe bima na zulu ya kizizi ya beto, kasi ya kele na Nsemo mingi na kati kuna. Mpe kilumbu Nsemo yango mpe mpimpa ke kabuka! Mpe ntangu nsemo ke lezimaka, mpimpa ke kimaka. Mpe ntangu beto ke kwenda na kuvwanda na Klisto na nzutu yango, mpimpa mpe lufwa ke zimbana, mpe beto ke talana na mbangu na kati ya Nsemo ya kulunga. Nkembo na Nzambi! Beto bawu yayi; kubela kele dyaka ve, kuvukana ya mpimpa na yawu kele dyaka ve.

⁸⁴⁰ Ntangu kaka yayi beto kele na nyonso zole kubela mpe kyese, mpe beto kele na mavimpi mpe ngolo, mpe beto kele na *bakati* mpe *banganda*, mpe *bakumata* mpe *bakukulumuka*, mpe kyese mpe mawa, na nyonso yankaka yina. Mbote, ya kele kaka kinsinsya. Beto kele na nsemo mingi na kuzaba ti ya kele na Nsemo kuna; mpe beto kele dyaka na nzutu, na nsuni. Kasi kilumbu mosi Kilumbu ke telama. Ya kele ntangu wanzio ya lufwa ke vwanda na makulu ya mbeto, ya kele ntangu dokotolo ke tuba ti nyonso me manisa; mpe ti nkadulu yayi ke kabuka na kimpeve, mpe ti nsemo ke vutuka na Nsemo, mpe mpimpa ke vutuka na mpimpa. Kuna yayi yina ke kufwa ke lwata yina ke kufwa ve. Ya kele ntangu yayi yina ke pola ke lwata yina ke pola ve. Ya kele ntangu yayi yina ke kufwa ke lwata yina ke kufwa ve, mpe beto ke katuka na kivangu ya ntangu na kivangu ya Seko. Beno lenda basika ve kuna nyonso na mpimpa, beno fwana kuzwa nsemo na kati ya mpimpa. Beno bawu yayi. Ya kele nzutu yango yina beno ke kuzwa.

⁸⁴¹ Yinki beto ke sala? Mbote, mpangi ya munu ya bakala ya luzolo ya santu, mpangi ya munu ya kento ya luzolo ya santu, ntete mbandukulu ya yinza, ntangu Nzambi vangaka

beno na kizizi ya Yandi, to vangaka muntu na kizizi ya Yandi, mpe vangaka kento na kizizi ya bakala samu na nkembo ya bakala, Yandi salaka beno théophanie. Kaka mutindu Yandi mosi, ntangu Yandi tubaka, “ti Beto” na bivangu yina Yandi salaka, “ti Beto sala muntu na kizizi ya Beto Mosi, na mutindu ya Beto, théophanie.” Nzambi kumaka ntete ve nsuni, Yandi vwandaka na kati ya théophanie.

⁸⁴² Mpe Moïse monaka Yandi. Moïse bokaka, “Mfumu, bika munu mona Nge.”

⁸⁴³ Yandi tubaka, “Kwenda kuna mpe bumbama na ditadi, na dibulu.” Mpe Moïse kwendaka na dibulu yango; mpe ntangu Nzambi lutaka, balusyemo mpe bidumu. . . Mpe na yina Nzambi lutaka, Yandi vwandaka na mukongo ya Yandi ya kubaluka mutindu *yayi*.

Mpe Moïse tubaka, “Ya vwandaka mukongo ya Muntu.” Alleluia!

⁸⁴⁴ Nani Yawu vwandaka? Melchisédek yina kulumukaka, Ntinu ya Salem, ya kukondwa tata to mama, ya kukondwa mbandukulu ya bilumbu to nsuka ya luzingu. Ya kele Yandi! Mpe Yandi me kulumuka. Ya kele Yandi yina zonzaka na Abraham; yina vukisaka samu na Yandi mosi mwa nzutu ya nsuni mutindu yina, mpe “Foiu!” me fula na kati ya yawu, me kota na kati ya yawu, mpe me kulumuka mpe me kudya mwana ya ngombe, me kunwa miliki ya ngombe, mpe me kudya mwa manteka mpe mwa dimpa ya disangu. Mpe Bawanzio zole.

⁸⁴⁵ Mpe ntangu bawu basikaka kuna, mpe nyonso ya bima yina kaka, “Foiu!” me zimbana mpe me kwenda.

⁸⁴⁶ Mu me banzaka ntete ve na yawu. Awa bilumbu fyoti me luta, mu vwanda tula masasi na munduki, mu vwandaka na munduki ya .22, ya kele .220 Swift. Mpe awa beno bankundi yina ke kubulaka zaba. Disasi yango ya fyoti, ya kele disasi ya makumi yiya na nana ya bambuma, kaka pene ya yinda *yina*, disasi ya .22 ya ntangu nyonso. Ya ke fuluka na ngolo ya kivinga pene mutindu .30-06. Ntangu yayi mu. . . Kompani ke fulusa kaka yawu na pene bametele funda na bankama tatu na makumi tanu na sekonde mosi. Mbote mingi, kasi beno lenda tula mingi. . . kufulusa yawu beno mosi, mpe beno lenda tula yawu tii na bametele funda na bankama tanu na sekonde mosi. Mpe—mpe na mutindu yankaka, kana beno vwandaka kubula. . . Beto vwandaka kubula, kilumbu yankaka yina, na bametele bankama zole, mpe disasi vwandaka bula fundu-fundu, ya zolaka dumuka ntete munduki kusala makelele. Ya kele mutindu mbangu ya kele.

⁸⁴⁷ Na yina beno baka cure-dent (beno zaba, kisika ya kupatama ya cure-dent) mpe beno kotisa yawu na mfututu ya beno mpe beno baka kima yango nyonso kufulusa na mfututu, kaka pene ya bambuma ya fyoti yiya to tanu, mpe kutula yawu na zulu kuna,

mpe na manima kutula disasi ya beno na kati kuna. Beno telama awa, mpe beno ke kuzwa disasi na diboko ya beno na sekonde mosi. Mpe beno kubula yawu kuna na marmotte ya kuvwanda na bametele makumi sambanu ntama na beno, mpe marmotte ke ningana ata fyoti ve. Disasi ke vutuka na mitindu ya yawu ya ntete, ke vutuuka na mipepe. Beno tala disasi yina kele nsongo mpe plomb ya kuvukana, mpe na kitini ya sekonde mosi, ya ke vutuka tii beno ke tala dyaka yawu ata fyoti ve. Ya ke vutuka mutindu ya vwandaka nkama ya byazi ya bamvula me luta, ke vutuka na mipepe. Mipepe yango fwana kusala mpe kuvutuka na nsongo mpe na kati ya plomb, mpe nyonso yankaka yina, mutindu yina. Mipepe yango fwana vwanda.

⁸⁴⁸ Ntangu yayi, beno bawu yayi. Ya kele mutindu beto kele awa, beto me katuka na moyo ya zulu mingi. Na mbandukulu beto vwandaka na kizizi ya Nzambi. Vwale mpe mpimpa ke kanga beto na kuzaba yawu ntangu yayi. Kasi Yesu tubaka na bilandi ya Yandi ti Yandi “vwandaka na bawu ntete mbandukulu ya yinza.” Beno me mona? Beto vwandaka! Beno lenda zaba yawu ntangu yayi, kasi beno vwandaka na mbandukulu. “Mpe kana tabernacle ya ntoto yayi kuzimbana, beto kele na mosi yimeni yina ke na kuvingila!” Alleluia! Mpe na manima beto ke kota na théophanie yayi, na yina beto vwandaka zinga kilumbu, samu ti beto kudya mpe kupesana maboko. Mpe myoyo na yisi ya autel ke na kudila, “Bilumbu yikwa, Mfumu?”

⁸⁴⁹ Ya kele na bimatinu sambwadi yina ke kwendaka tii na Nzambi, samu na Bampeve sambwadi na yina—na yina Yandi ke kulumuka. Mbote mingi, mutindu beno ke kwenda na yisi ya autel ya Nzambi, bawu vwandaka dila, “Mfumu, bilumbu yikwa? Beto lenda vutuka, na yisi awa?”

⁸⁵⁰ Nzambi tubaka, “Kaka ntangu fyoti dyaka, tii ntangu bampangi ya beno ke tala mpasi ya kima mosi yina beno talaka.” Beno me mona?

⁸⁵¹ Mpe kuna myoyo ke vutuka, mpe bawu ke kuma babakala mpe bakento dyaka, mpe ke zinga kukondwa nsuka ntangu mudidi nyonso mpe lufwa mpe kubela mpe mawa ya mpimpa ke zimbana; ya ke vwandaka dyaka ve na kivudi, ya kele kieleka nsemo ya mwini!

⁸⁵² Beno kuwa. Beno tala. Ti ya kuma mpimpa mutindu ya zola kukuma; ya lenda kuma mingi mpimpa ve ti mwini ke katula ve konso kitini ya mpimpa. Mpimpa mpe nsemo lenda zinga ve yinda kintwadi. Samu ti . . . Wapi yina kele ngolo mingi? Ya kele nsemo. Mpe ntangu nsemo ke lezima, mpimpa ke kima. Amen. Beno kele na nsayi ve? Beno kele na kyese ve na kuzaba? Kukondwa ntembe, ya kele ve na kinsinsya kisika mosi. Kasi Nsemo yayi ya kusakumuna yina kele na kati ya bantima ya beto ntangu kaka yayi, kele kima yina ke pesa kimbangi: Mwana ya Nzambi, ngolo ya Nzambi.

853 Mpe beto ke kwiza awa, beto ke tala mbote ngolo ya Mpeve-Santu kukulumuka mpe kukwiza na lukutakanu, mpe ke tuba, “Nge kele Mama *Kingandi*, ti nge salaka kima *yayi*, na kisika *yayi*. Beno kele ya kukwamisa na yayi ya me kuma bilumbu *mingi*, kasi MUTINDU ME TUBA MFUMU, ‘Telama, nge me beluka.’” Mpe kikata mpe mpofo ke telama. Mpe muntu yina cancer me kudya yina me bikana kaka kinsinsya, ke telama na luzingu mpe ke kuzwa mavimpi ya malu-malu dyaka.

854 Ya kele kukondwa ntembe, Yesu tubaka, “Bima yayi yina Mu ke sala, beno mpe ke sala yawu.” Mpe Yandi ke tuba, “Mu ke sala kima mosi ve ti Tata ke lakisa Munu.”

855 Yinki ya kele? Ya kele Nsemo yina ke vukana na mpimpa yayi beno me mona, samu na kuvulusa beto. Beno ke bakula yina mu zola kutuba?

856 Ntangu yayi, kilumbu kuvutukaka kaka kuna, mpe kuna ntangu théophanie ke kuma nsuni yina ke kufwa dyaka ve mutindu ya vwandaka na mbandukulu, kuna Yesu ke kwiza, mpe Nzambi. . . ntangu Klisto ke vwanda mosi. Klisto ke vwanda na zulu ya Kiti ya kintinu, mpe bantu nyonso ke vwanda bantu. Klisto ke vwanda na kiti ya kintinu ya David, Muntu, Mfumu Yesu; ke kufwa ata mbala mosi ve. Ata mbala mosi ve ti beto ke kufwa, ata mbala mosi ve ti beto ke bela, beto ke kuzwa dyaka ve mawa, mpe beto ke zinga funda mosi ya bamvula.

857 Mpe ntangu funda mosi ya bamvula ke manisa na zulu ya ntoto, kuna dyabulu ke basika; mpe mvumbukulu ya zole ke salama, mvumbukulu ya bantu ya kudedama ve. Bawu ke kutika basoda ya nene mutindu zelo ya mubu, mpe bawu ke zunga kan ya basantu, mpe na yina yandi ke sala yawu, Nzambi ke nokisa tiya mpe soufre katuka mazulu mpe ke kufwa bawu.

858 Mpe Jean tubaka, “Mu monaka mazulu ya malu-malu mpe ntoto ya malu-malu, samu ti mazulu ya ntete mpe ntoto ya ntete zimbanaka, mpe ya vwandaka dyaka ve na mubu. Mpe munu, Jean, monaka Mbanza ya Santu, Jérusalem ya Malu-malu, kukulumuka katuka Nzambi na Mazulu, ya kuyilama mutindu kento ya makwela ke yilamaka samu na bakala ya yandi.” Beno bawu yayi.

859 Kuna yandi tubaka, “Kento. . . Mwana-dimeme mpe Kento ya makwela ke vwanda kuna kukondwa nsuka.” Ya ke vwanda na ntoto ya malu-malu, mafuku mpe mafuku ya bakilometele. Oh, la la. Mbanza, Biblia ke teza yinda ya Mbanza makumi zole na yiya ya mafunda ya bakilomete na lweka. Ya kele makumi zole na yiya ya mafunda ya bakilometele na yinda, makumi zole na yiya ya mafunda ya bakilometele na nene, mpe makumi zole na yiya ya mafunda ya bakilometele na zulu. Ya kele kieleka kumonikisa yina Biblia ke pesa na Mbanza. Kukondwa ntembe ya ke vwanda dyaka ve na mubu, ya vwandaka ve na kisika samu na yawu.

860 Oh, ya ke vwanda kitoko mosi! Mpe na kati kuna, ya kele na yinto ya masa kaka na Kiti ya kintinu Nzambi, yina ke luta na ntwala ya Kiti ya kintinu. Ya kele na yinti na lweka nyonso ya yinti. . . ya nzadi ya Luzingu. Mpe na yinti yayi ke zinga mutindu kumi na zole ya bambuma, mpe ke pesa mbuma ya yawu konso ngonda.

861 Kuna kele makumi zole mpe yiya ya bakuluntu. Kuna kele Kento ya makwela. Kuna kele makumi yiya mpe yiya ya funda mosi, bakalaka ya nene ya tempelo. Oh mpangi ya bakala, beto ke na kukwenda kisika mosi! Bima ke na ntwala samu na beto. Yiya. . . Makumi zole mpe yiya ya bakuluntu. Nkama mpe makumi yiya ya mafunda ya bakalaka ya nene. Kento ya makwela ya kuvwanda na Klisto. Oh, beno ke zonza. . . Yinzo ya munu, Yinzo ya mbote! Amen.

862 Na kubanza ti mu kele na bweso ya kukwenda kuna, mpe beno kele na bweso ya kukwenda kuna. Mpe samu na yinki beno ke zola kusola na kukota na mpimpa yayi mpe kumona ata Nsemu ve, mpe kufwa mpe kukota na poto-poto mpe kukuma kima mosi ve? Samu ti ntangu Nsemu ke bakaka lutumu ya yawu ya nene, ya kele ve na kisika samu na mpimpa. Beno kwenda tala kisika mpimpa kwendaka ntangu nsemu kwizaka. Ya kele ntangu ya kele, ntangu bima nyonso ke vutuka na Nzambi. Ya vwandaka, mpimpa kuzwaka mbandukulu, mpimpa ke kuzwa nsuka. Nsemu kuzwaka ata mbala mosi ve mbandukulu to ya kele na ata nsuka ve. Nzambi ata mbala mosi ve kuzwaka mbandukulu to ata mbala mosi ve ke kuzwa nsuka. Na yawu, kilumbu, yinza nyonso ya kuvuna yayi na nyonso ya disumu ya yawu mpe kitoko ya yawu, yina ba ke bokila, mpe bufanatiki ya yawu nyonso mpe ba-sensation, mpe kukenga ya yawu nyonso mpe nyonso ke beba na kima ve, mpe ya ke vwanda dyaka ve. Ya ke vwanda dyaka ve, ba ke banza dyaka ve na yawu! Ya kele mpe, ya kutuba, “Ya ke kwiza dyaka mpe ve na lubambuku.”

863 Kasi baya kusakumuna ya Mfumu ke vwanda ntangu nyonso na Yandi. Beto ke vwanda na nzutu mutindu nzutu ya Yandi Mosi ya nkembo; mpe ke zinga na Yandi, mpe kudya na Yandi, mpe kuvwanda na Yandi, mpe kuzinga na Yandi kukonda nsuka mpe kukonda nsuka mpe byazi ya bamvula ya ntangu; mpe bansungi ya Seko ke landila na yinza kukondwa nsuka.

864 Mpe beno kele na nsodolo na nkokila yayi. Kana beno kele ve ya kukubama na kukutana kisika yango, ata bambala yikwa beno ke kwendaka na dibuundu, mutindu mambele ya mbote beno kele, beno kele ya kuzimbana tii ntangu Klisto ke pesa beno Luzingu ya malu-malu na kati ya mpimpa yina beno ke na kutambulaka. Beno lenda vwanda musambidi. Musambidi, beno kuwa bampangi, nsambululu kele mayela. Beno me mona? Bana nyonso ya Cain ke vwandaka ntangu nyonso na nsambululu. Ba-Juif yango vwandaka na nsambululu ntangu Yesu kwizaka, kasi bawu mangaka mpulusu.

⁸⁶⁵ Beno lendaka vwanda kieleka musambidi na nkokila yayi. Beno lendaka vwanda Presbytérien, Méthodiste, muntu ya Pantekote, Nazaréen, Pèlerin ya Sainteté. Beno lendaka vwanda kaka mutindu musambidi; ke kwenda na dibuundu ya beno mpe ke pesa kimbangi, beno lendaka yimba mpe kuboka mpe kupesa lukumu na Mfumu, beno lendaka nata kikunku ya beno ya kumi na dibuundu, beno lendaka sala mfinangani ya beno mbote, yina ke na kima mosi ve ya kusala na nsuka ya beno ya Seko. Caïn salaka nyonso ya fyoti ya yawu. Kieleka.

⁸⁶⁶ Bible ke tuba ti “blé mpe dititi ya yimbi ke kulaka kintwadi.” Mwa yinti ya blé ya kuvwanda kuna, ya ke na kufwa na nsatu ya mvula, mpe bansende mpe. Ntangu mvula ke kwiza, bansende kele kaka na nsayi na kuzwa mvula mutindu kele blé. “Kasi, ya kele na nzila ya bambuma ya bawu, beno ke zaba bawu.”

Ntangu yayi beto sambila na yina beno ke fyongonina bambuma ya beno:

⁸⁶⁷ Ntangu yayi, Tata Nzambi, ya me vwanda na mwa bakyuvu ya ngolo awa na nkokila yayi. Ya lendaka vwanda ti mu me sala ve kima mosi ya mbote, kasi mbote ya luzabu ya munu; Nge zaba ntima ya munu. Mu ke sambila, Nzambi, ti Nge ke yamba yawu. Mpe ntangu yayi, ya lenda vwanda ti, na mwa bakyuvu yayi, kana mu me lakisa yawu mbote ve, na yina ti Nge zonza na ntima ya bantu, mpe ti Nge lakisa yawu kaka mutindu yawu zolaka vwanda. Mu ke kuwa ti Nge me tuba na munu. Kasi kana mu lendaka vwanda na foti, na yina Nge lemvokila munu.

⁸⁶⁸ Mpe mu ke sambila, Nzambi, ti mosi na mosi ya bantu yayi ke baka bima yayi na ntima ya bawu, mpe ti bawu yindula na yawu mpe kubaza mutindu yayi, “Yinga, beno tala dibuundu, beno tala bima yayi. Ya kele yina Biblia tubaka.”

⁸⁶⁹ Ti bamama, Mfumu, Nge zaba mu zolaka ve kutuba kima samu na munu mosi na kutubaka na bawu. Kasi, Nzambi, mu—mu zola bampangi ya munu ya bakento, mpe Nge zaba yawu, Tata. Nge zaba mutindu mu ke banza na bawu. Kasi kutelama mpe kutuba na bawu kima ya yimbi, mu ke vwanda muntu ya luvunu samu na bawu. Mu ke zola ve kuvwanda muntu ya luvunu samu na bampangi ya munu ya bakento, mu zola kutuba na bawu Kieleka. Mpe, Tata, mu me baka Yawu kaka na Ndinga ya Nge.

⁸⁷⁰ Mpe ntangu yayi mu ke semba ve bankundi ya munu, kasi, Mfumu, mu ke tuba ti ba salaka yimbi na kupesaka muswa na bima yayi. Mpe kana mama zabaka luswaswanu mpe kwendaka mpe salaka yawu, na yina ya me tala yandi, pasteur zaba dyambu ve.

⁸⁷¹ Tata Abba, bima yango kele Ndinga ya Nge, mpe yawu kele ya Nge. Ntangu yayi ti Nge zonza na bantima ya bantu. Mu me pesa bawu nyonso na Nge. Mu ke mona yina Nge salaka, Tata;

Nge zaba. Zonza na konso ntima. Beto me lomba na Nkumbu ya Klisto.

Mpe na bayintu ya beto ya kukulumusa:

⁸⁷² Mu ke kumiyufula kana muntu ke zola kutelemisa diboko, kutuba, “Mpangi Branham, bambuka moyo na munu ti mu vwanda kinungi na nyonso, mpe ti na kilumbu ya nsuka kulwata lele ya makwela mpe kuvwanda na Klisto.” Beno ke zola kutelemisa diboko ya beno, kutuba, “Sambila samu na munu?”

⁸⁷³ Ti muntu nyonso bika yintu ya yandi na yisi ntangu yayi, mpe kaka ya kukulumusa. Nzambi sakumuna beno, ya kele mbote. Kuna, Nzambi sakumuna beno, bampangi ya munu ya bakento; mpe bampangi ya munu ya babakala, mpe, na kutelemisaka maboko ya beno. Ya kele mbote mingi.

⁸⁷⁴ Ntangu yayi, Tata, Nge ke na kumona maboko ya bawu. (Mu zaba, ntangu yankaka beno ke banza, “Mbote, kaka kisambu ya fyoti mutindu yina?”) Nzambi, mu ke na kubanza na mama yina, tubaka mazono, “Kaka kisambu ya fyoti kuna na yinzo ya yandi kilumbu yina na yina mwana ya bakala yina vwanda kufwa, kaka basabala tatu na kuzinga, kuvimba yina ya nene na butomfo, mpe kuna sobaka mambu.”

⁸⁷⁵ Mu ke na kubanza na Ézéchiás, yina balulaka kizizi ya yandi na kibaka, mpe dilaka, “Mfumu, lemvo ya Nge, tala munu kyadi. Bambuka moyo na munu, samu ti mu me tambula na ntwala ya Nge na ntima ya kulunga.” Ya sobaka lufwa na luzingu.

⁸⁷⁶ Kuboka mosi ya Mwana ya Nzambi, “Lazare, basika!” mpe muntu ya kufwa basikaka.

⁸⁷⁷ O Nzambi, Nge tubaka, “Beno zonza, beno lomba, mpe ya ke pesama. Ntangu beno ke tuba kima, beno kwikila ti yina beno me tuba ke salama, beno ke kuzwa yina beno me tuba.”

⁸⁷⁸ Ntangu yayi, Tata, mu ke sambila ti muntu nyonso yina me telemisa diboko ke kuzwa yina bawu me telemisa maboko ya bawu. Mpe ti ba vwanda ya kusakumuna. Mpe Nzambi, mu ke sambila ti Nge ke sadisa bampangi ya beto ya bakento, ti bawu ke vwanda. . . ti bawu dyata mbote, ti Satana na nzila ya televizyo mpe bamagazine ya *True Story* mpe nyonso yankaka yina, yina ba me sala kukondwa ntima, mpe bansamununu ya kukondwa kufyongonina, mutindu mvindu mpe buzoba na batelevizyo mpe nyonso yankaka yina, yina ke. . . Zolaka vwanda kisalulu samu na kununga mafuku ya myoyo samu na Nge, kasi wapi mutindu ya kele ve ya kufyongonina, mpe ke samuna mutindu ya bima yayi ya mvindu yina bawu. . . Oh, mutindu ya kele mawa! Mpe na kuzaba ti mpeve ya dyabulu me kota mpe ke na kuzunga bampangi ya beto ya bakento, mpe ke na kumekaka na kusala bawu kukuma ya mode mpe kulwata mutindu yina.

879 Mpe beto ke tala ti na . . . na bampangi ya beto ya babakala, mpe, Mfumu, ti mutindu bawu ke banza ti bawu lenda kunwa tabaka mpe kunwa malafu, mpe kulandila mutindu yina, mpe dyaka kuvwanda Miklisto samu ti bawu ke tuba ti bawu “ke kwikikila.” Ti bawu kuzaba ti “dyabulu ke kwikilaka, mpe.” Mpe ti yandi kele ya kuvuka ve, “yandi ke kwikila mpe ke tekita.”

880 Mpe ntangu yayi, Tata, beto ke sambila ti Nge ke tala beto nyonso kyadi, mpe lemvokila beto masumu ya beto, mpe ya lenda vwanda na bayina me telemisa ve maboko ya bawu, O Nzambi, tala mawa. Ti na bweso yankaka yina bawu ke kuzwa, ti bawu telemisa maboko ya bawu.

881 Beto ke na kuyilama na kubaka kominyo, Mfumu. Lemvokila beto bayimbi ya beto mpe bafoti ya beto ya luzingu me luta. Mpe ti beto kuzwa lusakumunu ya Nge, samu ti beto me lomba yawu na Nkumbu ya Klisto. Amen.

882 Mfumu kusakumuna beno. Beno lemvokila munu na kubumba beno mutindu yayi. Mu ke na kumiyufula, kaka ntete kominyo, kana ya kele na muntu yina me kwiza samu ti ba sambila yandi, yina ke zola ti ba sambila yandi, mbote, beto ke sepela na kusala yawu kaka na ntangu yayi, kana ya kele na muntu samu ba sambila.

883 Mbote mingi, mpangi ya bakala, beno nata kaka kento yango, ya ke vwanda mbote. Mpe kaka ntangu fyoti, mpe kuna beto ke—beto ke sukisa. Mpe kuna na yina beto ke sukisa, na yina bayina ke zola kubikana samu na kominyo, lendaka vwanda. Kasi ntangu kaka yayi beto ke lomba kisambu samu na bambevo. Yinki Biblia ke tuba?

884 Kana mpangi ya bakala ke lenda ve kutelama . . . Ya kele nyonso mbote, beno bika kaka yandi kuvwanda kuna, beto ke kwiza na yandi. Ya kele nyonso mbote, beno bika kaka yandi kuvwanda kuna. Mpe beto ke kulumuka mpe ke sambila samu na yandi. Ya kele mbote. Mbote mingi, tata, beno bika—bika kaka yandi kuvwanda kaka kuna. Ya kele mpasi samu na yandi na kutelama awa, mbote, beto ke sepela na kukwenda kaka na yandi.

885 Ntangu yayi mu zola kusala mwa kutuba mosi yayi, mpangi ya munu ya luzolo. Beno me mona, mu—mu zaba ti Mfumu me monisaka yayi mbala mpe mbala na bantangu mingi. Beno me mona? Mu kele na mingi ve ya mulongi, mu kele na ndongosolo ve mpe nyonso yankaka. Mu zola Mfumu Yesu, Nzambi zaba ti mu zola Yandi. Kasi ba bokilaka munu na kusala kima mosi, kusambila samu na bambevo. Beno ke kwikila yawu? Mpe ntete mu zaba na yina me tala dikabu, mu vwanda kwendaka awa na lupitalu; mpe mu ke bambuka moyo na ba-infirmière kutuba, “Ntangu yayi beno ke kuma mbote.” Beno me mona? Mpe kaka kima, ti Nzambi me vwanda na lemvo mingi na kuzitisa bisambu ya munu samu na bantu.

886 Mu banza, na nkokila yayi, kana ba bokila, kaka yinza ya muvimba na kisika nyonso na yinza. Mpe kutuba, muntu nyonso yina Mpangi Branham sambilaka, beno kwiza awa, mu ke zola beno kupesa mvutu na luyalu ya États-Unis, na mukanda. Mpe ya ke vwanda nsamununu na yinza ya muvimba. Mu banza, ya lenda vwanda na mafuku yiya to tanu ya bantu yina ke pesa mvutu na mbokolo yina kana ya vwandaka ya kuzabana. Beno me mona?

887 Mpe bantu yango, to bayankaka ya bawu vwandaka yimeni ya kufwa, dokotolo bika, mpe—mpe kisadi ya yinzo ya bamvumbi. Bayankaka ya bawu kufwaka na makubu; bayankaka ya bawu kufwaka lufwa ya yinza. Bayankaka ya bawu kele bampofu, bikata, bayina ke tambula tengu-tengu, ya kukondama, bantu ya mawa, na yintu . . . na balupitalu, vwanda zaba kwandi ve ti beto vwandaka na lupitalu samu na kusambila samu na bawu. Ba vwanda nata bawu, ba zolaka nata bawu. Bawu vwandaka nwana na kuluta nzila ya bawu mpe bawu mosi vwandaka sala nyonso, mpe vwandaka zaba ve kisika bawu vwandaka. Na baminuti tanu, vwandaka kuma ya kulunga, ya mbote, bantu ya luzolo, mpe ya mpeve ya mbote na bilumbu yina me bikana na bawu. Beno me mona?

888 Ya kele . . . Yinki ya kele? Ya kele ve Mpangi Branham. Ya kele Yesu Klisto, Yandi me fidisa munu na kusambila na bambevo. Ntangu yayi beno tala yina ya kele. Ya me vwanda ve na nsangu mingi na Jeffersonville, samu ti, beno tala samu na yinki. Ntangu yayi, mu zola beno kubaza mu kele na mwa bampangi ya munu ya ntima mpe ya mbote kaka awa na mbanza yayi. Kasi mbanza yawu mosi, na mutindu ya mbanza, mu zola yawu ve. Mu zola ve mutindu yayi, mpe ata mbala mosi ve mu zolaka; ntangu mu vwandaka mwa mwana ya bakala, ya kuvwanda, vwandaka tanga babuku ya munu ya masolo, mu vwandaka tubaka, “Kilumbu mu ke katuka awa.” Beno me mona?

889 Mu zola ve Jeffersonville, ya kele kiziba, ya kele yisi awa. Ya kele kaka kieleka kiziba, mpe—mpe ya kele kieleka yimbi. Beno kwenda mata na zulu ya Spickert Knobs to kisika mosi, mpe beno tala na yisi na lweka ya New Albany mpe Jeffersonville, kana beno zola kumona. Beno tala awa, badokotolo ke na kutuba mpe ntangu yayi, ti, “Bantu ya kiwanda yayi ke na kukuma na anémie samu na mutindu.”

890 Mama mosi ya ntwenya na zulu awa, Mama Morgan, yandi belukaka na cancer, nataka yimbwa ya yandi na dispensaire, vwandaka banza ti yandi vwandaka na makwanza. Beno zaba yinki ya vwandaka? Bima yina Colgates ke bikaka mpe bima ya matiti ya yimbi kisika ya basikaka. Ya kele kieleka kisika ya kulutila mavimpi ya yimbi.

891 Bakala mosi vwandaka na Basoda, yandi kwendaka awa mpe kuzwaka . . . Yandi vwandaka na asthma. Yandi kwendaka awa

na Floride mpe meso ya yandi kumaka kieleka ndombi, mpe yandi kwendaka na dokotolo, mpe yandi tubaka, “Dokotolo . . .”

⁸⁹² Dokotolo tubaka, “Ntangu yayi, nge me vwanda na kunwana, ve?”

⁸⁹³ Yandi tubaka, “Ve, tata, mu vwandaka ve.”

⁸⁹⁴ Kana beno zola kuzaba nani ya kele, nkumbu ya yandi kele Herby. Ntangu yayi, kana mu lenda banza kaka . . . Ya kele—ya kele na Union National Bank, na New Albany, yandi kele musimbi-mbongo. Beno kwenda kaka kuna mpe beno mona yandi yina ba ke bokila “Herby,” beno yufula yandi.

⁸⁹⁵ Mpe yandi tubaka . . . Yandi kwendaka, yandi tubaka, “Dokotolo,” yandi tubaka, “Mu kele na sinusite.”

⁸⁹⁶ Mpe yandi talaka yandi, yandi tubaka, “Ya kele mbote.” Yandi tubaka, “Mu banza ti nge me vwanda na kunwana.” Yandi tubaka, “Bakala, wapi kisika nge ke vwandaka?”

⁸⁹⁷ Yandi tubaka, “Nge lendaka zaba ve kisika,” yandi tubaka, “Mu ke vwandaka na mbanza mosi ya fyoti na ntuala ya Louisville, na Kentucky, yina ba ke bokilaka New Albany, na Indiana.”

⁸⁹⁸ Yandi tubaka, “Nge zola kutuba na munu ti nge me kuzwa mpasi ya sinusite na maza ya mungwa yayi awa na Miami, na kukwizaka?” Yandi tubaka, “Kana nge lenda zinga na Jeffersonville, na Indiana, to na New Albany, na Indiana, beno lenda zinga kisika nyonso na yinza kisika basoda ya États-Unis ke fidisa nge.” Kaka yina. Beno me mona?

⁸⁹⁹ Ya kele kisika ya kulutula mavimpi ya yimbi na yinza, yina mu zaba, kukatula bisika yankaka ya kiziba ya malaria. Beno me mona? Mpe mu—mu—mu—mu kele na bampangi awa.

⁹⁰⁰ Beno tala awa, mu lenda bokila kaka bawu mutindu yayi. Beno tala Mulongisi Sam Adair, nkundi ya munu. Mbote mingi, beno tala Mike Egan, ya kuvwanda kuna. Oh, la la, bawu yikwa mu lenda tanga! Kaka bankama ya bankundi ya munu ya mbote ya kieleka, bankundi ya munu ya ntama, bayina vwandaka na munu . . . Ata lutangu ya bankundi ya malu-malu mu ke kuzwa, ya kele ve na kima mosi yina ke baka kisika ya bankundi ya ntama. Beno zaba yawu.

⁹⁰¹ Beno tala mama ya munu ya kiboba ya kuvwanda na manima kuna, bilumbu mingi dyaka ve na ntoto, yandi me kota na makumi sambanu ya yandi ntangu yayi. Beno tala mama ya kento ya munu, ya bamvula makumi sambwadi, yina ke na kukwenda na makumi sambwadi na mosi ya yandi; yandi kele ya kuvwanda na manima awa kisika mosi, mu banza, na nkokila yayi. Mpe kuna, kubika yandi. Ba zikaka papa ya munu awa; ba zikaka kento ya munu awa na Walnut Ridge; bébé ya munu kele ya kulala kuna. Beno me mona yina mu zola kutuba?

902 Mu—mu—mu zola ve . . . mu—mu—mu—mu zola ve kuvwanda awa, mpe mu banza ti ntama mingi ve, na bilumbu fyoti, mu fwana kwenda. Beno me mona, samu ti ya kwizaka na munu, mu ke tuba yayi na zulu ya chaire mpe Biblia ya munu, ntangu nyonso.

903 Ntangu mu tubaka na kento ya munu, ntangu ba pesaka beto mbongo samu na kutunga yinzo ya pasteur yina mu pesaka na dibuundu yayi . . . Dibundu yayi kele mfumu ya yinzo yango ya pasteur; beno kwenda awa, beno tala kana ya kele yawu ve. Beno me mona, mu zolaka ve kubaka yawu samu na munu mosi.

904 Ntangu yayi, ntangu mu vwanda zola kutunga kuna, Meda tubaka, “Mu zola kuvwanda awa samu na mama ya munu.”

905 Mu tubaka, “Cherie, kaka kieleka mutindu beto ke sala, beto ke vwanda na mawa samu na yawu. Nge me mona, ya ke simba kaka ve. Nzambi me tuba, ‘Kabuka,’ mu fwana sala yawu.”

906 Mpe yandi tubaka, “Kasi, mama ya munu!”

907 Mu tubaka, “Mama ya munu, mpe. ‘Kasi yandi yina ke bika ve baya yandi, mpe na manima kulanda Munu, kele ve ya kulunga samu ba bokila yandi ya Munu.’ Mpe ya kele kieleka.”

908 Kilumbu, ntama mingi ve, mu ke tala ti mu fwana katuka, ya zola kutuba, kukwenda. Kasi beno tala dyambu, balukutakanu ke tambula ve awa. Ya ke tambula ve mutindu ya ke salaka na bisika yankaka, mpe muntu nyonso yina me vwandaka na balukutakanu zaba ti ya kele kieleka, samu ti ya kele kaka awa na mbanza ya munu mosi. Ya kele yina.

909 Yesu tubaka kima mutindu mosi ntangu Yandi kwizaka.

910 Bawu tubaka, “Nani kele muntu yayi? Ya kele ve mwana ya bakala ya kisadi-mabaya awa? Na wapi lukolo yandi kotaka? Wapi kisika yandi me kuzwa luzabu yayi? Ntangu yayi ti mu mona nge kusala . . . Nge tubaka ti nge salaka bimangu na lweka awa, bika mu mona nge kusala kima mutindu mosi awa. Yina nge salaka na Capernaüm, bika mu mona nge kusala yawu awa.”

911 Yesu tubaka . . . “Yandi yitukaka na kukondwa lukwikilu ya bawu.” Yandi balukaka mpe tubaka, “Na kieleka, na kieleka, Mu ke tuba na beno, profete ke kuzwaka ve musendo kana ti yandi kele na kati-kati ya bantu ya yandi mosi na kizunga ya yandi mosi.” Ya kele kieleka?

912 Mpe beno zaba . . . beno tala . . . Beno baka Finney, beno baka Sankey, Moody; beno baka John Wesley, ata mbala mosi ve lendaka na kukwenda ntama na yawu, beno me mona, tii ntangu yandi katukaka yinsi ya yandi. Beno tala—beno tala na—na—na Moody. Ntangu Moody, mubongisi-mapapa ya Boston, lendaka ve na kukwenda ntama, yandi kwizaka na Chicago ntete yandi kuma ya kuzabana. Beno me mona? Yandi zolaka kuzwa yawu na yandi mosi. Beno ntangu nyonso fwana sala yawu.

913 Kasi ntangu yayi, awa, Nzambi ke pesa mvutu na kisambu kana beno ke zimbana ti ya kele William Branham (Beno me mona?), kana beno ke zimbana ti ya kele William Branham yina kele na kima mosi ve ya kusala na yawu, kele kaka muntu yina ke telama mpe ke sambila samu na beno. Ya kele Yesu Klisto yina salaka yimeni yina beno ke na kulomba na kusala, kana beno ke kwikila kaka yawu. Beno me mona? Ya kele ve na kima mosi ya kusala. . . Mu kele na kima mosi ve ya kusala na yawu, kaka samu na kupesa kimbangi. Kasi na kumonaka na manima mutindu mu kulaka awa na beno, mpe beno zaba konso bubolo kele na munu, mpe konso foti kele na munu. . . Mpe beno zaba yina Nzambi me sala, kaka na mbanza yayi.

914 Mbanza yayi, na kilumbu ya lusambusu, ke pesa mvutu ya ntalu ya nene kilumbu mosi, samu ti ya me vwanda na bankama mpe bankama ya bakubeluka ya ngitukulu kaka awa (Ya kele kieleka.), kaka awa. Bidimbu mpe mambu ya ngitukulu, mpe kutalana ya Wanzio kuna, mpe bazulunale yina salaka makelele mingi na zulu ya yawu mpe nyonso, mpe dyaka bantu. . . Samu na yinki?

915 Ntangu yayi kilumbu, mu ke katuka awa. Mu ke na kumiyufula: “Yinki ke vwanda nsuka ya munu? Ya me suka? Na kutala ya kele yawu? Mu me kuma na bamvula makumi yiya na nana. Na kutala ya me suka kaka?” Mu ke kumiyufula yayi. Kana ya kele. . .

916 Beno tala, samu na yinki yinza me bakula ve kizizi yango kuna? Samu na yinki bawu me simba yawu kaka ve na nswalu? Samu na yinki bawu ke simba ve baprosesi yayi mpe nyonso? Beno zaba, bawu lenda sala yawu ve ntangu yayi, kasi kilumbu mosi mu ke katuka yinza, mpe ntangu mu ke katuka, na manima bawu ke bakula Yawu. Bayankaka ya beno bantwenya ke bakula yawu na manima mu me kwenda. Beno me mona? Kasi Nzambi ke pesa muswa na yawu na kusalama ve ntangu yayi. Beno me mona yina. . . beno ke bakula yina mu zola kutuba. [Kisika ya mpamba na bande—Mu.]

917 . . . Kaka mulunga ya mwana ya fyoti ya kento. Kana muntu zola kubaka yawu. Mpe mu banza ti Mpangi Sothmann tubaka ti yandi bikaka Biblia awa mbala ya nsuka yina yandi vwandaka awa, mu banza. Muntu talaka Biblia, Biblia kubikana awa? Kana beno talaka yawu, ya kele ya Mpangi Fred Sothmann ya Canada. Ntangu yayi beto sambila.

918 Mfumu, tala kyadi, na yina ba ke na kubula muziki na malembe mpe ti Mpangi Neville ke na kutula mafuta, mu ke tentika maboko na bambevo na Nkumbu ya Yesu. Pesa yawu, Mfumu, samu na kubeluka ya bawu. Amen.

919 Muntu nyonso sambila, ntangu yayi, muntu nyonso. Mbote mingi.

Mfumumu, mwana yayi, nkooko ya yandi ya bakala me telama awa samu na yandi. Nzutu ya yandi ke lendaka ve miliki, mutindu nyonso ya miliki. Kasi Nge ke na Ngolo nyonso mpe mwana ya yayi lenda vwanda ve na lukwikilu samu na yandi mosi. Mpe na yina, Mfumumu, mu ke na kuzwa lukwikilu samu na yandi, na bibuti mpe bankooko mpe beto ke tuba, na Nkumbu ya Yesu, ti bébé yango ke vwanda na lenda ya kunwa miliki mpe ke zinga samu na nkembo ya Nzambi. Amen. Ya ke vwanda mutindu yina.

Oh, Nzambi, kento yayi ke sambila samu na tata ya yandi. Mu ke sambila na yandi ti Nge ke belusa tata ya yandi mpe ke pesa yandi ti yina yandi ke sosa, na Nkumbu ya Klisto. Amen.

⁹²⁰ Ntangu yayi, ya kele pete-pete ve? Bantu ke sambilaka, kasi ya kele yina bantu. . . Bawu ke talaka na kima mosi ya nene mpe bawu ke kumisaka yawu mpasi. Nzambi ke salaka yawu pete-pete. Beno ke kumisaka yawu mpasi mpe ke kondwaka yawu. Beno me mona? Kusala kaka. . . Ti ya vwanda kaka pete-pete mutindu Nzambi tubaka: “Bidimbu yayi ke landa na bawu yina ke kwikila; kana bawu tentika maboko ya bawu na bambevo, bawu ke ke beluka,” mutindu Nzambi tubaka.

⁹²¹ Beto ke tentika maboko na zulu ya kento yayi, Mfumumu, yayi kele mpangi ya beto ya kento ya kutelama awa, mpe ti yandi beluka na yina beto ke lomba yawu, na Nkumbu ya Yesu Klisto. Amen.

⁹²² Tata, na yina beto ke tentika maboko na zulu ya mpangi ya beto ya kento, na Nkumbu ya Yesu klisto, na kubambukaka moyo na Biblia mpe na malongi ya Mfumumu, ti yandi beluka.

Tata, na Nkumbu ya Klisto, beto ke lomba kubeluka ya mpangi ya beto ya kento, mpe mu ke sambila ti Nge ke kumisa yandi nyonso mbote na yina beto ke tumama na Ndinga ya Nge, na ata ntembe ve na dibanza ya munu kasi yina yandi ke vwanda. . . ? . . . Amen.

⁹²³ Tata, beto ke tentika maboko na zulu ya mpangi ya beto ya kento, mpe ke lomba ti, na Nkumbu ya Mfumumu Yesu, ti Nge ke belusa yandi mpe ke kumisa yandi nyonso mbote. Amen.

Na Nkumbu ya Mfumumu Yesu, beto ke tentika maboko na zulu ya mpangi ya beto ya bakala mpe ke lomba ti Nge kumisa yandi nyonso mbote samu na nkembo ya Nzambi.

Tata, na Nkumbu ya Mfumumu Yesu, beto ke pakula mpangi ya kento, mpe ke tentika maboko na zulu ya yandi mpe ke lomba samu na yandi kubeluka na Nkumbu ya Yesu.

Tata Nzambi, beto ke tentika maboko na zulu ya mpangi ya beto ya bakala, beto ke lomba ti, na Nkumbu ya Yesu Klisto, na yina beto ke kusa yandi ti Nge kumisa yandi nyonso mbote.

Tata, awa, kele kento ya yandi ya luzolo...?...beto ke pakula yandi mpe ke tentika maboko na zulu ya yandi, na kulombaka yawu, na Nkumbu ya Yesu Klisto.

⁹²⁴ Mfumu Nzambi, beto ke pakula ntwenya Edith, ke tentika maboko na zulu ya yandi, mpe ke lomba na Nkumbu ya Mfumu Yesu Klisto ti Nge ke pesa mvutu na ndombolo ya yandi.

Tata, na mama ya yandi, beto mpe ke pakula mpe ke tentika maboko na zulu ya yandi mpe ke lomba samu na kubeluka ya yandi, na Nkumbu ya Mfumu Yesu Klisto, ti yandi kuma nyonso mbote.

⁹²⁵ Tata, beto ke kusa mwa musanga ya ntalu yayi ya dibuta yayi, yina kele ntalu mingi, na Nkumbu ya Mfumu Yesu, yandi yina kilumbu mosi beto pesaka na Yandi, mpe mu ke sambila ti Nge ke belusa yandi...?... .

⁹²⁶ Oh Nzambi, Nge zaba ndombolo ya mpangi ya beto ya kento mpe beto ke tonda Nge samu na lukwikilu ya yandi ya nene. Ntangu yayi, ti bima yango yina yandi me lomba, ti...?... yandi sakanaka na ntangu yandi vwandaka fyoti, mpe Nzambi, ti mbeni bika kento yayi mpe ti yandi kwenda na yinzo mbote, Mfumu. Beto ke sambila samu na bakala yango, mpe, yandi yina yandi vwandaka me lomba, Nge silaka, “Kana beno lomba kima na Nkumbu ya Munu, Mu ke sala yawu.” Mu ke sambila ti Nge ke pesa mvutu na ndombolo yayi, na Nkumbu ya Yesu. Amen. Nzambi sakumuna nge.

⁹²⁷ Mfumu, na yina nerf yayi ke na kufwa na mbunzu ya mpangi ya munu ya bakala, beto ke lomba ti luzingu vutuka, na yina beto ke tentika maboko na zulu ya yandi mpe ke lomba yawu, na Nkumbu ya Yesu, ti nerf yango vwanda mbote.

Tata Nzambi, beto ke tentika maboko na zulu ya mpangi ya beto ya kento na manima ya kupakula yandi mafuta, na Nkumbu ya Mfumu Yesu Klisto, beto ke lomba samu na kubeluka ya yandi. Amen.

⁹²⁸ Tata ya Mazulu, mutindu mpangi ya beto ya kento me telemaka samu na bambote ya nene Nge salaka, yandi me telama samu na mosi ya kisadi ya Nge, mulongi, yina ke kidi-kidi ya kulutila; ntima ya beto ya kyadi ke banza na yandi beto zaba na yina yandi ke na kutulila. Mu ke sambila, Nzambi, ti Nge ke pakula mpangi ya beto ya kento na kutelamaka awa samu na yandi mpe kusa mulongi yango samu na kubeluka ya yandi. Mu ke sambila, na Nkumbu ya Klisto. Amen...?...Mfumu zaba...?... .

⁹²⁹ Mbote. Mu ke na kyese mingi. Kieleka ya kele kupakula ya Mfumu. Mfumu Nzambi, na manima kento yayi kuzwaka kimpwanza na mpeve ya yimbi yina yandi nwanaka bamvula mingi, kilumbu mosi Nge bikaka yandi kukwiza na yinzo kuna mpe kuna Mpeve kulumukaka, “MUTINDU YAYI ME TUBA MFUMU,” na manima yandi dilaka, ti yandi belamaka na autel,

yandi salaka nyonso yina yandi zabaka mutindu ya kusala, kasi ya lombaka MUTINDU YAYI ME TUBA MFUMU. Ntangu yayi, yandi me kwiza samu na bébé ya mpangi ya yandi ya kento yina ke na kulukaka; yina ke na kulenda ve na kutambula, yina me kuma na mvula mosi yimeni. Mu ke sambila, Mfumu, ti Nge ke pesa balusakumunu ya Nzambi na yandi na Nkumbu ya Yesu Klisto. Mu kele na nsayi mingi samu na yawu, mpangi ya kento, nge me kuma mutindu yankaka, mpe. Mpe nge kele ntama mingi ntangu yayi na kufwa, mutindu yina ve?

Tata Nzambi, beto ke sambila ti Nge ke sakumuna mpangi ya beto ya kento na yina beto ke pakula yandi mpe ke tentika maboko na zulu ya yandi mpe ke lomba ti dyambu yayi Nge ke tubaka: “Bidimbu yayi ke landa na bayina ke kwikila. Bawu ke tentika maboko na zulu ya bambevo, bawu ke beluka.” Beto ke tuba ti beto kele mikwikidi, Mfumu, na yawu beto ke sambila ti Nge ke sala kima mosi, na Nkumbu ya Yesu . . . ? . . .

⁹³⁰ Tata Nzambi, na kuzabaka ntima ya mwa kento yayi, na yina yandi me basisa yawu, beto ke lomba ti Nge ke tala yandi kyadi mpe ke pesa mvutu na ndombolo yina yandi me lomba. O Tata Nzambi, samu na dibuta ya yandi, samu na bana ya yandi, na mwana ya yandi ya bakala, ya kulutila, Nzambi, mu ke sambila ntangu yayi, ti Nge ke pesa bima yayi. . . ? . . . na ntima ya munu nyonso, mu ke lomba yawu, na Nkumbu ya Yesu. Amen.

Tata Nzambi, na yina beto ke pakula kento yayi na mafuta, mpe ke sambila samu na yandi na Nkumbu ya Mfumu Yesu, ti Nge ke belusa yandi mpe ke kumisa yandi mbote samu na nkembo ya Nzambi.

⁹³¹ Nkumbu ya nge kele ve West, ya kele?

Tata, beto ke sambila samu na ntwenya ya mama yayi. Yandi ke lomba samu na papa ya yandi. Ntangu yayi, mu ke sambila ti Nge ke pesa papa yandi, mbokolo na ntima ya yandi, Mfumu. Yandi zola yandi kuvuuka. Yandi zola ve ti yandi vwanda na yinza mutindu yandi kele, yayi, mwana ya yandi mosi, nkuna ya yandi. Mu ke sambila, Tata, ti Nge tala yandi kyadi, na Nkumbu ya Klisto.

⁹³² Lusakumunu na nge, mwana ya munu ya kento, ti Nzambi pesa nge, kima yina nge me lomba.

Nzami ya luzolo, beto ke sambila samu na kyadi samu na mwana ya kento, mpe beto ke lomba ti Nge ke tala kyadi, na yina beto ke pakula yandi . . . ? . . .



BAKYUVU MPE BAMVUTU NA ZULU
YA HEBREUX KITINI YA III KNG57-1006
(Questions and Answers on Hebrews Part III)

BANDANDANI YA NDIATULU, NTUMUNU MPE MALONGI YA DIBUUNDU

Nsangu yayi ya Mpangi William Marrion Branham, kulongamaka na Kingelezi, na Lumingu na nkokila, na kilumbu ya 6 ya Ngonda ya kumi, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelezi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org